


BWA CINYI KWELA

MBILÀ? AKULÀ!

 Mukalenge anubeneshe! Twänji tüşhaalààyikù anu ndambu biimànyine kuulu, patùdi biinyike mitu yetu apa. Kùdikù dilomba dya pabwàdi anyi? Wèwè mufwànyine kwikala naadi, manyishà nanku paùdi wela byanza byèbè muulu kùdi Nzambi apu mwikàle wamba, ku ciine aci ne: “Mukalenge, Wèwè ngudi mumanye dijinga dyànyì.”

² Taatù wa mu Dyulu, ncyà bushuwa ne—ne twètù tudi cisàmbà cidì cipete dyèsè mu dinda emu, dya kwikalaku basangile mu nzubu wa Nzambi, patùdi bamanye ne kùdi bààbùngì menemene bàdi bafwànyine kuswa kwikalaku mu nzubu wa Nzambi mu dinda emu, kadi bàsanganyibwa mu mpitaadi ne mu malaalu a babeedi. Kadi Wèwè udi mutupeeshe dyèsè edi dya kwikalaku balwe kaaba aka leelu ewu. Ne kacya, Mukalenge, katùtukù tulwa bwa kutumonabo kùdi bakwabo to, nansha mutùdi banange bwobumwe bwetu bwa muntu ne mukwèndè; kadi tudi bafwànyine kwenza aci ku mbanza yetu. Kadi tudi balwe kaaba aka mbwà kubwela mu bwobumwe ne Ewu Udi mutusangishe pamwe bu bânà ne bânà bàà muntu bananga.

³ Tudi tuKwela twasakidila mpindyewu. Ne mushindu wumwepele wutùdiku bamanye mwa kubwela Neebe mu bwobumwe mu mushindu mujaalame ngwà banyungulukile Dìyì Dyèbè. Dìyì Dyèbè ki Bulelela. Tudi basangile kaaba aka bwa dikanda dya nyuma. Ki ditùdi naadi dijinga, Mukalenge. Tudi ne cya kwikala ne dikanda bwa twamona mwa kukanga mwoyi bwa nkuruse yitùdi bambule. Nenku tudi tulomba bwa Wèwè kutumaku Nyuma Mwimpè munene awu leelu ewu, ne kutukankamikaku twètù bônso. Andamunaku ku malomba a bantu Bèèbè pàdìbo basangile ne beele byanza byabo muulu Kùdi apa, bwa ne bàdi ne dijinga dya bintu bu nanku. Andamunaku dyónso dya kùdìwu, Mukalenge.

⁴ Tudi tuKwela twasakidila bwa dilama dya mwoyi wa Mwaneeetu wa bakaji Ungren mààlabà diloolo, mu njuwu ya mu njila kaaba aka. Wèwè uvwa mudileeje wa ngàsà kùdìbo, Mukalenge, ne tudi tuKwela twasakidila bwa bwalu abu. Nenku mpindyewu nyewu tulomba, Taatù wa mu Dyulu, bwa Wèwè kutungunukaku bwa kwikala neetu ne kutwambulwisha patùdi batungunuke ne lwendu apa, muntu ne muntu wa kutùdi. Tùpèèshèku bukole Bwèbè bwambulwishi ne—ne diitabuuja dya kumanya ne Bwikadi Bwèbè bùtu kacya kabüyikù bupangila abu

nebwikalè neetu. Mu dîbà ditùdì katùyikù mwa kudikwacisha twètù biine adi, tudi bamanye ne “Banjelo bàà Nzambi mbateeke cituudilu cyabo cinyungulukile bàdi baMuciina, ne Bòbò nebàtwàmbùlè bwa pa dîbà kanà dyònsò katwikadi twálwa kutuuta dikàsà ku dibwe.” Nenku tudi tuKulomba mpindyewu bwa utupeesheku mabenasha Èbè bwa Dìyì, ne wàkwilèku kutùdì, ne munda mwetu, mu Dînà dya Yesu Kilisto. Amen.

⁵ Ndi ne kusakidila mùdì muunya wa pambelu, muunya wa dîbà, munkaci mwa kuteema. Kuulu kùvwa kubi be mu dinda emu. Ne ndi ngeela meeji ne, mu ditunga emu, nangananga, tutu ne kuulu kubwicidile be, kwa kupangishangana ne disanka. Kadi pa kumona mùdì muunya wùteema, dîbà dîpàtuka, s’mbilenga be.

⁶ Cisangilu cikese cya famiye leelu ewu, ndi ndisangisha ne bânà beetu bàà balume, bàdi bàsanganyiibwa kwa mwaneetu wa bakaji, ne bamwe bàà ku balelà beetu bàà mu nyungulukilu wa cimenga ne mu myaba yònsò emu. Kùdì musumbà munene wa dikema wa ba-Branhams. Bu bòbò bònsò mwa kulwa bàfùmina ku Kentucky, bàlwa muneemu, ndi ngeela meeji ne mbifwànyine kukengela bwa twètù kufucila cimenga cijima eci; bàdi bùngì kabuyi kwamba. Kadi cìdì anu ndyalukila dikese cyanàànà dya kwetu kumbelu. Tuvwa bònsò ne ciibidilu cya kudisangishila kwa mààmù, bwalu yèyè nguvwa dikunji dya kale dya ciswikilu divwà ditùlamàkàje pamwe, mu mushindu kampana. Kadi Nzambi nyawu wàngàcì diine dikunji dya ciswikilu adi ku Dyulu, ne mèmè ndi ngeela meeji ne twètù bònsò twadyakusangila kwòkò aku dîngà dituku.

⁷ Nenku mpindyewu mvwa ngaakula dituku adi, ngamba ne: “Nudi bamanye’s, ndi ngeela meeji ne—ne nèngìpidijè mayiisha àànyì a mu dyalumingu àshaalè bule bwa tusunsa tutwe ku makumi abidi, ne—ne, anyi makumi asatu, ne pashiishe nsambidile babeedi.” Nenku cyòcì aci ki cîmvwà ngeela meeji mu dinda emu.

⁸ Nenku mvwa ngeela meeji mààlabà awu diloolo, pàvwà Mwaneetu wa bakaji Downing mumbiikile mwambe ne, mubiikile Billy ne mwambe ne yèyè ne Mwaneetu wa bakaji Ungren pàvwàbo mu njila benda bàbànda, bàvwa basenunuke mu njila amu ne bapetakane ne njuwu. Ne Billy pàcìvwàye ku dididiishi, pamwe naanyì, ncyèna mumanye ne tuvwa dîbà kaayi to; pàmwàpa mu dinda emu, pa dîbà kampana. Nkààvwa muye mu tulu kùkaavwa ndambu wa dîbà. Mèmè kutangila lwà kwa Mwaneetu Wood, bàkààvwa bajime myèndù. Ki mèmè kutwa anu binù panshi cyanàànà bwa kusambila, nenku ndi mwenze anu ntwà binù, Cintu kampana kungambila ne: “Maalu ònsò àdi bìmpè.” Ki dîbà adi mèmè kwambila Billy ne: “Mwambile ne: ‘Byònsò,’ mùmvwà ndyambidila’s, ‘bìvwa mwa kwikala bìmpè.’” Ndi ne disanka dyàbùngì dya kubamona mu dinda emu, ne

basòmbe mu nzubu wa Mukalenge, lwà paanyima apa paanyima pàà bamane kwikala mu njila.

⁹ Cisàmbà cya bantu bàdi bakunange bikole mushindu awu, bwa kulwa báfumina mu ntanta wa nkama ya kilomeeta bwa kuteeleja Evanjeeliyo, pashiishe mêmè kudyambidila ne: “Diyiisha dya tusunsa makumi abidi, bya bwalu ne lujooko lwine lúntù naalu elu, kí mbafwànyine kudyumvwaku bimpè to.” Pa nanku mêmè kudyambidila ne ndi mufwànyine. . . bule abu.

¹⁰ Pa nanku, kuteelejaku Mwanetu wa balume Ungren, mwanèndè wa balume’s, mu dinda emu, wimba ne: “Mushindu Mwine Wúdi Munene’s we.” Yèyè ùdi ne. . . Yèyè udi ne mushinga kùdiye mu dinda emu kutamba mùvwàbi makeelela awu mu mapingaja, bwalu Nzambi munene wa mu Dyulu mmulame ne mwoyi mamwèndè ne mwanaabo wa bakaji, bàà mushinga mukole ne balenga abu.

¹¹ Mpindyewu, leelu, tudi bindile cikondo cya dicyonkomoka mu Mukalenge. Nanku mvwa ne byena-bwalu bibidi anyì bisatu mwab’ewu bîmvwà ntangila, kadi ncìvwà, ncìyikù mwa kutwishila meeji pa ne ncyèpi ciine cîmvwàku mufwànyine kwakwilapu mu dinda emu to. Cimwe cya ku byôbi cìvwa ne: “Muupwilaayi Yèyè maalu enu àdi anutacisha, bwalu Yèyè udi uditacisha bwa bwalu bwenu. Mpindyewu, pìikalàbi ne Yèyè udi uditacisha, bwa cinyi kùyikù uditacisha wèwè?”

¹² Pa nanku cikwabo, Billy Paul, anyì kí m’Billy Paul to. . . Mwanàanyì mukwabo wa balume awu, Joseph, ngudi muntwadile cyena-bwalu eci kukaadi ntanta mule. Yèyè ùvwa musòmbe mu cibambalu dîngà dituku, nenku kwambaye, pàvwàye mutangile kuulu ku fòtò, ne Billy. . . Anyì, Joseph ùtu munange mâtù wàmba kufwa, mùtù twànà twa balume tukese amu; mâtù ne tubalu, nudi bamanye’s. Ki yèyè kunkonka ne: “Papa, Yesu ùtu ne bwâtù anyì?”

Ki mêmè kwamba ne: “Ncyèna mumanye.”

¹³ Nanku paanyima pàà yèyè mumane kjuuka ne mupatuke pambelu, kí kumvwilabi bwa mêmè kudyambidila ne: “Yèyè ùtu ne bwâtù anyì?” Ki mêmè kwangacilapu cyena-bwalu, nenku mêmè kucifunda pa kàlipè kàànyì aka mwab’ewu ne: “Yesu ùtu ne bwâtù anyì?” Ki kumvwilabi bwa mêmè kwela meeji ne “PàvwàYe panu pa buloba, byakakengela bwa Yèyè kusomba difu bwa kulediibwamu, lukita bwa kujiikiibwamu, bwâtù bwa kuyiishilamu, kadi Yèyè m’Mwendeshi wa mazuwa a màyi a kale a Siona.” Bushuwa, Yèyè udi naabu. Kadi, nenku byôbi byena-bwalu bîmvwà ngeelela meeji abi, ngeela meeji ne mvwa pàmwàpa mufwànyine kubyangata pashiishe, kumpala kwa twètù kuumuka bwa kwalukila.

¹⁴ Nudi bamanye’s, mêmè ntu munange kuyiishila mu tabernacle emu, bwalu ki wetu ekeleeziya sungasunga. Tutu tudyumvwa badilekelele bwa kwamba cyònsò cidì Nyuma

Mwîmpè wàmba aci. Mu myaba mikwabo, nansha mùtùbi ne muntu awu mmuswe bwa wêwè kudyumvwa mwakidila bilenga, wêwè udi udyumvwaku anu mucintamane bwalu—bwalu udi usanganyibwa mu ekeleeziya wa bendè, ne mwikàle muswe kwikalaku ne bukalanga bukumbane bwa kuneemeka àbò—àbò meeji ne dilongesha dyabo bôbò.

¹⁵ Ndi mupicile mu cikondo cilenga cya dikema lumingu elu kwa Mwaneetu Burchman kwaka. Ki mêmè kubwela mu cyapù mùtùbo benzela fromage. Ndi mmona ne yêyè ne mukàjèndè, ne mwanèndè wa balume ne bakwabo, bàdi kaaba aka mu dinda emu. Ne mvwa misangu yònsò anu ngeela meeji ne cyapù cya dsenzela fromage cìvwa cifwànyine kwikala cintu kampanda bu mikwabo myaba yínkaadiku mubwelebebele, kaa, mwenze bu mùdi mulekelelangana ne mwa bukooya. Ekelekele, ndi mwa kwamba cintu cimwepele cya ne, wêwè udi mwa kushààla ne mwoyi mutuuje ne mwaba awu kî ngwà bukooya to. Wawa's wùvwa mmwaba mutambe kwikala wa mankenda wúnkaadiku mêmè ewu mubwele, ne nangananga mu cyapù. Kadi ncìvwa mufike ku dyumvwa to. Mêmè kudyambidila ne: “Kaa, pàmwàpa nebènzè kilò mitwe ku makumi anaayi ne yitaanu ya fromage ku dituku's.” Kadi bàdi bènza binunu bisambombo bya kilò ku dituku dyònsò, ne byapù bisatu biikàle bitàmbula's. Mêmè kudyambidila ne: “Kaa, ekelekele, udyàdya miine fromage yònsò ayi ki nganyì?”

¹⁶ Kadi Mukalenge mmubeneshe muntu ewu. Ngâkapetakù dyèsè dya kwikala mu nzubu mwèndè, dîkù dilenga dya dikema, mukaji mulenga wa dikema mudilambule. Ne bôbò kabeenaku ne kabingila nansha kamwe kàà kubengabo kwikala ne mwoyi bwa Kilisto dituku dyònsò to, mùdiبو bènza amu. Ndi mutwilangane ne bânà bèndè bàà balume, kadi mbânà balenga bàà dikema. Tudi ne kusakidila kwàbùngì be bwa bwobumwe ebù butùdi naabu muntu ne mukwèndè.

¹⁷ Mêmè kusangana ne mpaasata wabo wa kale ùvwa mmuntu ùndi—ùndi mumanye, Mwaneetu Gurley, muntu mulenga wa dikema wa mu diitabuujja dya Mpenta Musanga, ùmvwà mutuutakeene nendè kùkaadi bidimu, mu Jonesboro, mu Arkansas. Kadi ncìvwa mumanye ne bôbò bàvwa... ne yêyè nguvwa mpaasata wèndè to, nansha nanku.

¹⁸ Mpindyewu nwavulukaayi masangisha a mu diloolo edi. Ne pashiishe, bu Mukalenge mwa kwanyisha, mu dyalumingu dilwalwà edi kabidi tudi tutekemena ne netwakule. Ne pashiishe ndi ngeela meeji ne mu dyalumingu dyàlondà nebikengele bwa nye dîbà adi ku Chicago. Pashiishe nèngiikalè muumuke bwa cikondo kampanda, nebikengele bwa mêmè kwaluja dîkù dyànyì kumbelu, kubaaluja, anyì kubaaluja ku Arizona bwa ne, bânà, baamona mwa kudifundisha cyakabidi mu kalaasa. Nenku dîbà adi netulekeleku kutacisha mpaasata, pa kwangatangata kwa masangisha èndè.

¹⁹ Pa nanku, pa nanku tudi ne kusakidila kwàbùngì kùdì Mwaneetu Neville bwa mwakidilu wèndè, nudi bamanye's, bwa—bwa dimbiikidisha dyèndè. Ne yèyè mmutambe kwikala, kàyi. . . Mémè, mwaneetu, ntu munange muntu wa nanku awu, udi kàyikù ne budimu, kàyi ne citù to, mwikàle anu ne bwena Kilisto bushuwashuwale. Ntu munange aci.

²⁰ Mpindyewu netwikalè mwa kubalaku ndambu wa Mifundu ne pashiishe kwelaku nsèkè. Kadi ncyèna mumanye menemene ne ndìbà kaayi ditwapatuka to, ne miine Mayiisha maleemale aa, kadi ndi ngeela meeji ne. . . Mvwa ngaakula dituku adi pa dyakula dya ntanta mule, ki muntu kampanda kwambaye ne: “Ee, mpindyewu, bu wèwè—bu wèwè mwa kwakulaku tusunsa anu tukese menemene; kadi pèbèbè nyawu utu wakula byenze bu ne mmaaluu masokoka, twamb'eku twamb'eku,” yèyè ne, “twètù—twètù katùvwakù bafwànyine kufika ku dibyumvwa to.” Yèyè ne: “Tungunuka wèwè anu ne kwakula, ne paanyima pàà katanci cìdì cipatuka,” mwakambaye. Pa nanku pàmwàpa Mukalenge nì ngudi muswe bwa twètù kubyenza mushindu awu's.

Twànjàayi anu kwinyika cyakabidi mitu yetu.

²¹ Mukalenge, Dìyì Dyèbè ndyedi diteeka dyunzulula pa cyambilu, ne tudi bamanye ne dîngà dituku neDikangiibwe bwa musangu wàDì wa ndekeelu, dìbà adi Dìyì nediiikalè mubidi. Ne pashiishe tudi—tudi ne kusakidila bwa cikondo eci mu dinda emu. Nenku tükàngwìlèku, ku Nyuma Mwîmpè Webe, bidì munda mwa Dìyì ditwabala. Swaku bwa Nyuma Mwîmpè atulongeshe leelu ewu bintu bìvwà bikengela bwa twètù kumanya. Nenku swaku bwa twètù peetu, bwa kuleeja disakidila, tuteejeje Dìyì dyònsò ne ntema yònsò, twelanganePu meeji mu ndondo. Ne pashiishe swaku bwa aba bàdì batelejila ku mukaba wa mèyì abu, swaku bwa batelejeku ne ntema yònsò. Ne swaku bwa twètù kwikalaku bakumbane mwa kujingulula bidì Nyuma Mwîmpè uteeta kutubuulwila abi. Bwalu nyewu tufika ku dyumvwa ne, bu Yèyè mwa kutulaabaku, dìbà adi dilaabiibwa adi kadyena dya patuputu to. Didi mbwà kiipacila kampanda, bwa kukwataku mudimu bwa dyakalenga, bwa Mukalenge. Nenku swaku bwa myoyi yetu ne cyumvwilu cyetu biikalè bikàngula, Mukalenge.

²² Swaku bwa twikalèku ne budiikadidi bwa kwakula, ne budiikadidi bwa kuteejeja, ne kupeta mushindu wa kufika ku diitabuuja, bwa kwitabuuja bitùdì bateejeje abi, pàdìbi bifumina ku Dìyì dya Nzambi apu; bwa byamona mwa kubadiibwa kutùdì, bu Mwoyi wa Cyendèlèlèlè, mu Dituku dinene dilwalwà. Tùbènèshèku leelu ewu. Tùpiishèku patùdì bapiile. Tùmanyishèku bilema bitùdì naabi. Ne tùbènèshèku mu mushindu wùdì mujaalame, bwa twamona mwa kumanya kwa kwela dînù ne kwa kwela dikàlà, ne mwa kwenza maaluu pa buloba butùdì mpindyewu ebu; bwa twamona, mu nsòmbelu wetu panwapa, mwa kupeesha Yesu Kilisto luumu,

Yèyè wâkafwà bwa kutupeesha Mwoyi mu dyamwamwa dinene. Tudi tulomba nunku mu Dinà dya Yesu. Amen.

²³ Mpindyewu ndi muswe kubala anu mu myaba yibidi cyanàànà ya mu Mifundu, mu dinda emu. Ne wumwe wa ku yôyi wùdi anu wùsanganyibwa mu Mukanda wa Ekesoode. Bwa kwamba menemene, yònsò yibidi yìdi yìsanganyibwa mu Mukanda wa Ekesoode. Wumwe, mu nshapita wa 13, ku mvensa wa 21 ne wa 22. Ne wùdi wùlondà wùdi mu nshapita wa 14, mvensa wa 10, wa 11 ne wa 12. Mpindyewu nêmbalè mu Ekèsòdè 13.21.

Nenku MUKALENGE ùvwa ùya kumpala kwabo mundaamuunya mu dikunji dya ditutu, bwa kubalombola mu njila, ne bufuku. . . dikunji dya kapyà, bwa kubakenkeshila, bwa kwendabo mundaamuunya ne bufuku.

Yèyè kaakuumusha dikunji dya ditutu adi mundaamuunya, anyi dikunji dya kapyà adi bufuku, kumpala kwa bantu to.

²⁴ Mpindyewu mu Ekèsòdè 14, ku mvensa wa 10:

Nenku pàakaseemenà Pàlò pabwîpi, bânà bàà Izaleela mbenze anu batupula mèsù, nenku, monaayi, beena Ejiipitu bàvwa benda babalonda paanyima; ki kukwacikabo bwôwà bukole, ki bânà bàà Izaleela kwelabo mbila kùdi MUKALENGE.

Nenku dîbà adi baakambila. . . Mòsà ne: Mbwalu kakùvwa. . . (numfwilaayiku luse).

Nenku baakambila Mòsà ne: Mbwalu kakùvwa nkita mu Ejiipitu, ki paùdi mulwe neetu bwa twètù kufwila mu cipeela anyi? Bwa cinyi wèwè watwènzèdi nunku, bwa kutupatula mu Ejiipitu?

Ki ncyòci eci dîyi ditùwà bakwambile mu Ejiipitu, tukwambila ne: Tùlekèlè cyanàànà, bwa tukwacile beena Ejiipitu mudimu anyi? Bwalu bìvwa mwa kwikala bitambe bwîmpè bu twètù mwa kukwacila beena Ejiipitu mudimu, pamutu pàà twètù kufwila mu cipeela.

²⁵ Nêmbalè ndambu mukwabo wa mvensa:

Nenku Mòsà kwambilaye bantu ne: Kanuciinyiku . . . to, . . .

Mpindyewu teejejaayaaku ne ntema mwaba ewu.

. . . Mòsà kwambilaye bantu ne: Kanuciinyiku nwènù to, shààlaayi pòlàà, nenku numone lupandu lwa MUKALENGE, lwaleejay- . . . lwanuleejaye mu dituku edi; bwalu beena Ejiipitu banwàmònu leelu ewu aba, kanwakubamonaku kabidi to bwa kashidi.

MUKALENGE neanulwile mvita, nenku nvènú shàalaayi bapuwe . . . MUKALENGE wàkambila Mòsà ne: Udi wela mbila kùndi bwa cinyi? qmbila bânà bàà Izaleela, bwa batungunuke baye kumpala.

Kadi wêwè ela dikombo dyèbè adi muulu, ne olola cyanza cyèbè pamutu pàà mbù, ùmwabùlùlè pankaci; nenku bânà bàà Izaleela nebendele pa buloba bùme bìikàle bapicila munkaci mwa mbù.

Nenku mèmè, monaayi, mèmè nêmpapishè mwoyi wa beena Ejiipitu, bwa bôbò kubalonda; ne mèmè nêndyângàcìlè luumu pa Pâlò, ne pa cilwilu cyèndè cyònsò, ne pa makalu èndè a mvita, ne pa babàndi bèndè bàà pa tubalu.

Nenku beena Ejiipitu nebamanye ne mèmè ndi MUKALENGE, pângùkalà mudyângàcìle luumu pa Pâlò, ne pa makalu èndè a mvita, ne pa babàndi bèndè bàà pa tubalu.

Nenku mwanjelo wa Nzambi, uwua muye kumpala kwa cituudilu cya Izaleela awu, wakuumuka ne wakaya paanyima paabo; ne dikunji dya ditutu dyakuumuka . . . kumpala kwabo, ne dyakiimana paanyima paabo.

Nenku dyakalwa pankaci pàà cituudilu cya beena Ejiipitu ne cituudilu cya Izaleela; . . . òwua dituwu dya midimà kùdìbo, kadi òwua difila bukènkè bufuku kùdì aba, mu mushindu wa ne ewu kayikù mwa kuseemena pàvwà mukwabo to bufuku bujima.

Nenku Mòsà wakoolola cyanza cyèndè pamutu pàà mbù; ki MUKALENGE kwenzaye bwa ne mbù adisake paanyima ku cipepele cikole cya ku esete bufuku bujima abu, ne kuvwijaye mbù mushààle buloba bùme, nenku màyi kwabulukawu.

Nenku bânà bàà Izaleela baakabwela munkaci mwa mbù benda bendela pa buloba bùme, ne màyi àwua menze cimanu bwabo bôbò ku cyanza cya dyabalume, ne ku cya dyabakaji.

Ki beena Ejiipitu kulondabo, ne baakabwelamu benda babalonda paanyima lwà pankaci pàà mbù, ne tubalu twa Pâlò twònsò mene, makalu èndè a mvita, ne babàndi bèndè bàà pa tubalu.

Ki kwenzekabi ne, mu cilù cya mu dinda MUKALENGE kutangijaye mèsù panshi pa cilwilu cya beena Ejiipitu mutangidile mu dikunji dya kapyà ne . . . ditutu, ne kucyompakajaye cilwilu cya beena Ejiipitu,

Ne kupawulaye nkata ya makalu àbò a mvita awu, mu mushindu wa ne òwò bàkaendesha ne lutatu lukole, bifikishe too ne beena Ejiipitu ku dyamba ne:

*Tùnyeemàayi kumpala kwa Izaleela, bwalu MUKALENGE
ùdi ubalwangeena bóbò mvita ne ulwisha beena
Ejiipitu.*

²⁶ Dìyì dya Nzambi ndinene dya dikema, dilenga dya dikema, kakùyi mushindu nansha mukese wa kwimanyika kuDìbala to. Dìdì anu dyènda dilwa Mwoyi, patùdì twenda tuDìbala apu. Ndi ngeela meeji, mu cyena-bwalu eci mu dinda emu, nansha mùdici cikwaciibwa pa mukaba wa mèyi, ndi muswe kwamba nunku ku ntwadijilu eku ne, cìdi cìpeta, ndi ndisanganamu mèmè mwine. Ne kabingila kàdì kènza ne mèmè. . . Makeelela awu, mèmè mu kulonga, ki mèmè kumata pa cyena-bwalu eci, ki dìbà adi mèmè kudyambidila ne: “Nèngiikalè, bu Mukalenge mwa kwanyisha, mwa kwakula anu pa cyòci aci, bwalu cìdi cimpwekeshaku.” Ne ndi ntekemena ne cìdi citupwekeshaku twètù bònsò, bwa twètù kumona, ne citufikishaku ku dibandulukà; ne ku dilongaku ndambu, ne kufwanyikija dituku divwà mwine musangu awu adi, ku . . . ne dituku dìdiku mpindyewu edi.

²⁷ Ndi muswe kwangata myaku yisatu bu cyena-bwalu, ne cìdi ne: *Bwà Cinyi Kwela Mbilà? Akùlà!* Nzambi wakambila Mòsà, mu mvensa wa 15 emu ne: “Bwa cinyi udi wela mbila kùNdi? Ambila bantu, bwa baye kumpala.” Nenu: *Bwà Cinyi Kwela Mbilà? Akùlà!*

²⁸ Mpindyewu, tudi ne cyena-bwalu anu cyetu cya bushuwa eci, nenu nênteetè bwa kulwijakaja ne mwànyi mwònsò, mùdì Nyuma Mwîmpè ulombola amu. Ne ndi muswe kwela meeji ku . . . ku cyena-bwalu eci, ku Mòsà mwikàle wèla mbila kùdì Nzambi, mu cikondo cya lutatu; ne Nzambi mu kwandamuna mwikàle ùdyula Mòsà, anu mene pàvwà lutatu alu—alu lununke apu. Ne cìdi anu nngiikadilu’s, mùdìbi bimweka, bwa muntu bwa kwela mbila. Ne dìbà adi ndidyula kaayi—kaayi bwa Nzambi ukudimuka kadi kumudyula bwa dicyamba, bwa dyela dya mbila kùdìYe. Mbimweke anu bu ne ncintu cikole be.

²⁹ Misangu yàbúngì patùdì tutangila mu Mifundu, bilondeshile mushindu wetu twètù wa ditangila, bìdì bimweka anu bu ne mbikole be. Kadi twètù tuCilonga katanci kakese, tudi tujandula ne Nzambi wa lungenyi lwònsò awu mmumanye anu menemene cìdìYe munkaci mwa kwenza. Ne Yèyè mmumanye mwa kwenza biine bintu ebi ne mùdì mwa kukwata mudimu ne muntu. Yèyè mmumanye cìdì mu muntu. Yèyè—Yèyè mmumumanye. Twètù katwena bamanye to. Twètù tudi tumanyina anu ku luseke lwa mamanya a mu mitu. Yèyè ngudi mumanye ne cìdì menemene mu muntu ncinganyi.

³⁰ Mòsà ùvwa mulediibwe pa buloba apa, nsongààlùmè mwikàle ne mapà. Ùvwa mulediibwe bwa kwikalaye muprofeta, musungidyanganyi. Ùvwa mulediibwe ne bya mudimu bileidiibwe munda mwèndè, anu mùdì muntu yònsò udi ulwa pa buloba ewu mwikàle ulediibwa ne bya mudimu ebi, mùndì mèmè

ngiitabuuja ne mwànyì mwônsò didyanjila-kumanya dya—dya Nzambi, didyanjila-kulongolola.

³¹ “Kí nne Nzambi mmuswe bwa muntu nansha umwe abutuke to, kadi mbwà bônsò bàfikè ku kanyinganyinga.” Kadi, bu mùdiYe Nzambi, bìvwa bikengela bwa kwikalaYe mumanye, ne mumanye, “ndekeelu kumpala kwa cibangidilu.” Nwamonu anyì? Yèyè kàyi mumanye to, dîbà adi Yèyè kí ngwa kàyi mikàlù to; ne Yèyè kàyi wa kàyi mikàlù to, Yèyè kèna Nzambi to. Pa nanku, bulelela, Yèyè kàvwa muswe bwa muntu nansha umwe abutuke to, kadi Yèyè—Yèyè ùvwa mumanye ne uvwa mwa kubutuka nganyì ne uvwa kàyi mwa kubutuka nganyì. Kì kabingila, kavwidila mene kàà Yesu pa buloba, mbwà kusungila aba bàvwà Nzambi, ku didyanjila-kumanya Dyèndè, mumone ne mbàvwà baswe bwa kusungidiibwa, nwamonu’s, bwalu buloba bujima bùvwa bupiihiibwe. Ne mèmè ncyèna mmona mutùdiku bafwànyine kucilongesha mûngà mushindu kampana pa kuumusha wà didyanjila-kumanya dya Nzambi to, ne Bible ùdi wàmba bitooke tòò ne Yèyè mmumanye ndekeelu kacya ku cibangidilu, ne mwikàle mwa kucyamba.

³² Kì bwa cinyi, pàdì—pàdì muntu uteeta bwa kwikala cintu kampana cidìye kàyi to, yèyè udi anu wenza ditentula cyanààná, nenku nansha ku tootooto nansha ku ndandanda cyadyakukupeta. Mpekaatu yèbè neyikuvumbule. Kwèna mwa kuyibwikilaku to. Kùdi cibwikilu anu cimwepele bwa mpekaatu, m’Mashi a Yesu Kilisto, ne Ówò kaena mwa kulaabiibwaku to anu Nzambi mukubiikile kacya ku difùkà dya dyulu ne buloba. Bwa cyôci aci kì bùvwà Mashi awu meediibwe panshi; kabùyi bwa kudyatakajiibwawu, ne kusekiibwawu, ne—ne kudiibwawu bitungu, ne—ne kwambiibwawu mambavi to, ne—ne bikwabo. Àvwa mbwà kiipacila kàà buludi. Ncya bushuwa. Kabùyi bwa kunaya naawu, kabùyi bwa kutentudiibwa, mu kwamba kwa ne mpekaatu mmibwikila pàdìyi kayìyi mibwikila to. Ne muntu nansha umwe kèna mwa kwikala ne mpekaatu yèndè mibwikila pàdì dìnà dyèndè kadiyi difùnda mu Mukanda wa Mwoyi wa Mwànà wa mukooko kumpala kwa difùkà dya dyulu ne buloba to. Yesu wàkamba, Yèyè mwine ne: “Muntu nansha umwe kèna mwa kulwa kùNdì pàdì Taatù Wanyì kàyi mumukoke nansha. Ne bônsò bàdì Taatù,” bwalu bumana kwenza, “muMpeeshe, nebalwe kùNdì.” Ncya bushuwa. Pa nanku kwèna mwa kufikisha Mèyi ku didinga nansha. Àdikù mbwà Bulelela ne bwa dilongolola.

³³ Ne Mòsà wakalediibwa ne dipà dya diitabuuja; diitabuuja dinene ndìvwà naadi Mòsà. Tudi tudimona, paanyima pàà katanci, dimwènèkela mu yèyè. Ne yèyè wakalediibwa mu dîkù dinene, mutùdi bamanye mùvwà tatwèndè ne mamwèndè, bapatukile mu dîkù dya Lewi. Bwalu, bwalu bulonda kaaba aka, kumpala kwa eci, mu Mukanda wa—wa Ekèsòdè, bùdi buleleja bilenga bya dikema nsòmbelu wa muntu munene ewu.

Ne yêyè ùvwa umwe wa ku—ku bantu bàà batambe bunene bàà mu Bible, bwalu yêyè ùvwa cifwanyikijilu cya pyòpyopyò cya Mukalenge Yesu.

³⁴ Yêyè wàkalediibwa mu dilediibwa dya pabwàdì menemene, anu bu Mukalenge Yesu. Yêyè wàkalediibwa mu cikondo cya dikengeshiibwa, anu bu Mukalenge Yesu. Yêyè wàkalediibwa bwa kwikalaye musungidyanganyi, anu bu Mukalenge Yesu. Yêyè wàkasokokiibwa kùdì baledi bèndè, kule ne mwena lukuna, anu bu Mukalenge Yesu. Ne wàkalwa pa cikondo cyèndè cya mudimu, anu bu Mukalenge Yesu. Yêyè ùvwa mulombodi, anu bu Mukalenge Yesu. Yêyè ùvwa muprofeta, anu bu Mukalenge Yesu. Ne yêyè ùvwa mufidi wa mikenji, anu bu Mukalenge Yesu.

³⁵ Ne tudi tusangana ne yêyè wàkafwila pa Lubwebwe, ne ùdi ne cya kwikala mubiike ku lufu ne bikwabo byònsò, bwalu, bidimu nkama mwandamukulu paanyima yêyè ùvwa mwimane pa Mukuna wa Dikudimuka dya mpala, mwikàle uyiikilangana ne Mukalenge Yesu. Nwamonu anyi? Banjelo bààkamwambula e kuyabo nendè. Muntu nansha umwe kàtukù mumanye ne mpenyi paakajiikiibwaye to. Nansha dyabulu kaakamanya aci to. Bwa kwamba menemene, mèmè ncyèna ngiitabuuja ne yêyè wakajiikiibwaku to. Ndi—ndi ngiitabuuja ne Nzambi awu ngwàkamwambula e kuya nendè, ne—ne yêyè wakafwila pa Lubwebwe lùvwàye mulonde matuku èndè ónsò a mwoyi alu.

³⁶ Ne yêyè ùvwa cifwanyikijilu cipwangane cya Kilisto. Yêyè ùvwa mfumu kumutu kwa cisàmbà. Yêyè ùvwa mufidi wa mikenji. Yêyè ùvwa—yêyè ùvwa mudiishi wa—wa cisàmbà. Yêyè ùvwa kantu ne kantu, mu—mu cifwanyikijilu, kàvwà Kilisto mwikàle.

³⁷ Mpindyewu, dîbà adi, monaayi ne yêyè wàkalediibwa ne mapà manene aa ne mwikàle ne ngiikadilu munene, pashiishe kukengelabi anu bwa Cintu kampanda citeemeshèpu bukènkè, bwa kufikisha cintu aci ku Mwoyi.

³⁸ Nwamonu's, mbulelela ne dimiinu dya Nzambi nditeeka munda mwetu kacya anu ku difùkà dya dyulu ne buloba. Ne pàdì anu Bukènkè abu butuuta pa dimiinu adi bwa musangu wa kumpala, Bùdì budifikisha ku Mwoyi, kadi bìdì bikengela bwa Bukènkè bwànji dyambedi kulwa pa dimiinu adi.

³⁹ Anu múnkaadì mulongeshelongeshe misangu yàbùngì bwa mukaji mutekete awu ku ciina cya màyi, yêyè mu ngiikadilu awu. Nansha mùvwàye muntu wa—wa luumu lubi amu, nansha mùvwà nsòmbelu wendè—wendè mupwekeshiibwe milongo amu, ne mwikàle ùsanganyiibwa mu ngiikadilu awu bwalu bilele kacya kabìvwakù bimulenge to, kadi, nansha nanku, Bukènkè abu mbwenze anu bumulenga bwa musangu wa kumpala, ne lukasa lwònsò yêyè ùmba ùBùjingulula, bwalu kùvwa cintu kampanda mwaba awu bwa kwandamunaKu. “Pàdì ndondo

ùbìikila Ndondo,” kùdì ne cya kwikala Ndondo mu mwaba kampanda bwa kwandamuna ku dibiikila adi.

⁴⁰ Nenu Mòsà mwab’ewu ùvwa mulediibwe muprofeta ewu, kadi ùvwa mukoleshiibwe mu cilongelu cya mamanya a mu mitu ne mu nzubu wa bukalenge wa Pâlò. Pâlò Seti awu, mwena mwinshi mwa bukookeshi mwakakoleshiibwaye awu, ùvwa mmuntu ucìvwa anu ne luumu, ne ùvwa mwitabuuje ne Yozefu ùvwa muprofeta wa Mukalenge. Kadi kulwaku Ramsès paanyima pàà Seti, nenku Ramsès yêyè kaakatwaku Yozefu mushinga to. Ne pa nanku, ki bwa cinyi, mwaba awu ki wùvwà lutatu lubangile, mpindyewu, pààkajuukàku Pâlò uvwa kàyi mumanye Yozefu.

⁴¹ Kadi ngiikadilu minene eyi, twänjàayi kwakulapu anu kakese cyanààna, nenku, kumpala kwa twètù kufika ku citùpà cìdì citàmbe mushinga cya cyena-bwalu. Mémè ntu ne mushindu wa pabwàwù wa kuteeka cyena-bwalu, pashiishe kwenda kwibakilapu, kadi Mukalenge atukwacisheku mu dinda emu patùdì twibakilapu apa.

⁴² Mòsà, mwikàle mulediibwe ne dipà dinene dya diitabuuja edi. Pashiishe, yêyè wàkalaabiibwa ne wàkatùmiibwa ne mudimu ku cipuka cìvwà cilakuka kapyà, bwa kusungilaye cisàmbà cya Nzambi. Mpindyewu, monaayaaku ne nngiikadilu minene ya mushindu kaayi yìvwà naayi muntu ewu! Yêyè wàkalediibwa mbwà cintu kampanda cisunguluke. Nzambi ùvwamù ne kiipacila kampanda.

⁴³ Nzambi ùdì ne kiipacila mu kwikala kwèbè kwa kaaba aka. Nwamonu anyi? Wèwè, wìkalakù anu mwa kafika kaaba aku, bùngì bwine bwa ntatu yùdì wepwila Nzambi’s we, ne udyèpwila wèwè mwine kabidi.

⁴⁴ Mòsà mulediibwe, ne pashiishe, paanyima, yêyè wàkafikishiibwa pa—pa mwaba wàkeediibwaye maanyi. Ne, monaayi, dimiinu ditèèkìibwe muntwamu ne mmwenenu wa mamanya a mu mutu, mwikàle ne diitabuuja dyònsò òvwàye mulediibwe naadi bwa kusungilaye cisàmbà eci adi, kadi nansha nanku kadivwakù difike ku Mwoyi to too ne pààkalwà Bukènkè bwa ku cipuka cìvwà cilakuka kapyà aci kuteemenabu pòpò; too ne pààkalwàye kumona, kaciyi cintu kampanda cyàkabalàye to, kadi cintu kampanda cyakamonaye ne èndè abidi; Cintu kampanda cyàkaakulà nendè, ne yêyè muCyàndàmùne. Kaa, mushindu mwine wùvwà cyòcì aci cifikishe bintu ku Mwoyi’s we!

⁴⁵ Ndi ngeela meeji ne muntu mulume kanà yònsò ewu mwikàle ne . . . anyi muntu mukaji, mwànà wa balume anyi wa bakaji. Ne ndi ngeela meeji ne, mu mmwenenu wa mamanya a mu mitu a cìdìbò badyambidila ne ki cìdì Díyì, ne bikwabo amu, kènàku mwa kupeta diimana dya pa cishimikidi mu kaabujima to pàdiye

kàyi mutuutakeene ne Bukênkè abu bùdì bùfikishà Dîyi adi ku cintu cya bushuwa.

⁴⁶ Ngeela meeji ne ekeleeziya nansha umwe mu byenzedi byèndè, nansha yêyè mufwànyine kwikala wa maalu a mu mutu ne mwitabi wa maalu mudiwu mafundiibwe bishi, yêyè ekeleeziya awu kèna mwa kutantaku to pàdì Citambe-mfukilu kaciyi cimànyishìibwe munkaci mwa cisàmbà aci, ne bàcimòna. Cintu kampanda cìdìbo mwa kwakula naaCi, cùikalà mwa kubàndamuna, ciikàle cìshìndika Dîyi difùnda edi.

⁴⁷ Mpindyewu vùlukàayi ne, Mòsà pàakatuuutakeenàye ne cipuka cya cilakuka kapya eci, Dîyi adi dyakashindikiibwa anu menemene. Dìvwa n'Dîyi. Kabyakakengela bwa ne Mòsà apampakane to ne: “Edi Dîyi ndya bwalu kaayi menemene? Ewu Kampanda udi apa ewu ki nganyi?” Bwalu, Nzambi ùkaavwa mumane kufunda mu Mifundu, mu Genese, ne: “Cisàmbà cyèbè necisombe mu buloba bwenyi ebu, kadi nebaalujiibwe paanyima pàà bidimu nkama yinaayi, nebaalukile cyakabidi mu dyòdì ditunga edi, bwalu bubi bwa—bwa beena Amòlà kî mbwanji kuula tente to.” Mpindyewu, nkama ne nkama ya bidimu kumpala, Nzambi ùkaavwa mwambe ne Izaleela ùvwa mwa kusòmbela mu ditunga dyenyi ne kukengeshiibwamu, ne kushàalamù munda mwa bidimu nkama yinaayi. Kadi Nzambi, ne cyanza cya bukole, ùvwa mwa kubapatula. Pa nanku, nudi numona's, ne cipuka cya cilakuka kapya eci. . .

⁴⁸ Mòsà ùvwa mumanye cyòci eci, mu mushindu wa mamanya a mu mutu. Ne dimiinu divwà dilediibwe munda mwèndè adi, divwa disanganyiibwa munda mwa mwoyi wèndè. Kadi yêyè kuteeta, ku dilabula dyèndè dya Dîyi ku mamanya a mu mutu, bwa kuteeta bwa—bwa—bwa kubapatula, bwa kubasungila, bwalu ùvwa mumanye ne yêyè ùvwa mulediibwe bwa kiipacila aku. Yêyè ùvwa mumanye cyòci aci, cikondo aci. Mifundu yònsò yìvwa yamba ne bôbò bàkaavwamù munda mwa bidimu nkama yinaayi.

⁴⁹ Anu mutùdì bamanyè mpindyewu emu, mùdì muntu munkonke kùkaadi katanci kakese, pa bìdì bitàngilà Dilwa ne Dyambwibwa. Twètù tudi bamanye. Tukàadi bajikike cikondo, bwa cikondo cya Dyambwibwa cyòci cikaadi pabwîpi, kadi tudi bindile diitabuuja dya Dyambwibwa didi mwa kusangisha Ekeleeziya pamwe ne kuMupeesha dikanda kampanda dya ditambe-mfukilu, didi mwa kushintulula mibidi yitùdì basòmbèlemù eyi. Patùdì tumona Nzambi udi mwa kujuula bafwe panshi anyi mu bulà mwamwa, ne ùmwaluja cyakabidi ku mwoyi ne ùmuleeja kumpala kwetu, patùdì tumona Nzambi udi mwa kuumusha kansere kàkaadi kakunyè muntu kamushìye anu mundidimbi kadi kumujuula e kumuvwija muntu wa makanda ne mubidi tumatuma, aci's bìvwa bikengela kupeesha bantu diitabuuja dya Dyambwibwa. Mu mushindu wa ne, pàateemà Bukênkè abu mu dyulu, ne pàadilà mpungi,

Mubidi wa Kilisto newusangishiibwe pamwe ne lukasa lwônsò, ne newushintuludiibwe mu katanci kakese ne newangaciibwe mu Maulu. Eyowa, bìdi bikengela bwa kwenzekaku cintu cya mushindu awu. Kadi bilongelu byetu bya teoloji kabyenaku byôbì mwa kupatula aci to, kadi pààbì's bidì anu bilenga bwa ku mamanya a mu mitu. Kadi bìdi bikengela bwa wêwê kutuutakeena ne Bukênkè abu! Bidi bikengela bwa wêwê kupeta Cintu kampanda aci.

⁵⁰ Nenu Mòsà kaaba aka, muteekele dibiikidiibwa dyèndè dinene adi pa Dîyì, ne dyôdì diine òwà dinene, mu mushindu wa ne dîngà dituku yêyè kutuutakeena ne bwine Bukênkè ebu, ki Dîyì dyena dîinà adi kumwandamunaDi. Dîbà adi kupetaye dilaabiibwa dyèndè adi. Aci kulaabaci cìwàye naaci mu yêyè, mu mushindu wa ne munda mwèndè amu, cya—cya mamanya a mu mutu cìwà cìcìtàbùùje aci, diitabuuja òwà ditèekela pa ngiitàbùùjìlù wèndè wa Nzambi, dyakamutapulula ne mamwèndè adi. Nenu paakafikaye mu Bwikadi bwa Bukênkè ebu, Bwakalaaba cìwàye mwitabuuje aci. Nwamonu anyi? Dilaabiibwa kaayi's we! Ki kutumiibwaye ne mudimu.

⁵¹ Mpindyewu, tudi bamanye ne, mu mushindu wa mamanya a mu mutu yêyè òwà muteeleje mamwèndè. Wàkamanya cìwà mwa kwenzeka, ne wàkamanya ne mu dituku adi mmùwàye ne mwoyi. Kadi apa wàkajandula ne yêyè òwà mupangile bwalu, pa nanku òwà mufwànyine kwikala... diitabuuja dyèndè òwà difwànyine kwikala dyalukile cyanyima ndambu. Kadi pashiishe paakafikaye ku cipuka aci, Nzambi wàkamba ne: “Ngùmù mbila ya cisàmbà Cyànyì, ne Ngàvùluku mulayi Wànyì kùdì baatatwàbò, Abraham, Izaka, ne Yakobo, nenu Mémè ndi mutuuluke.” “Mémè,” mwaba awu, mu—mupinganyi muleeji muntu, “Mémè ndi mutuuluke bwa kubasungila.”

⁵² Nenu mpindyewu, nenu swayiku bwa nsakidile anu eci cyanààna pìikalàbi ne cìdì. . . Nzambi amfwileku luse pìikalàci cimweka bu cìdì cinyangakaja cijila. “Ncyèna nkwaya mudimu pa buloba to, anu nkwayila mu muntu. Mémè—Mémè—Mémè ndi Mwonji wa mvinyo; nwènù nudi matamba. Ne Mémè ndi nDimanyisha anu pàNdi mwa kupeta muntu. Nenu Ndi mukusungule wêwè, ne Ndi nkutuma wêwè bwa kubapatula.” Nwamonu anyi? Monaayi mpindyewu: “Mémè nèngìikalè ne mukana mwèbè, ne Ndi . . . angata dikombo edi.”

⁵³ Ki Mòsà kwambaye ne: “Ndiku mwa kumona cileeji cya ne Wêwè ngwantuma, ne Udi mungeele maanyì, ne Wêwè ngwikala mwa kwenza bintu ebi anyi?”

Yêyè ne: “Cyûdì naaci mu cyaanza ncinyi?”

Yêyè ne: “Citupa cya mucu.”

Yêyè ne: “Cyèlè panshi.” Kwandamukaci nyoka. Kwasaye lubilu.

54 Yèyè ne: “Cyămbùlăku.” Kwandamukaci cyakabidi citupa cya mucu. Yèyè ne: “Teeka cyanza cyèbè mu cyâdi.” Dya ùcìpatula anyì, cikaavwa ne nsudi. Dya ùcìpingaja, cìvwa cyondopiibwe. Yèyè ne. . .

55 Yèyè kumona butumbi bwa Nzambi. Kakùcìvwa kabidi mpatà to, bwa Mòsà. Nukaavwaku bamone ne, yèyè kaakanyeemena kabidi mu cipeela anyi? Yèyè wàkamanya ne ùvwa mulaaba maanyì. Wàkamanya ne mpenyi, bintu byònsò bivwà mu mwoyi wèndè ebi, ngiikadilu minene milenga eyi, ne yèyè. . . byàkalaabiibwa mpindyewu. Yèyè—yèyè wàshàadi mudilongolole. Ùkaadi mudilongolole bwa kuya. Ki yèyè wawa ùpweka mutangile ku Ejiipitu.

56 Nzambi ùkaavwa mwambe ne: “Mémè nêngìikalè neebe,” pa nanku aci—aci’s cìdi cikosa bwalu. Pìikalàbi ne, “Mémè nêngìikalè neebe,” ki cyònsò cìvwa Mòsà ne cya kumanya. Bwa dibiikidiibwa dinene edi mu mwoyi wèndè, nenku mpindyewu Nzambi kwambaYe ne: “Mémè nêngìikalè neebe.”

57 Mpindyewu, Nzambi ùkaavwa kabidi mushindike èndè. . . mèyì a Mòsà. Dìyì dya Mòsà adi dya ne: “Ndi mutuutakeene ne Mukalenge. Ne Yèyè mmwambe bwa nnwāmbilè ne: ‘NDI’ mmuntume.” Nwamonu anyi?

58 Mpindyewu bôbò bàvwa bàmba ne: “Ki muntu nyèyè ewu, mukwabo mwena Yuda, pāmwāpa umwe wa ku bakoleshi bàà maalu bàtù bàlwa díbà dyònsò ne diyelè dya mishindu yònsò bwa kutupatula mu bupika aba.” Ne nutu bamanye anu mùtù bantu amu pādìbò bapika, anyì mu bupika bwa cintu kampanda, kùdi kùlwa misangu yònsò mwaba awu anu dijimbu dya mishindu kampanda, nudi bamanye’s, bwa kucyenza.

59 Pa nanku Mòsà, Nzambi kulayaYe Mòsà ne: “Mémè nêngìikalè neebe. Mémè nêngìikalè munda mwèbè. Mèyì Àanyi neikalè Mèyì èbè. Wèwè udi wamba Mèyì Àanyi ne wamba anu cìndì Mémè ngamba aci.”

60 Nenku mpindyewu pàakayà Mòsà ne kubapeeshaye dibiikila edi, ne kwimanaye kumpala kwa Pâlò, ne kumwambilaye ne: “Mukalenge Nzambi wa beena Ebelu mmwambe ne: ‘Patula bānā abu,’” ne yèyè kàyìkù muswe kubalekela baya to, ki yèyè—yèyè kwenza cimanyinu kampanda kumpala kwa bakulu ne kumpala kwa Pâlò. Ne bimanyinu bivwà Nzambi mwenze abi: Kwambaye ne: “Mpindyewu, mààlabà, patwamba kufika pa díbà edi, díbà nedibwele, nekwikalè mídímà mu Ejiipitu mujima,” ne byakenzeka anu menemene. Ki pashiishe kwambaye ne: “Nekulwe—nekulwe njiji pa—pa buloba,” nenku kwololaye dikombo dyèndè adi ne kubiikilaye njiji, ne njiji kulwayi. Ki kwambaye ciprofeta, ne byònsò bivwàye wamba mu ciprofeta bivwa byenzeka anu menemene mushindu awu. Ùvwa n’Nzambi. Nwamonu anyi?

61 Nzambi ùvwa mumubiikile kacya ku dilediibwa dyèndè, muteeke ngiikadilu kampanda munda mwèndè, ya diitabuuja dinene ayi, ne pashiishe kutuulukaYe ne Bwikadi Bwèndè ne kulaabaYe cintu cinène cìvwà munda mwèndè aci, ne kumutumaYe ne Diyì Dyèndè, ne yèyè ùvwa menemene mushindikiibwe mu bivwaye wàmba. Nansha byòbi ne kwakajuuka bàà mafi búngì munyi, nansha ne kwakenzeka bikwabo bintu ebi búngì munyi, Nzambi ùvwa wakwila ku . . . Mòsà wakashindikiibwa. Mòsà, cìvwà Mòsà wàmba aci, Nzambi ùvwa ùcìtwa mushinga. Mémè ndi muswe bwa ne kanùpukù Diyì adi mwoyi to. Cìvwà Mòsà wàmba aci, Nzambi ùvwa ùcìtwa mushinga, bwalu Diyì dya Nzambi òvwa munda mwa Mòsà. “Nèngiikalè ne mukana mwèbè; nemwàmbè bintu anu mu byòbi.” Mpindyewu, cìdì Nzambi wàmba aci—cìdì Nzambi wàmba aci, Yèyè ùdì ùcyàmbidila kùdì Mòsà, ne cìvwa cìjaadika ne cishindika mèyì èndè awu.

62 Kabidi, baakamulondela kùdì mamwèndè, bwa dilediibwa dyèndè òvwa kadiyi dyumvwika adi, ne mùkaavwà cikondo ciseemène pabwipi ne dìbà òvwàku ne cya kwenzeka disungidiibwa. Amram ne—ne Yoshèbèdà, mwànà wa balume wa Lewi ne wa bakaji, bààkabanga kulomba Nzambi bwa kutumaYe musungidyanganyi. Kadi bivwa bikengela . . . paùdì umona ne cikondo cya mulayi cìkaadi cyenda ciseemena, bwalu abu bùdì bùsàka bantu ku disambila ne dipeta nzala. Ne kakwena mpatà to ne—ne Yoshèbèdà, mamwèndè awu, ùkaavwa mumwambile misangu ne misangu; bu mùvwàbi kabidi ne, yèyè nguvwa ndeji wèndè, bu mutùdì bamanye bwalu bulonda abu. Ne yèyè ùvwa mumulondele mùvwàye musambile. “Nenku, wèwè Mòsà, pawàkalediibwà, mwanàanyi wa balume, uvwa mwànà uvwa mwakanyine. Uvwa wèwè mushiilangane. Kwakenzeka cintu kampanda ku dilediibwa dyèbè.”

63 Mvwa mufile dinaya kampanda bwa bânà pa bwalu abu, anu abidi adi panshi aa, mémè kwamba ne: “Pàvwà Amram mu cibambalu munkaci mwa kusambila, wàkamòna Mwanjelo ùtùùla mwele Wèndè ne uwufunkuna lwà ku Nord, wàmba ne: ‘Neupete mwànà, ne yèyè ngwàya ne bânà ku Nord ku buloba bulaya.’” Mwikàle mfilà dinaya bwa bânà bakese bwa baamona mwa kucyumvwa; bwalu abo meeji a mu mutu kî mmanji kubànda pa mwaba wùdì enu nwènù bakulampe to, bwa kumonabo mwa kuumvwa maalù mùdì Nyuma Mwimpè unubuulwilawu nwènù amu.

64 Mpindyewu, nansha mùvwàbi ne mamwèndè ùkaavwa mumane kumwambila maalù aa, ne yèyè mumanye cyòci eci, kadi nansha nanku yèyè bìvwakù anu bimukengela dimulenga dikwabo. Dilongesha adi—adi òvwa anu òvwa, kadi bivwa bimukengela dipetangana dya yèyè nkàayèndè.

65 Ki cìdì cìkèngelà bwa bàà pa buloba leelu ewu. Ki cìdì cìkèngelà bwa ekeleeziya leelu ewu. Ki cìdì cìkèngelà bwa

bantu bônso, bàdi bânà bàà balume ne bàà bakaji bàà Nzambi. Bwa kwikala cyôci aci, bìdi bikukengela dipetangana dya wêwê nkaayeebe, nwamonu's, Cintu kampanda. Nansha byôbi ne, udi mumanye ne Dìyì ndilelela, mumanye ne nDya cya bushuwa; kadi dîbà adi pàdîci cilenga, ne pashiishe wêwê umona cintu aci cyenzêke, dîbà adi udi umanya ne udi mu njila mujaalame. Nwamonu anyi? Nenku, tàngilàayi, neciikale misangu yônso anu cya mu Mifundu. Necikumbanangane anu menemene ne Mifundu, bwalu eci cyakakumbanangana.

⁶⁶ Disambila dya Amram òvwa dikumbanangane menemene anu ne Mifundu. Masambila àbò àvwa makumbanangane ne Dìyì dilaya. Nzambi òvwa mulaye bwa kucyenza mu cikondo ciine aci. Kusambilabo bwa bwalu abu, kadi ki mwànà mukùmbànyine kulediibwaye eku. Nenku bôbò . . .

⁶⁷ Tàngilàayi! Kaa, mushindu mwine wùndi munange eci's we! Nwamonu's, mu dîbà òvwa Pâlò ùshebeyondana ne bânà bônso, nwamonu's, ùbàpîcishila ku—ku mwele wa mvita, mwele wa mvita wa balami; bàvwa—bàvwa—bàvwa bawucimpika bânà bakese aba babashebeya, babelela ngandu yibadya, tuumibidi tukese atu, mu mushindu wa ne ngandu ayi yakadyundila pàmwāpa ku didya dya mibidi ya bânà bàà beena Ebelu abu ayi. Kadi Bible mmwambe, ne: “Baledi abu kabàakaciina dîyì dituma dya Pâlò bwa kushebeya bânà to.” To. Kabàakapeta bwôwà to, bwalu baakamona cintu kampanda mu mwànà ewu, twamb'eku twamb'eku. Baakacimona, ne eci ki cìvwa dyandamuna ku disambila.

⁶⁸ Nenku Mòsà òvwa ne biine byônso ebi bu nshindameenu kampanda, pa nanku Mòsà wàkamòna ne òvwa mutumiibwe bwa kiipacila mene kàà kusungila bânà bàà Izaleela.

⁶⁹ Nwamonu's, nshindameenu yônso awu kadi kuungwilaye anu mushiki's. Paùdi upeta cintu kampanda, mwikàle mwa kusangana Bible wamba, ne: “*Cikampanda* neciikale mwa kwenzeka,” kadi ki cyôci eci cyenzeka; “ne *cikansanga* neciikalèku mu cikondo aci,” ki cyôci eci cyenzeka; “ne *cikankenga* neciikalèku mu cikondo cisunguluke cyacya,” ki cyôci aci cyenzeka; pashiishe byônso byungwila mushiki ne bituzolela cimfwànyì kampanda.

⁷⁰ Kaa, mushindu mwine wùdi tabernacle ewu mu dinda emu, mushindu mwine wutùdi twètù bantu bàà dîbà edi aba, Mwaneetu Neville, patùdi tumona mvya yenda yitòloka mu nsuki, ne makaaya etu enda akobama, patùdi tumona buloba bwenda bwenza kanjingambàlà ne butankakana mùdibu bwenza emu, ne mutùdi mwa kuzenzakana eku ne eku biikàle tumona mulayi wenda wuseemena! Cìdi, cyôci . . . Ntu ndyambidila, misangu yàbùngì ne, bu muntu mwa kutupika kubwelaMu anu dyakamwe, ne kàyi mufwànyine kuCyumvwa to, anyi mufwànyine kuCyumvwa's we, ne

kubwelaMu dyakamwe, s'ncifwànyine kwamba kukutuma mu Cyendèlèèlè, anu ne cintu kampanda cya mushindu awu cya cikutùma mu Dyambwibwa! Ne muntu yêyè kàyikù mudyanjile kucimanya to, kadi anu, kaa, kubwela anu cyanàànà mu bintu bitùdi bamone ne bamanye ne bumvwe ebi, kadi kubwelamu anu dyakamwe. Mulume, anyi mukaji, nsongààlùmè, anyi nsongààkàjì, mmufwànyine pàmwàpa anu kwela byanza byende muulu cyanàànà kadi kwamba ne: “Tuyaaku, Mukalenge Yesu,” nudi numona's. Kaa, mushindu mwine wùkaadi dîbà ditambe kuseemena's we!

⁷¹ Mòsà mumanye ne yêyè ùvwa mulediibwe bwa kiipacila aku, ki kutangidilaye pa madidiishi ne kubandilaye mùvwà beena Ebelu abu bàyooba; wàluja dîsù mu Mifundu emu, bambe ne: “Ne bôbò nebasombelemu munda mwa bidimu nkama yinaayi,” nwamonu's, “kadi Mèmè nêmbàpàtùlè ne cyanza cya bukole.” Pashiishe pàdìye walukila, paanyima pàà mudimu mumutuma naawu, mwela maanyi, mumanye ne yêyè ùvwa mulediibwe. . . Nenku diitabuujà dyèndè kutangiladi, ku diitabuujà yêyè kumona bantu abu ne kumanyaye ne bàvwa bânà bàà Nzambi, bwalu buloba. . . Dîyì di—dìvwa dyambe nanku. Bôbò kabàvwa bàà pa buloba to, ne kabàvwa bu bakwabo bônso to. Bàvwa bashiilangane. Ne bàvwa bantu bàà meeji makonyangale ne bakoleshi bàà maalu, bwa—bwa dibàlakana ditumbuke dya Ejiipitu adi; kadi yêyè nyewu uvwa ne mmwànà wa balume wa Pâlò, mwikale ne cya kwangataye bukalenge abu, paanyima pende. Kadi, yêyè, kùvwa cintu kampanda munda mwèndè amu, diitabuujà dya—dya cya bushuwa divwà dyòdi kadiyi ditangila ku biine bintu abi to, dibàlakana diine divwàye mwa kupyana adi. Yêyè wàkatàngila ku mulayi wa Nzambi, ne wàkamanya ne cikondo cikaavwa cyenda ciseemena. Nenku ciine cìvwà muntu awu ne cya kwikala mwelele meeji's we!

⁷² Ndi muswe bwa ngàkulanganakù nendè pa bwalu abu, dîngà dituku, pângààtwilanganà nendè dyamwamwa. Wèwè udi wamba ne: “S'mmukupa's, mwaneetu!” To, kî ngwòwò to. Nèngìkalè mwa kutwilangana nendè, ku ngàsà wa Nzambi. Eyowa's, mukalenge. Nènyiikilè nendè, dîngà dituku, Mòsà yêyè mwine. Ne mushindu mwine wùndi njingakù kutwela nkonko's, anu mushindu mwine ùvwabi, paakamonaye didilongolola dyèndè adi!

⁷³ Mushindu mwine wa dilubakana adi, dyabulu mwikàle wàmba ne: “Ha, bantu kabaakukwitabuujaku to. Huh-uh. Kakwenaku—kakwenaku bwa nsongo ku ciine aci to.”

⁷⁴ Kadi dimiinu adi paakalwadi ku Mwoyi kuntwaku, cintu kampanda cyàkamulenga, ne wàkamanya ne kùvwa cintu kampanda cìvwa ne cya kwenzeka. Yêyè wàkamanya. Wàkatàngila ku—ku ntanku ne wàkamòna ne cikaavwa dîbà kaayi, nenku kumanyaye, ne mushindu mwine wùvwàye ne cya kwikala mwelangane meeji paakatangilaye apu's.

Mpindyewu paakacitwangajaye cyônsò eci, cintu cyônsò cinène cyakamonaye eci; cikondo cya Mifundu, disambila dya mamwëndè ne tatwëndè, ne mùvwàye mulediibwe dilediibwa dya pabwàdì, mwànà wa pabwëndè. Nenku, dībà dyônsò adi, kùvwa anu cintu kampanda munda mwëndè amu.

⁷⁵ Nenku mpindyewu yèyè kudifinda kuya ne kuteeta kwela meeji ne ùvwakù mufwànyine kwangata dilonga dyèndè dya busalaayi dya ku tulaasa twèndè adi, bwa kusungilaye bânà abu, kadi aci kupangilaci.

⁷⁶ Pashiishe kuyaye mu cipeela ne kuyaye kasela nsongàakàjì kampanda mulenga kwisù wa—wa beena Etyòpà, nenku kulelabo mwànà mukese wa balume dīnà dyèndè Ngeelèshòmà.

⁷⁷ Kadi dīngà dituku pàvwàye ùlama cisumbu cya mikooko, dyakamwe kumonaye kaacipuka kalakuka kapyà pa lusongo lwa mukuna, munkaci mwa kulakuka kapyà. Ki kubàndayè kuntwaku. Nenku kaciyi meeji a mu mutu to, kaciyi didifwanyikijila kampanda—kampanda to, kaciyi cintu cya mafi, lumònò lwa ne mèsù bitaayitaayi to, kadi munda mwèndè. . . Ki Nzambi wa Abraham n'Yèyè awu, mu Bukènkè kampanda, Dikunji dya Kapyà mu kaacipuka mwamwa, Kapyà aku, byenze bu mavwala munkaci mwa kupatuka, kadi kakàyi kenzaku kaacipuka aku cintu to. Ki Dìyì dya mu Mifundu adi, Dìyì dya Nzambi, kwakwilaDi mwòmò amu, dyàmba ne: “Ndi mukusungule wèwè. Wèwè ki muntu mwine awu udi ukengela. Ndi mukujuule mbwà kiipacila aka. Ndi nkujaadikila kaaba aka, ku bimanyinu ne, uyààya kasungila bânà bwalu bidi bikengela bwa Dìyì Dyànyì dyùlè.”

⁷⁸ Kaa, bikengela bwa Dìyì Dyèndè dya dituku edi dyùlè. Tudi ne mwoyi mu dībà adi. Cìdì ní nganyì ní nganyì mukwabo wàmba nansha ciikàle cinyi, bìdì bikengela bwa Dìyì dyùlè. Maulu ne buloba nebijimine, kadi bwa Dìyì Dyèndè to.

⁷⁹ Mpindyewu, pàakatwàngajà Mòsà byônsò ebi, ne mumone ku luseke ne luseke lwônsò, kulaabaci diitabuuja dyèndè maanyì. Amen! Kaa, ekelekele! Meeji kaayi's we! Eci, nkaayaaci, cyòci nkaayaaci cimone Mufundu wufunkuna buludi ku civwàci, ne dyakula dya Nzambi, ne cileeeji cyàcì mwab'awu, cyakalaaba maanyì ku civwàye naaci bu diitabuuja munda mwèndè aci, bwa kuya kaditwaye mu mudimu.

⁸⁰ Bìvwa bikengela bwa kutwenzelaci twètù aba cinyi? Bidi bitukengela kanyinganyinga. Bìdì bitukengela ditabuluja. Ndi ngamba bwànyì mèmè mwine. Nwamonu anyi? Bidi binkengela dinyukushiibwa. Bìdì binkengela cintu kampanda. Ngàmbi ne mvwa munkaci mwa kudyambidila mèmè mwine mu dinda emu, anyì kwamba bwànyì mèmè. Mèmè—mèmè—mèmè bidi binkengela ditabuluja kampanda—kampanda.

⁸¹ Nenku pândì ngeela meeji ku cileeeji cinène aci, bintu byônsò byadija kwaka mu mushindu mupwangane, nenku ki kulaabaci

diitabuuja dya Mòsà maanyi's. Nenku, ekelekele, kumonaye ne kakùvwakù cintu nansha cimwe. . .

⁸² Ki yêyè ewu, kunyeemaye mu Ejiipitu, pààbì, mu bushuwa bwa bwalu, yêyè nunku's mmubange bu—buntomboji anyi cintu kampanda, ne ùvwa mwa kwikala—ùvwa mwa kwikala mukutule mvita ya ditombokela ditunga mu Ejiipitu amu, ne mufwànyine kwikala mwangate cilwilu kampanda ne mukutule mvita, kadi, nudi numona's, wa bwalu yêyè ùvwa ne binunu byàbùngì ku luseke lwèndè. Kadi pamutu pàà cyôcì aci, kuciinaye mene ne bwa kwenza aci, pèndè ne bilwilu ku luseke lwèndè.

⁸³ Kadi mpindyewu ki yêyè udi walukila ewu, paanyima pàà bidimu makumi anaayi, mwikàle ùkaadi ne bidimu makumi mwandamukulu, mwikàle anu ne citupa cya mucu mu cyanza. Bwa cinyi? Cìvwà cilakuka kapyà munda mwa mwoyi wèndè aci cyakalwa cintu cya bushuwa. Dìbà adi yêyè wàkeediibwa maanyi, ne wàkamanya ne ùvwa ne EMU MMÛDÌ MUKALENGE WAMBÀ. Bwa mpindyewu kakùvwakù cintu nansha cimwe cìvwà mwa kumwimanyika to. Kabìvwà bimukengela cilwilu nansha cimwe to. Nzambi ùvwa nèndè. Ki cyònsò cìvwà cimukengela ncyôcì aci: Nzambi mwikàle nèndè.

⁸⁴ Kaa, paùdì mumanye ne Nzambi mmukutume bwa kwenza cintu kampanda, ne wèwè ucimona munkaci mwa kukwata mudimu mwaba awu, kakwenaku—kakwenaku cintu nansha cimwe cìdì mwa kwangata kaaba kààcì to. Kwajiki.

⁸⁵ Ndi mvuluka misangu yìvwà Mukalenge ungambila bwa bintu kampanda bìvwà mwa kwenzeka, ne pashiishe nya nkabisangana biteeka mwab'awu, mushindu. . . Kaa, njiyà kaayi's we! Maalu àkaadi mu bukontononyi, kwajiki, nwamonu's, bwalu Nzambi mmwambe nanku.

⁸⁶ Ndi muvuluke, bààbùngì bàà kunùdì mbavuluke, bwalu bwa mwànà mukese wa balume uvwa mubiishiibwe ku lufu mu Finlande awu, ne dìbà adi ku bafwe, mushipa kùdì mashinyi. Nenku mvwa mwimane mwab'awu kumpenga kwa cibeeba, ne kubanga kuumuka mwaba wùvwà mwànà awu awu, ne mèmè kukudimuka ne kutangila paanyima. Ki Cintu kampanda kunteeka Ci cyanza pa dikaaya, kadi mèmè kwela meeji ne ùvwa m'Mwaneetu Moore, muntu nansha umwe kàyi pabwìpì naanyi apu to. Ki mèmè kutangila paanyima, ne pashiishe kutangila kuulu kwa mukuna wùmvwà mumone. Mèmè kwamba ne: "Ee, s'nkaadiku mumone kakuna kaka mu mwaba kampanda's, kadi twètù katwènakù bavwile njila ewu to. Tuvwa bavwile njila mukwabo. Kakuna kaka kàdì penyi?"

⁸⁷ Ki mèmè kutangila ne kumona kashinyi aku mwaba awu, kenze njiwu; kumona mwànà mukese wa balume awu mwaba awu mwikàle ne ntanyi wèndè. . . mulààdika mwaba awu ne—ne nsuki myenze bu mikosa cisuba, mutùdì bafwànyine kucibiikila

muneemu. Mèsù àvwa makudimuke maye paanyima, mùvwà a Mwaneetu Way dituku adi pàvwàye mudishinde apu. Ne kakàsà kakese katùbùle lushesheete kapàtùke, mùvwà tukòlò twèndè tukese atu tucibùke. Ne mashi bimupatukila mu mèsù, ne mu dyùlù, ne mu maci. Ne mèmè kumona kapanu kèndè kakese, kàà kípì aku; ne kakwàcisha ne mbota, kèndè, *apa* ne ku luseke lwa kafùkà kèndè kakese aku; ne tunshesheete twèndè tukese twa tufikè ne mu cifùkà atu tubànde, byenze bu nshesheete ya mile yitùvwà tuvwala kùkaadi bidimu byàbùngì ayi.

⁸⁸ Ki mèmè kukenzakana, nenku mbyabi bìvwa menemene, anu menemene mushindu wùvwà Nyuma Mwímpè mungambile bidimu bibidi kumpala awu, panwakacifunda nwènù bònsò mu Bibles yenu mu ditunga dijima, bwa ne cìvwa mwa kwenzeka apu. Kaa, mwab'awu, dìbà adi, maalù àdi mu cyanza. Nansha byòbì ne yèyè mmufwe mushindu kaayi, cìdì nì nganyì nì nganyì mukwabo wàmba nansha ciikàle cinyi, bwalu mbumanè kutuuka. Bùdìye naabu mbwà kwalukila!

⁸⁹ Mèmè kwamba ne: “Mwànà ewu yèyè kàyi mubiike ku lufu elu to, dìbà adi mèmè ndi muprofeta wa mashimi, ndi muleeji wa mpala wa mashimi wa Nzambi. Bwalu, mèmè kwetu, kùkaadi bidimu bibidi, Yèyè úvwa mungambile ne cyòcì eci cìvwa mwa kwenzeka. Ne mwab'awu bambi aba, ne bònsò, ncifundiibwe pa dibeji dya munda mutupu dya Bible wetu, s'ki cyòcì eci anu menemene. Nùcibalàayi pa dibeji dya munda mutupu dya mukanda apu, mùvwàbi mwa 'kwikala mu citupa kampanda cya buloba, mwikàle mbwebwe myenze cyàtà, ne bikwabo, ùshipiibwa, ne pa...mwikàle ku luseke lwa dyabalume dya cìbeeba.” Mèmè kwamba ne: “S'ki cyòcì aci. Cintu nansha cimwe kacyena mwa kucipangishaku to. Maalu àkaadi mu bukontononyi.”

⁹⁰ Diitabuuja òvwà mu mwoyi wànyì dyakalaabiibwa. Kaa, bu mèmè nanshà mwa kuumvwija cyòcì aci's we! Diitabuuja òvwà Nzambi...dìmvwà naadi mu Nzambi adi, òvwà dingambile, ne kacya kadiyikù dipangile adi, kungambiladi ne: “Maalu adi mu bukontononyi mpindyewu. S'ki cyòcì eci menemene cìmvwà mukuleeje kùkaadi bidimu bibidi, s'ki cyòcì eci citeekiibwe anu menemene mu bulongame. Cintu cimwepele cìdì cìkèngelà bwa wèwè kwenza nkwbama dìyì.” Nenku ki mwànà mukese wa balume awu kubiikaye ku bafwe. Nwamonu anyì?

⁹¹ Mvwa munkaci mwa kwela meeji, ne ntangija mèsù paanyima kùdì Mwaneetu Fred Sothmann udi musòmbe pààpa wawa, ne kùdì Mwaneetu Banks Wood ne bakwabo. Dituku dikwabo, mwamwa mu—mu Cibeeba cya Alaska, mushindu mwine wùngààkiimanà kaaba aka mu ekeleeziya emu ne mèmè kunulondela nwènù bònsò bwa nyama kampanda uvwa ne mmwenekelu wa nsengu ya kashà, ya bule bwa centimètres lukama ne yisambombo, ne ours munene wa Iwonji mufiikuluke wa cisengàsengà. Kacya ncìvwakù mwanji kufika kuntwaku

kumpala to, kadi mushindu mwine wùvwà...wùmvwà mwa kupeta yêyè ewu, ne mùvwàye mwa kwikala, ne bùngì bwa bantu bàvwà mwa kwikala naanyì, ne bilàmbà bìvwàbo mwa kwikala bavwale. Nudi bacimanye, yònsò wa kunùdì, mbingu ne mbingu kumpala kwa kwenzekaci.

⁹² Nenu mwaba awu pàngàakabwelàmu, ncìyi mucimanye to, ki nyama nyêyè awu mwikàlepù. Ki mêmè kuya, nenu—nenu yêyè. . . cìvwa ncintu cya kaciyikù mwa kwenzeka to. Bu cilembi kampanda mwa kumanya, anyì bu yêyè mwa kuteeleja mukaba wa mêyi ewu, mùdì kùyikù mwa kuseemena kumpala kwa nyama kampanda, yêyè mufwànyìne kajuuka e kudyela lubilu. Kadi yêyè kaakajuukaku to.

⁹³ Nenu's ki yêyè udi mukùdika mu cibambalu cyànyì cya mudimu wawa. Kì ours munene wa lwonji wa cisengàsengà udi mukùdika wawa, anu menemene mushindu wùvwàbi. Ne—ne kaludiki kateekapu, ne mètre wa dipima nendè, bwa kuleeja menemene bule bwèndè. Ne lusengu pààlù lùtu lùfwatalala ne centimètres itaanu anyì bipite apu, kuumukila pàcidilu lubishi pambidi pàà nyama too ne pàdilu lùuma, kadi elu lwólò kalwàkafwatalalakù to. Lùcidi lwólò anu menemene ne centimètres lukama ne yisambombo. Nwamonu anyi? Kì ours munene wa lwonji wa cisengàsengà udi mulaale wawa, udi bule bwa mètres abidi, anu mu byòbì menemene, ne byònsò anu menemene mushindu wùvwàbi, mmiteeka mwaba awu patùdì twakulangana apa.

⁹⁴ Kadi muntu ewu paakangambilaye ne: “Mpindyewu, tangila, Mwaneetu Branham, nyewu tudi ne nyama ewu úvwà mwambe, kadi wêwè's uvwa mungambile ne uvwa mwa kukwata ours munene wa lwonji wa cisengàsengà awu kumpala kwa wêwè kufika kwìnshi kwa kakuna, mwaba wùdì nsongàalùmè yàya wawa, udi ne muteelu wa màyi a matamba wawa.”

⁹⁵ Mêmè kwamba ne: “Cìdi ng'EMU MMÙDÌ MUKALENGÈ WÀMBA. Kì mùdì Nzambi mwambe.”

⁹⁶ “Kadi, Mwaneetu Branham,” mwakambaye, “mêmè's ndi mwa kumona pabwipi ne bintu byònsò kaaba aka, too ne mu ntanta wa maakilòmèètà, kamwena cintu nansha cimwe to. Yêyè awu neafumine penyi?”

⁹⁷ Mêmè kwamba ne: “Abu kì mbwalu bwànyì mêmè bwa kwela mpatà to. Nzambi ngudi mwambe nanku! Ne Yêyè ùdi Yehowah-Yile. Yêyè's ùdi mwa kutwala ours mwaba wawa. Yêyè mmufwànyìne kumuteeka mwaba wawa.” Kì Pèndè ùmba umuteeka's. Nenu's ki yêyè awu. Mmaalu mu bukontononyi.

⁹⁸ Nenu pàakamònà Mòsà ne yêyè wakajuudiibwa bwa kiipacila aku, ne yêyè wakatwilangana cìmònààmèèsù, ne Nzambi munene ewu Úvwà mwenze dibiikila adi, ne mumwele maanyì ne mumumanyishe awu, ne mwambe ne: “Edi ki dibiikidiibwa dyèbè, wêwè Mòsà. Ndi nkutuma wêwè, ne

Nêngiikalè mwa kukuleeja butumbi Bwànyì. Nenku’s ki Mémè ewu, mu cipuka, ciikàlè cilakuka kapyà. Nda kuntwaku! Mémè Nêngiikalè neebe.” Kabìvwà mene bikengela bwa kwikalaye ne citupa cya mucì to. Yèyè ùvwà ne Dìyì, Dìyì dishìndika, nenku’s ki yèyè uyààya wawa. Kulaabaci diitabuuja dìvwà munda mwèndè adi maanyì.

⁹⁹ Ne cìdi citulaaba twètù patùdi tumona ne tudi ne mwoyi mu matuku a ndekeelu, bwa kujandula ne bimanyinu byònsò bitùdi tumona byènzeka ebi, bìdi byambiibwe mu Mifundu ebi, bìvwà ne cya kwenzeka mu matuku a ndekeelu; kuumukila anu mu Dyulu, too ne ku makole a cidiidi, ne ngiikadilu wa bantu, ne dinyangakaja dya nsòmbelu dya bàà pa buloba, ne munkaci mwa bantu bakaji, ne mùvwàbo mwa kwenza mu matuku a ndekeelu, ne mùvwà bantu balume mwa kwenza, ne mùvwà maekeleeziya mwa kwenza, mùvwà matunga mwa kwenza, ne mùvwà Nzambi mwa kwenza. Ne tudi tubimona byònsò byadija kaaba aka kumpala kwetu mene.

¹⁰⁰ Kaa, s’cidi cilaaba maanyì ku diitabuuja dyetu. Cìdi citupatula mu bijengu binène. Nwamonu anyì? Cìdi—cìdi—cìdi citutapulula ne bikwabo bintu bya pa buloba. Nwamonu anyì? Nansha twètù biikàlè bakese bàà mushindu kaayi, anyì nansha twètù banyààbanyà mushindu kaayi, nansha bàtùseka mushindu kaayi, bàtwèlulwila, kabyena bishintulula cintu nansha cikese to. Kwajiki. Twètù tudi tucimona. Kùdi cintu kampana munda mwetu. Tuvwa badyànjila-kulongolola bwa kumona dìbà edi, ne kakwena cintu nansha cimwe ciikalà mwa kutupangisha bwa kucimona to. Amen! S’ki Nzambi udi mucyàmbè ewu. Cikaadi—cikaadi cimane kwenzeka. Twètù tudi tucimona. Kaa, mushindu mwine wutùdi twela Nzambi twasakidila bwa ciine eci’s we! Kaa, dìbà adi, cìdi cileeja diitabuuja dyèbè patùdi tumona bintu ebi byènzeka kaaba aka.

¹⁰¹ Mpindyewu, s’ki twètù aba tucibala cyakabidi ne: “Mòsà wakabala bundu bwa Kilisto bu mabanji manene kutamba bintu bya musinga bya Ejiipitu.” Mpindyewu, yèyè wàkabala bundu bwa—bwa Kilisto.

¹⁰² Mpindyewu vùlukààyi, “bundu bwa Kilisto.” Nwamonu’s, kùtu bundu mu dikwacila dya Kilisto mudimu. Wèwè mwikàlè mutambe kunangiibwa kùdi bàà pa buloba, dìbà adi kwèna mwa kukwata mudimu, kwèna mu dikwacila dya Kilisto mudimu to. To, kwèna mwa kucyenza to. Bwalu, nudi numona’s, kùdi bundu bùdi bulamateKù. Bàà pa buloba bàtu misangu yònsò anu beelulwila.

¹⁰³ Kalekale wawa, kùkaadi binunu bya bidimu, kùvwà bundu bùvwà bulamateKù. Nenku Mòsà uvwa ne cya kwikala pâlò, yèyè nguvwa pâlò uvwa ulonda, mwànà wa balume wa Pâlò. Ne yèyè nguvwa ulwa pâlò uvwa ulonda, mwikàlè ne dyanyishiibwa munkaci mwa bantu, kadi nansha nanku “yèyè wàkatàngila . . .”

Kubala mbwena kwamba ne—ne “kutangila.” “Yéyè wàkatàngila bundu bwa Kilisto bu bintu binène kutamba byònsò bivwà Ejiipitu mwa kumupeesha abi.” Ejiipitu ùvwa mu byanza byèndè. Kadi, nansha nanku, yéyè ùvwa mumanye ne kulonda njila wa Kilisto kùvwa mbundu, kadi ùvwa ne disanka dīngì dya kumanya ne kùvwa cintu kampanda munda mwèndè, cìvwà cimufikishe ku ditangila diseemena dya Kilisto edi, bundu bwa Kilisto’s we, bu bunene kutamba dibàlakana dyònsò òvwa yéyè—yéyè mupyane adi. Yéyè ùvwa ne bumpyànyì munda mwèndè bùvwa bunene kutamba kule ne kule cìvwà bumpyànyì bwa pambelu bumupeshe aci.

104 Kaa, twètù aba twìkalapù mushindu awu leelu ewu, biikàle tulekelaku Nyuma Mwimpè ùlaaba maanyì ku citùdì naaci munda mwetu aci’s we, diitabuuja adi, bwa nsòmbelu wa difwana dya Nzambi, mulàmbula kùdì Kilisto!

105 Mpindyewu, ne diitabuuja dya bwena òvwa naadi yéyè edi, yéyè wàkamòna, ne wàkatàngila bundu abu bu ne nduumù.

106 Leelu ewu, muntu kampanda udi mwa kwamba ne: “É, wèwè ewu udi umwe wa ku bantu bàba anyì, bàba naka?”

“Uh, uh, ee, uh.” Wèwè’s udi anu ne bundu bwàcì ndambu.

107 Kadi yéyè wàkacitàngila bu ne ncinène kutamba buloba bujima, bwalu kùvwa cintu kampanda munda mwèndè cìvwàye mufwànyine kwakula ne òvwa dikole kwamba ne: “Eyowa, mèmè—mèmè ndi ntangila *eci*. *Eci* ncìdì cipeebwe luumu lutambidile. Mèmè ndi ne disanka dya kwikala umwe wabo.” Nwamonu anyì? “Ndi ne disanka dya kudibala mèmè mwine bu mwena Ebelu ne ncìyì mwena Ejiipitu to.”

108 Bivwa bikengela bwa beena Kilisto leelu ewu kwikalabo bàmba cintu cimwecimwe aci. “Ndi ne disanka dya kuditangila mèmè mwine bu mwena Kilisto, bwa kudikanda ku maalu a pa buloba ne ndongolwelu wa buloba. Ncìyì anu cidimba cya ekeleeziya cyanààna to, kadi mwena Kilisto mulediibwe cyakabidi udi ne nsòmbelu bilondeshile Mifundu. Nansha byòbì ne, ndi mubiikidiibwe, nansha mene kùdì bidimba bya ekeleeziya ne, ‘mukoleshi wa maalu,’ nansha nanku ndi—ndi—ndi mbala aci bu ne ncintu cinène kutamba—kutamba cya bu ne mwana muntu mutambe kumanyika mu cimenga eci anyì mu ditunga edi. Bivwa bitambe bwimpè bwa mèmè kwikala aci pamutu pàà kwikala Mfumu wa ditunga dya États-Unis, anyì—anyì mfumu wa buloba. Nudi numona anyì? Mèmè—mèmè ndi mbala aci bu ne cidì kuulu menemene, bwalu Nzambi mu luse Lwèndè, kumpala kwa difukà dya dyulu ne buloba—buloba, wàkammòna mèmè, ne—ne wàkatèeka kaadimiinu kakese munda amu, bwa diitabuuja dyànyì dyamona mwa kubuuka kumutu kwa maalu a pa buloba aa. Nenku mpindyewu Yéyè wàmbiikidi, nenku ndi—ndi ntangila mwaba wànyì.”

109 Bu mwàkambà Pòlò ne, yéyè wàkatàngila mudimu wèndè bu mutumbuke. . .nwamonu's, nenku, kaa, bwa ne Nzambi wàkamubiikila bwa kiikadi mulongeshi munene bu Gàmaliele to. Kadi Pòlò wàkabiikidiibwa bwa kwikalaye mulambu bwa Kilisto. Nwamonu anyi? Mpindyewu ncintu cimwecimwe aci.

110 Monaayi ne, ne diitabuuja bu nanku, kacya kàvwakù yéyè mweyemene dimòná dyèndè to, civwàye mufwànyine kumona aci. Mpindyewu, yéyè kaakamone cingà cintu kuntwaku to anu musùmbà wa—wa bantu bàdi anu bàlenga bitoci, bapika, mu buloko, bàbàshipa dituku dyònsò, bàbèèla mfimbù, bàbèèlulwila, ku ngiitábùùjilù wa wabò ntendeleelu ne, bàvwa “bakoleshi bàà maalu.” Ne kùvwa pàlò kampanda musòmbè pa nkwasà wa butumbi, uvwa kàyi mumanye anyi kàyi ùtanga ní ncinyi ní ncinyi cya wabò ntendeleelu to. Kàvwakù yéyè ne civwàye mumanye pa bwalu abu to. Yéyè ùvwa mumpangaanu, pa nanku yéyè ùvwa anu. . .Cimfwànyì kaayi cya leelu ewu's we! Nenku ki cyòci aci, ntendeleelu mushiilangane. Ne mushindu mwine wùvwàbi bu ne—bu ne Mòsà ewu, pèndè mu nkwasà mwine pamwe ne mfumu wa ditunga, anyi—anyì muntu munene awu, Pàlò, bwa kumupinganaye dya lufu lwèndè, bu mùkaavwàye muntu mununu. Kadi nansha nanku Mòsà wàkadyàmbidila ne dibiikidiibwa adi. . .Yéyè kutangila pambelu apu, pa dididiishi dimwedimwe divwà Pàlò utangidila pèndè adi, bwalu yéyè ùvwa ùsanganyiibwa mu nzubu mwèndè.

111 Ki Pàlò kutangila pambelu e kumonaye bantu bàvwà beele byanza muulu abu, nenku biikàle bangata mfimbu babeela too ne mùvwàbò bàfwa ne bwalu bàvwà bàsambila. Bàvwa babacimpika mwele wa mvita mu myoyi, bwalu bàvwa mene bàpanga kutumikila, díbà kanà dyònsò, ne bàbènzeja midimu too ne mùvwà tuumibidi twabo tukese tukulakaji atu tudishinda panshi, ne babapeesha tuubyakudya twa kabàyikù buukuta to. “Ee, bòbò kabàvwakù cingà cintu to anu musùmbà wa bakoleshi bàà maalu, kabàyikù bantu mene to.”

112 Kadi pààbì Mòsà, diitabuuja adi munda mwèndè, ùvwa yéyè ubatangila, wàmba ne: “Ncisàmbà cibeneshiibwe cya Nzambi.” Amen. Mémè ntu munange aci. Ne diitabuuja bu nanku, èndè mèsù kaàkatwishilakù pa dibàlakana dya Ejiipitu adi to, àkatwishila ówò pa mulayi wa Nzambi. Dìsù dyèndè dya mukanku dya diitabuuja adi divwa dimòna dyamwamwa dya dibàlakana dya Ejiipitu. Yéyè, vùlukàayi ne, ùkaadi wènda ùshààla mukanku mpindyewu. Yéyè mmuprofeta, ne dìsù dyèndè dya mukanku adi didi dibànda kumutu kwa bintu abi. Kaa, mushindu mwine wùndì mémè munange aci's we! Huh! Ekelekele!

113 Mushindu mwine wùdìbi misangu yàbùngì leelu ewu, leelu ewu, beena Kilisto bèyemena pa byumvwilu byabo, ne pa bidìbo mwa kumona, anyi bidìbo mwa kuumvwa, pamutu pàà diitabuuja dyabo, bwa kweyemena byùdì umona ne dìsù dyèbè

ne dibàlakana abi. Bu munùdi nwênù bantu bakaji, ntu anu misangu yònsò nnwelela mbila, bwa ne nudi ne cya kulekela nsuki yenu yileepa, bwa ne kanwena ne cya kudilaaba bilaabu bya kwìsù, nudi ne cya kwikala nwenza maalu bu bainábànzà ne beena Kilisto. Nudi nutangila pambelu mu mùsèèsù numona bantu bakaji leelu bavwàle mvwadilu wa masandi, ee, nudi nudyàmbidila ne: “Ee, mukaji awu’s ùtu wa mu ekeleeziya, mèmè ncyèna mwa kwenza cyôci aci bwa cinyi?” Nwamonu anyi? “Ne yèyè’s ùtu ùkòsa nsuki yèndè, bwa cinyi—bwa cinyi mèmè ncyèna mwa kwenza nanku? Ee, yèyè’s ùdi ne mmwenekelu anu wa kalolo ne wa mamanya a mu mutu, ne buumùntù bùndìku mèmè ewu ncìyikù mene naabu to. Ee, mèmè ncyèna mwa kwenza cyôci aci bwa cinyi? S’bìvwa bikengela bwa mèmè kucyenza.” Paùdi wenza cyôci aci, s’udi ucìbwila diitabuuja dyèbè panshi. Nwamonu anyi? Kwèna upeesha diitabuuja dyèbè mpùngà bwa kukoladi to. Bangilà pa cyôci aci, anu bu mùnkàdi mwambàmbe.

114 Muntu kampanda ùvwa wàmba ne: “Mwaneetu Branham, ditunga, bantu, s’bàtu bakwangata wèwè ewu bu muprofeta. Kabìvwa bikengela bwa wèwè kwikala utandisha bantu bakaji mushindu awu to, ne bantu balume, bwa bintu ebi. Wèwè, bìvwa bikengela kubalongesha mwa—mwa kwamba biprofeta ne kupeta mapà.”

115 Mèmè kwamba ne: “Mmunyi mùndi mwa kubalongesha makumi makole pàdìbo kabàyikù bamanye nansha ABC yabo?” Nwamonu anyi?

116 Mpindyewu anji bangila pa cyôci aci. Anji kudisukula mu mushindu wa ne paùdi upàtuka mu mùsèèsù wikalèku ne mmwenekelu wa mwena Kilisto’s, twamb’eku twamb’eku, nwamonu’s, ne pasiishe wènzè maalu bu yèyè awu. Nwamonu anyi? Kadi kwèna mwa kucyenza mu wèwè mwine to. Bìdi bikengela wènzè bwa Kilisto abwele munda mwèbè amu. Ne dimiinu adi dyôdi disanganyibwamù, ne Bukènkè abu budilengè, nedilwe ku Mwoyi. Dyôdi kadìyi dilwè ku Mwoyi to, kamùvwa cintu nansha cimwe munda amu cìvwà mwa kulwa ku Mwoyi to. Bwalu, ncyà bushuwa ne cìkaadi cijaadikiibwe pa bakwabo, nwamonu’s, dyôdi dìdi dìlwa ku Mwoyi dyakamwe pàdìbi anu ne Bukènkè bwàdìlengì.

117 Aci nditandisha dya bantu bakaji, ndi mumanye, bàdi munkaci mwa kuteeleja mukaba wa mèyi ewu abu, anyi bìikalà mwa kuwuteeleja. Nditandisha kùdi, wèwè mwaneetu wa bakaji. Bìvwà bikengela bwa kwikalaci nanku. Bìvwà bikengela bwa kwikalaci nanku, bwalu cìdi cidileeja. Cyùdi mwenze nansha ciikàle cinganyi; uvwa mufwànyìne kwikala mutendeleedi, matuku èbè ònsò a mwoyi, udi mufwànyìne kwikala musòmbèle mu ekeleeziya, tatwèbè ùdi mwa kwikala mwambi, anyi bayeebe mmufwànyìne kwikala mwambi; kadi bu mùdi anu ushikuka ku—ku Dìyi dya Nzambi, s’bìdi bileeja ne kakwena Mwoyi muntwamu. Paùdi umona cintu aci cileeejiibwe

patooke, ne Mwoyi wa Nyuma Mwîmpè, uMutangila pàdìYe ùlenga bakwabo, umòna cidìbo benza, Yèyè ùlwa naaci pambidi pààbò, kabyena bikemesha to . . . Bwa cinyi . . . ?

¹¹⁸ Ditandisha kaayi—kaayi kùdì Bafaalesa abu, bààkabiikilà Yesu, pàvwàYe mwa kujingulula meeji abo apu, Yèyè kubabiikila ne: “Beelèzèbùlà.”

¹¹⁹ Kadi ndumba mutekete awu yèyè wàkamba ne: “Mona’s, Muntu ewu m’Maasiya awu. Mufundu mmwambe ne Yèyè neenzè cyòcì eci.” Nwamonu’s, dimiinu didyànjila-kulongolola adi divwa disanganyiibwa munda amu. Nenku Bukênkè mbwenze anu budilenga anyì, pààdì dyumba dilwa ku Mwoyi. Kwèna mwa kushàalaku mudilaminyine mwinshi amu nansha. Kwèna mwa kusokokaku Mwoyi to.

¹²⁰ Udi mwa kwangata nshaamenda ne kumupongolwela pa mushiki wa mashinda, ne kuàshebeya mu movù wa mashika. Muvù wa bintu bitòloka wùdì wùlondà awu, mashinda èbè a mapite bùngì awu àdì àsanganyiibwa lwà penyi? Anu ku mwelelu menemene wa ku nyungulukilu wa nshaamenda aku. Bwalu, dimiinu ditòlwesha dìdì mwinshi mwa dibwe adi adi, pàkaadi dībà dibanga kutuma nsèsà, wèwè kwènàku mwa kudipangisha to. Nedidinyonde dyenda dipicila muntwamu dikapàtukila buludi ku mwelelu wa cyòcì aci aku ne kujuula mutu kuwimanyika muulu bwa butumbi bwa Nzambi. Nwamonu’s, kwènàku mwa kusokoka mwoyi nansha. Pàdì dībà dilenga mwoyi wa bukwà-micì, bùdì ne cya kwikala ne mwoyi.

¹²¹ Nenku pàdì Nyuma Mwîmpè ùlenga Mwoyi wa mu Mifundu wùdì munda mwa muntu kampanda, Wùdì wùpàtula mamuma àWù anu *mwaba awu* mene. [Mwaneetu Branham ùdì ùtuuta cishonto—Muf.] Nwamonu anyì?

¹²² Pa nanku nansha wèwè mwikàle mwena lulamatu anyì wa meeji matooke wa bishi, nansha mùdì wamba ne kwèna, ne mwikàle wakula, wamba ne bôbò bàvwà . . . Bakaji bàdì bàvwàla bilàmbà bibi ebi—ebi aba ne bikwabo pambelu pààpa, anu bya mujì wa maja wa ùvùùla ne bilàmbà, wa mu mùsèèsù ewu. Nansha byòbì ne, wèwè kwèna witabuuja ne ki cyùdì, kwèna mwa kudii tabuuja to. Udi mwa kujaadika mùdì kùyì mupiile pa bidì bitàngilà masandi, kadi, mu Mukanda wa Nzambi, udi munkaci mwa kwenda masandi. Yesu wàkamba ne: “Ewu yònsò ukàtàngidi muntu mukaji bwa kumwalakana, yèyè wàmanyi kwenda nendè masandi munda mwa mwoyi wèndè.” Nenku wèwè mwine’s ngudi mudizanjike mushindu awu. Nwamonu’s, kwèna mwa kucimona to pàdì Mwoyi awu kawùyì wùsanganyiibwa munda amu.

¹²³ Wèwè udi utàngila muntu kampanda mukwabo, utàngila wamba ne: “Ee, mèmè’s ndi mumanye Mwaneetu wa bakaji Jones. Mwaneetu wa balume Jones ùtu . . . Yèyè mmwambi. Mukàjèndè ùtu wenza *cikampanda* ne wenza *cikansanga*.”

124 Cìdì *aci* cyenza kî ncìdì ne bwalu to; Eci ki Dìyì. Yesu wàkamba ne: “Dìyì dya muntu yònsò diìkalè mashimi, ne Dyànyì diìkalè dilelela.” M’Bible. Nenku pàdì Bukènkè abu bucilenga cya bushuwa, cìdì ne cya kulwa ku Mwoyi. Cìdì anu ne cya kulwa ku Mwoyi.

125 Mpindyewu, dísù dinene dya Mòsà adi, dísù dyèndè dya mukanku adi, dyakatangila dyamwamwa dya dibàlakana dya Ejiipitu.

126 Mwena kwitabuuja mwena Kilsto mulelela leelu ewu, cìdì ekeleeziya wàmba nansha ciikàle cinganyì, cìdì muntu kampanda mukwabo wàmba, pàdì Bukènkè abu bùlenga, ne yèyè ùmòna dishindika diine dya Nzambi, Dikunji dya Kapyà adi dilembèlèle kwaka, ne bimanyinu ne maalu a kukema byàkalayibwà abi, Mufundu mwikàle muteekiibwemu, cìdì cìlwa ku Mwoyi. Nansha ciikàle cikese bishi, ne nansha ciikàle mu banyààbanyà bàà bùngì kaayi, cisumbu cya Nzambi bóbò batu misangu yònsò anu banyààbanyà. Nwamonu anyì? “Kanuciinyi nansha, nwènù kasumbu kakese—kakese kàà mikooko, mbudiswìlè bwa Taatù wenu bwa kunupeesha Bukalenge.” Nwamonu anyì? Bóbò bàdi bacyumvwa. Nzambi mmwenzejiibwe bwa kubatuma kuumukila mu dingumba ne dingumba dyònsò, mu ndongolwelu ne ndongolwelu yònsò wa bantu, myaba yònsò, bwa kuCimonabo, piikalàbo balongolwela Mwoyi.

127 Tàngilàayi mukulumpe Simèònà, mulongolwela Mwoyi awu. Pààkabwelà Maasiyà mu ntempelu, mu mmwenekelu wa mwànà wa mu diboko mu maboko a mamwèndè, Simèònà, lwà mundekeelu mu cibambalu mwaba kampanda, munkaci mwa kubala, Nyuma Mwìmpè kumukatamuna, bwalu yèyè ùvwa mwindile. Mwoyi awu wùvwa munda mwèndè. Yèyè ùvwa wàmba ne: “Mémè ncyakufwaku to nciyi mumone Kilsto wa Mukalenge.” Kadi ki Kilsto wa Mukalenge n’Yèyè awu mu ntempelu amu. Nyuma Mwìmpè kumulombola kuumumusha ku mudimu wèndè, kupatukaye, ne kupicilaye tamakatamaka mu mwaba awu ne kubakulaye mwànà wa mu diboko awu, kwambaye ne: “Lekèlăku—lekèlăku musadidi Wèbè àyè byàndì mu ditalala, bwalu mèsù àànyì àkumòna byàwù lupàndù Lwèbè.”

128 Kùvwa mukaji mpofo mukulakaji mu ditumba, dînà dyèndè Anà, uvwa ukwacila Mukalenge mudimu muunya ne bufuku. Ùvwa pèndè munkaci mwa kwamba maalu àcìvwà àlwa, wàmba ne: “Maasiya ùlwalwa. Ndi mwa kuMumona ùlwa.” Pààbì, yèyè ùvwa mpofo. Mu cikondo cimwecimwe aci, pàvwàYe mwaba awu apu. . . KaaMwoyi kakese kàvwa munda mwèndè aku, kiikàle kàmba maalu àcìvwà àlwa ne: “Necyenzeke! Necyenzeke! Necyenzeke!” Dìbà adi, Mwoyi wumwewumwe awu, Bukènkè abu kulwaBu mu nzubu amu, mu mmwenekelu wa Mwànà wa mu diboko, bu “mwànà mulelela mu masandi,” mujingila

mu mikusu Yèndè ayi, bwenda bupicila mu nzubu amu. Ki Nyuma Mwîmpè kulengaYe mukaji mpofo mukulakaji awu, ne yêyè kulwa mwenzeja kùdi Nyuma, mulombola wendà upicila munkaci mwa bantu amu, ne kwimanaye lwà pàvwà Mwànà mwine wa mu diboko ewu apa, ne kubeneshaye maamù, ne kubeneshaye Mwànà wa mu diboko awu, ne kwambaye civwà matuku àcìvwà àlwa mwa kwikala Bwèndè Yêyè. Nwamonu's, mulongolwela Mwoyi! Nwamonu anyi?

¹²⁹ Anji bàtàngìlaayi, kabàvwa dikumi ne babidi muntwamu to. Kwakasungidiibwa anu misuuka mwandamukulu cyanààna mu dituku dya Noa, kabàyikù bààbùngì menemene to, kadi bônso bàvwà balongolwela Mwoyi baakabwela mu ciine cikondo aci. Monaayi mùdi Nyuma Mwîmpè ukwata mudimu mu cikondo ne cikondo cyônso, mwikàle ukoka bantu.

¹³⁰ Mpindyewu tudi tusangana ne diitabuuja dya Mòsà òvwa òmulombòle bwa kutangila cìvwà mwa kulwa, kì ncìvwàku to. Kutangila mààlabà pamutu pàà kutangila leelu. Kutangila mulayi pamutu pàà dibàlakana. Kutangila cisàmbà pamutu pàà bulongolodi. Nwamonu anyi? Nzambi nguvwa wenza cyôci aci awu.

¹³¹ Lota òvwa yêyè mwa kumona dibàlakana ne ditanta mu Ejiipitu, anyi mu Sodoma. Lota òvwa mwa kumona mpùngà ya—ya—ya mfranga ya—yàbùngì. Lota òvwa yêyè mwa kumona ditant-...mpùngà ya pààkatàngìlaye kwaka ku Sodoma ne yêyè mufwànyine pànwàpa kulwa...Bu mùvwàye mwena Ebelu, òvwa mufwànyinekù kulwa muntu munene muntwamu, bwalu òvwa muntu munene wa mamanya a mu mutu, ne mwànà wa tùùtwèndè wa Abraham, pa nanku kusungulaye bwa kuya mutangile ku Sodoma. Mamanya a mu mutu a Lota akamulombola ku òmòna dibàlakana dya—dya ditanta. Mamanya a mu mutu a Lota akamulombola ku òmòna dibenesha dya—dya dibàlakana. Kadi, diitabuuja dyèndè òvwa òtambe kwikala dicìbwila panshi kùdi dibàlakana, mu mushindu wa ne yêyè kaakamonaku mudilu wùvwa mwa kulwa kubutula nsòmbelu wa mushindu awu awu to.

¹³² Nenku mushindu awu ki wùdi bantu leelu ewu. Bòbò bàdi bamona mpùngà ya diikala bàà mu bulongolodi bunene, bàdi bamona mpùngà ya dipeta mwaba wa luumu pamwe ne bantu bàà mu cimenga, kadi kabàyi bamona mpùng-...Kabèèna bòbò bamonaku ne diitabuuja dyabo ndicìbukilà panshi ne tunèkè to. Lekèlaayi ngàmbululè cyôci aci bwa kabìikadi bààlwa kucyùmvwa bibi. Bakaji leelu ewu, bòbò, mùndi ngamba, bòbò mbaswe—bòbò mbaswe kwikala bènza maalu bu bakàjàànà bàdi bèndè luumu bàà mu sèndèmà. Balume leelu ewu mbaswe kwikala bènza maalu bu benji bàà bikàsà bàà ku télévìsion.

¹³³ Bayiishi leelu ewu mbenze anu bu ne mbaswe kuvwija ekeleeziya yabo mifwanangane ne diswa dya cyena-leelu dya

mushindu kampanda, buumambàlà ne bikwabo byònsò. Bàdi bóbò bamona mpùngà pàmwápa ya dilwaku mwepiskopo anyi mutangidi wa bònsò, anyi cintu kampanda cya mushindu awu, bu bóbò mwa kwendela pamwe ne ekeleeziya awu; bàlekela Mifundu, pààYì's mmiteeka anu kumpala kwabo mene, miikàle mishindika anu menemene kùdi Bukole bwa Nzambi, ne kùdi Dìyì dìdì ne mwoyi dya Nzambi dìdì ne mwoyi munda mwa bantu adi. Nansha nanku, bóbò kî mbaDisweku to. Bàdi bàmba ne: "Katwena baswe kusambakanangana ne cintu cya bu Aci to." N' Cifwànyine kulwa kubanyenga karta kaabo kàà buumambàlà. N' Cifwànyine kulwa kubanyenga ndongolwelu wabo wa cyenamangumba. Pààbò bantu bàà meeji matooke, bu Lota, musòmbe mu Sodomu mwamwa, mumanye ne ncibi. Nwamonu anyi? Nwamonu anyi? Cidìbo bènza ncinyi pàdìbo bènza nanku awu apu? Bàdi bàkwàcisha kiine kaadiitabuuja kakese kàvwàbo naaku aku tunèkè. Kakeena mwa kukwataku mudimu to.

¹³⁴ Mpindyewu, Mòsà kudilekelelaye ku cyòci aci, nenku yèyè kuteeka . . . diitabuuja dyèndè kukwàcishadi maalu a pa buloba tunèkè.

¹³⁵ Anyi diitabuuja dyèbè nedikwacishè dibàlakana adi tunèkè, anyi dibàlakana adi ndyàkwàcishà diitabuuja dyèbè tunèkè. Mpindyewu, bikengela wèwè kusungula anyi eci anyi eci. Nenku udi umona ne Bible kèna ushintulukaku to. Nzambi kàtu ushintulukaku to. Yèyè n' Nzambi wa kàyi ushintuluka to.

¹³⁶ Nenku mpindyewu tudi leelu ewu, tusangana ne, bantu bàà mu dituku edi, nwamonu's, bàdi batangila ku bintu binene, bulongolodi bunene. "Mémè ntu wa mu *Cikampanda*." Nwamonu anyi? Nenku bàyaaya kwine kuntwaku, kadi, tàngilàayi, kakùyikù dishiilangana ne bantu bàà mu mùsèsù to. Kakùyikù bikwabo bintu to. Bàdi ne kaacintu kampanda kakese kàà mamanya a mu mitu, ne bàtùngunuka. Paùdi wakula pa dyondopa dya kùdi Nzambi, pa Dikunji dya Kapyà, Bukènkè bwa Nzambi, bàdi bóbò bamba ne: "Abi's mbya mu meeji."

¹³⁷ Muntu kampanda mmwangate fòtò wa Mwanjelo wa Mukalenge, dituku adi, mwambi kampanda wa mu ba-Baptistes, ku Cisekaye. Nwamonu's, aci's—aci's ndipenda dya Nzambi. Nwamonu anyi? Kakwena difwidiibwa dya luse ku cyòci aci to.

¹³⁸ S'ki cyàkambà Yesu, nwamonu's. Ndipenda dya Nzambi; paùdi uCimona cyènza byenzedi mene byàkenzà Kilisto abi. Yèyè ngwákamba . . . Pàvwàbi ne, bóbò bààkamòna byenzedi abi mu Kilisto, Yèyè ùwà Mulambu awu, ne ku Mubiikilabo ne "Beelzèbùlà, démon," bwalu, bwalu Yèyè ùwà ùcyènza. Kadi mpindyewu bàdi bàmba . . . KwambaYe ne: "Ndi nnufwila luse bwa cyòci aci. Kadi pààlwà Nyuma Mwîmpè bwa kwenza cintu cimwecimwe aci, wèwè mwambe dîyi dibi bwèndè Yèyè awu, kwakufwidiibwaci luse to nansha kakese, mu eci cikondo anyi mu cikondo cilwalwà." Nwamonu anyi? Anu dîyi dibi dimwepele

cyanàànà ndidì dikèngelà bwa wêwè kwamba bwèndè Yèyè. Nwamonu anyi? Nenku dibà adi . . .

¹³⁹ Bwalu, Mwoyi awu, pawikalà mulongolwela Mwoyi wa Cyendèlèlè, dibà adi Mwoyi awu mmufwànyine kubwayika paùdi muCimone apu. Wêwè udi mufwànyine kuCijingulula, bu mukaji mutekete awu ku ciina cya mâyi, ne—ne bakwabo bashiileshiilangane. Kadi cyôci kaciyimù to, kacyenaku mwa kulwa ku Mwoyi nansha, bwalu kakwena cintu nansha cimwe bwa kulwa naaci ku Mwoyi to. Anu mùvwà mààmù wanyì mêmè mukulakaji wàmba ne: “Kwèna mwa kupeta mashi mu tuunèpà to,” bwalu kamwena mashi to. Mpindyewu, ncintu cimwecimwe aci.

¹⁴⁰ Nenku cidi cicìbwila kiine kaadiitabuuja kakese kaùdi naaku aku panshi ne tunèkè. Lota ùvwa mwa kumona dibàlakana, kadi kayiku ne diitabuuja dikumbane bwa kumona mudilu wùvwà mwa kubutula dibàlakana dya mushindu awu adi to.

¹⁴¹ Mêmè’s ndi ndikonka twètù aba ní tudiku naadi, leelu ewu. Ndi ndikonka ní twètù aba, ee, bu mùdi bakaji bàdi baswe kwikala bamanyike abu, bàdi baswe kwikala bènza maalu bu bakwabo bàà—bàà ku bakaji bàà mu ekeleeziya abu, ní bàdi bamona ne mbaswe kwikala bènza bu—bu bakwabo abu. Bàdi—bàdi mwa kumona mpùngà ya kwikalaku mukaji wa—wa—wa kwisù kutambe bulenga, mu kwikala mudilaabe bilaabu bya kwisù. Bàdi mwa kumona mukaji wa kwisù kutambe bulenga mu kwikala ne mmwenekelu mutambe kwikala wa mwànà mutekete, mu kukosa kwa nsuki yèndè ne kwenza kwa maalu bu bamwe bàà ku bakwabo abu, anyì bu mukajaana mwèndè luumu wa mu sèndèmâ. Kadi ndi ndikonka aci ní kî ncicìbwilekù diitabuuja dyabo panshi ne tunèkè, pa kumanya ne Bible mmwambe ne, “mukaji udi wenza aci ùdi ufwish- . . . mmukaji udi ufwishangana bundu,” ne, “mukaji udi uvwàla cipwalu cidi cikumbànyine muntu mulume awu, ùdi cinyangu kumpala kwa Nzambi,” mipanu, ne bikwabo, ne tuputulu tùdìbo bàvwàla atu. Nenku—nenku cidi cìlwa anu cipapakane cyetu cya menemene eci mu mushindu wa ne cidi cishààla ciibidilu cya matuku ônsò kùdi bantu bàdi bacyenza abu. Ndi ndikonka ní kabeenaku bàcìbwila kiine kaadiitabuuja kakese kanùvwà naaku aku panshi ne tunèkè, kiine kàà diya dya mu ekeleeziya mene aku, nudi numona’s. Ki cintu cìdici cyenza ncyôci aci.

¹⁴² Lota wàkenza aci, ki kumucìbwilacì panshi ne tunèkè, ne kucìbwilacì bàà kwèndè panshi ne tunèkè muntwamu. Kabàvwakù mwa kucimona to.

¹⁴³ Kadi Abraham yèyè, mwikàle ne—ne diitabuuja dishìndika, tatwèndè mwakunyi awu, kààkatàngila ku dibàlakana to, kààkaswà bwa kubitanga to, nansha mwàkakèngelàbi bwa kwikalaye ne nsòmbelu wa lutàtu ne kwikala musòmbèle

pàà nkààyendè amu. Ne Sarah ùvwa musòmbèle mu cipeela mwamwa mùvwà nsòmbelu wa lutatu, mu buloba bwatuke amu. Kadi bôbò kabààkamòna dibàlakana adi anyì mpùngà ya dilwa bamanyike ayi nansha.

¹⁴⁴ Sarah, mukaaji uvwa mutambe bulenga mu ditunga amu awu, Bible ngudi mwambe nanku. Yèyè ùvwa mulenga kumona, mutambe bulenga ku bakaji bònsò. Kadi mpindyewu yèyè wàkashààla mene ne wàkatùmikila bayendè, mu mushindu mene wà ùfika too ne ku dimubiikila “mukalenge” wendè, yèyè udi Bible mwambe awu, too ne mu—mu Dipungila Dipyadipya; mwambe ne: “Yèyè unùdi bânà bèndè bàà bakaji, piikalàbi ne nudi nutumikila diitabuuja.” Nwamonu’s, ùbiikila bayende ne “mukalenge” wendè.

¹⁴⁵ Nenu Mwanjelo wa Mukalenge kuyaYe kamona ntempelu wabo ne...anyì kantenta kaabo kakese aku kuntwaku, ne kubambilaYe. Kabàvwa nansha mene ne nzubu wa disòmbela to; basòmbèle mu malaba maatuke. Kadi’s ki bwalu mbwòbù abu. Nudiku numona mùdì dituku adi dinwangana cyakabidi, anu menemene mwàkadibi musangu awu amu anyì?

¹⁴⁶ Mpindyewu, Mòsà mwikale ne diitabuuja dyèndè dinene adi, cyakabidi, ki pàvwàye mwa kwamba ne “to” ku bintu bya mpindyewu bya maalu a mpindyewu a pa buloba aa, ne kwenza disungula dijaalame. Yèyè wakasungula bwa kutwala ntatu pamwe ne cisàmbà cya Nzambi. Wàkasungula bwa kuya naaci. Bwa cinyi? Diitabuuja dyèndè! Yèyè wàkamòna mulayi. Wàkamòna cikondo cya nshiikidilu. Wàkamòna dituku dya dyabwabwa, ne wàkangata diitabuuja dyèndè. Ne yèyè kaakatuma ntema yèndè ku bivwà mèsù èndè amona mu mpùngà eyi to, ya ne yèyè nguvwa pâlò ne nguvwa mwa kwikala pâlò ayi. Yèyè wàkatàngila buludi dituku dya dyabwabwa.

¹⁴⁷ Kaa, bu bantu mwa kwenzaku nanku’s we, bu bôbò kabàyikù mwa kumona buloba bùdiku mpindyewu ebu. Wèwè mutangile buloba bùdiku mpindyewu ebu, s’udi wenza disungula pamwe naabu’s. Jika mèsù èbè ku abi to, kadi tangila mulayi wa Nzambi, ku dituku dya dyabwabwa.

¹⁴⁸ Ku diitabuuja dyèndè nkùvwàye mwa kusungula. Yèyè wàkasungula bwa kubiikidiibwaye mwànà wa Abraham, ne wàkabènga bwa kubiikidiibwaye mwànà wa Pâlò. Mmunyi mùvwàye mufwànyine kucyenza, pàvwàbi ne bukalenge bwònsò nkòong. . . Ejiipitu’s nguvwa mucimune buloba bujima. Yèyè’s nguvwa mfumu wa buloba, ne mwikàle nsongààlùmè wa citende wa bidimu makumi anaayi, pabwîpì ne kwangata nkwaswa wa butumbi. Kadi yèyè kaakatangilaku mamanya èndè a mu mut- . . .

¹⁴⁹ Tàngilàayi bakaji bàvwà bafwànyine kwikala bàdyàdija mu nyungulukilu wendè, ku dituku ne ku dituku, bipangu bya bakaji. Tàngilàayi dibàlakana adi; musòmbè ùnwàngana anu

ne maala, ùbandilangana anu ne manayi a bakaji bàvùùla ne bilàmbà kumpala kwèndè, pàvwàbo baja maja apu, ne biikàle bamwela kapeepa ne. . . Ne bakaji bàà bafumine pa buloba bujima, bavwàle bilengà ne bintu bya mushinga mukole, cilwilu cyèndè pambelu apu. Cintu cimwepele civwà cikèngelà bwa yèyè kwenza's civwa anu kusòmba ne kudya byakudya byèndè bya bilenga abi, ne kwamba ne: "Tumaayi. . . tumaayi cisumbu cya masalaayi cya nomba *kampanda* mu mwaba *kansanga*, bàkwatè ditunga adi. Ngeela meeji ne ndi naadi dijinga." Ki cyònsò civwà cikèngelà bwa yèyè kwenza ncyôci aci. Kusòmba mwaba awu, ne bôbò bàmwela kapeepa, yèyè mushààle anu kacya wàtùbula mukana; mulekele bakaji balengèle-lèngèlèè bajì bàà—bàà maja bàà bàvùùla ne bilàmbà, balenga kwisù bàà mu dituku adi abu, bàmutàngolwela maala mukana, bàmutùisha byakudya biikàle bamujingile maboko kunshingu, bakaji bônso bàà batambe bulenga bàà pa buloba bujima abu. Dibàlakana dyònsò divwàku adi, divwà disanganyibwa anu pàvwàye yèyè apu mene.

¹⁵⁰ Kadi cyakenzaye ncinyi? Yèyè wàkuumusha mèsù aku ne kuàtàngija kwa cyanààna. Úvwa mumanye ne mudilu wùvwa pabwipi bwa cyôci aci kuntwaku. Úvwa mumanye ne lufu lùvwa lùsanganyibwa mu njila awu. Nwamonu anyi? Úvwa mumanye ne lùvwakù. Ki kwambulaye mèsù e kutangila musumbà wa bantu badyombola ne babengiibwe, ne ku diitabuuja yèyè wàkasungula bwa kukengaye bwa bundu bwa Kilisto, ne wàkadibiikila ne: "Mémè ndi mwànà wa Abraham. Ncyênàku mwànà wa pàlò ewu to. Nansha nwènù bamvwija mwepiskopo, anyi mulami, anyi mwepiskopo mutambidile, anyi paapà, mémè ncyèna mwànà wa cintàkanyì eci to. Mémè ndi mwànà wa Abraham, ne ndi nditapulula ne maalù a pa buloba." Amen, amen, ne amen! Ku diitabuuja, yèyè wakenza nanku!

¹⁵¹ Yèyè wàkuumusha bya dibàlakana abi kubyela anu kwaka. Wàkuumusha bya mpùngà ya kulwa mwepiskopo uvwa ulonda abi, wàkuumusha bya—bya mpùngà ya kulwa mwepiskopo mutambidile uvwa ulonda abi, anyi mutangidi wa bônso uvwa ulonda ku masungulangana àvwà àlondà awu, anyi ní ncinyi cyònsò civwàku aci, wàkuumusha abi kadi kubyela anu kwaka. Wàkabènga bwa kubitangila.

¹⁵² "Mpindyewu, mémè mwa kulwa mwepiskopo, s'nèmbwelè bwa bantu kwikalabo bamba ne: 'Taatù Munsantu,' anyi—anyì 'Docteur *Kampanda*,' anyi—anyì—anyì—anyì 'Mukulu *Kansanga*.' Mushindu mwine wikalàbo, bambi bônso abu ku cisangilu aku, s'nebiikalè bàkaadi bantuuta tuumapi paanyima, bàmba ne: 'Amba tǔng, mulumyana, muntu wawa's udi ne cintu kampanda, anu mémè udi ukwambila awu. Kaa, sh-sh-sh, shààla mupuwe, s'ki mwepiskopo ulwàlwa ewu, wamonu's. Cìdiye yèyè wàmba aci, ki mukenji. Wamonu's, s'ki *Kampanda* ulwàlwa ewu.'" Bantu nebangate ndeke bafumina pa buloba bujima bwa kwikala. . . kumona paapà, ne kutwa mishiku ku dikàsà ne ku

tukanu twèndè twa ku minu, ne bikwabo. Mushindu kaayi, mpùngà kaayi bwa mwena Katolike, mpùngà kaayi bwa mwena Mishòònyì, bwa kwikalaku mwepiskopo anyì mutangidi wa bònsò, anyì cintu kampanda, muntu munene kampanda mu bulongolodi.

¹⁵³ Ûtàngila, nansha nanku, kadi, nudi numona's, dísù dya diitabuuja adi dyòdi dítu ditangidila pamutu pàà cyòci aci. Nenku udi umona ndekeelu waci kwaka, bwalu, Nzambi udi wàmba ne cintu cyònsò mu kaabujima necibutudiibwe. Diitabuuja, dísù dya mukanku adi, didi dikutuntumuna kumutu kwa cyòci aci, nenku udi umona mààlabà, kaciyi leelu to, nenku usungula bwa kubiikidiibwa mwànà wa Abraham.

¹⁵⁴ Pâlò, kàyikù ne diitabuuja to, wàkamòna bânà bàà Nzambi bu “bakoleshi bàà maalu.” Kàyì ne diitabuuja to, kubavwijaye bapika bwalu kàvwa uciina civwàye wàmba to. Kàvwa uciina Nzambi to. Ûvwa udyelela meeji ne yèyè ùvwa nzambi. Ûvwa yèyè wela meeji ne tunzambi twèndè—twèndè tùvwàye ukwacila mùdimu atu, bwa ne yèyè ùvwa mwepiskopo, ùvwa mfumu mutangidi wa bònsò, ne tunzambi twèndè atu ki tùvwà tucyènzè. “Ciine Cintu cidi *apa* eci kaciyena ne bwa nsongo to,” ki kubavwijaye bapika's. Ûvwa ubaseka, ùbèèlulwila. Anu menemene mùdi bantu benze leelu ewu emu, cintu anu cyòci cimwecimwe aci menemene.

¹⁵⁵ Diitabuuja dya Mòsà òvwa dyòdi dibamona mu buloba bulaya, cisàmbà cibènesha. Bìvwa bifwànyine kwikala mvita mikole bwa kubafikisha ku mulayi, kadi Mòsà wàkasungula bwa kuyaye naabo. Mushindu mwine wùndi mufwànyine kwalabala pa cyòci aci's, kadi díbà dyànyì dikaadi dyenda dijika. Nwamonu anyì?

¹⁵⁶ Monaayi, civwa cifwànyine kwikala cintu cikole bwa kukudimuna bantu abu. “Bìdi bikengela bwa wèwè kuya kasòmba naabo, bìdi bikengela bwa wèwè kwikala umwe wabo, kadi bòbò nyawu bàkaadi bamane kwikala bàà mamanya a mu mitu bàà menemene mu mushindu wa kùciyi mwa kubanyungishaku to. Wamonu anyì? Kadi bikengela bwa kwenzekeku cintu kampanda pambelu pààpa. Bikengela bwa citambe-mfukilu cileejiiibweku kumpala kwabo. Neciikalè cintu cikole. Malongolodi neakwele làà, ne bintu byònsò ebi nebyenzeke. S'cidi—cidi—s'cidi bwalu bukole, ciine cidi cikèngelà bwa wèwè kwenza aci, kadi nansha nanku enza anu disungula dyèbè's.”

¹⁵⁷ “Ndi umwe wabo.” Eyowa. Diitabuuja dyèndè ndyòdi dyàkenzà aci adi. Diitabuuja dyèndè dyakapatula tuntòlantòla. Eyowa's, mukalenge. Yèyè wàcacimòna. Civwa cintu cikole be bwa kubafikisha ku mulayi awu, kadi yèyè wakenza disungula dyèndè bwa kuyaye naabo, nansha bya munyi. Kàyì utangila

cyakamwenzabo to, ne mwakamwelabo làà amu to, nansha bya munyi yèyè wákaya. Ûvwa upatuka naabo.

¹⁵⁸ Mpindyewu ndi ntekemena ne nudi munkaci mwa kubala. Eyo. Nda naabo, nansha bya munyi. Dìvwijè, ikala umwe wabo, n'cya bushuwa, bwalu ndibanza dikwela. Ncifwànyine kwikala mvita mikole, ne byàbûngì bya kupicila, kadi nansha bya munyi nda anu kuya.

¹⁵⁹ Kadi diitabuuja dyèndè dyakamulombola bwa kwenza disungula dya Dîyì, ne kadiyi dya dibàlakana to. Wàkangata Dîyì. Ki cyàkenzà diitabuuja dya Mòsà ncyôci aci. Diitabuuja pàdidi ditangila pa cidi citambe bubi cya Nzambi. . . Vùlukàayi ne, ki dibàlakana ndyôdi edi mpindyewu, maalu a pa buloba, mfumu udi mutambe kutumbuka, wa buloba awu. Kadi mulayi wa Nzambi wùvwa mpenyi? Mu ciina cya bitoci, basopi bàà bitoci.

¹⁶⁰ Kadi pàdi diitabuuja, pàdi diitabuuja ditangila pa cidi citambe bubi cya Nzambi, didi dicibala bu ne ncinène ne cya mushinga kutamba cidi bàà pa buloba mwa kuleeja ne n'citambe bwîmpè aci. Eyowa's, mukalenge. Pàdi diitabuuja dicitangila, pàdi diitabuuja mwa kucimona, pàdi diitabuuja mu Dîyì mwa kumona Dîyì dimweneshiibwe, bwàbò bôbò n'citambe dibàlakana dyônsò ne bwepiskopo butambidile ne bikwabo byônsò byûdiku wêwè mwa kwamba abi. Diitabuuja didi dicyenza. Nwamonu anyi? Wêwè udi mwa kumona cidi citambe bubi aci, cidi cidyombodiibwe, cibengiibwe, cyônsò cidici cifwànyine kwikala aci; cìikalè cyôci mu mushindu wàci wa citambe bubi awu, kadi nansha nanku diitabuuja dyôdi nedicibale citumbuke kule ne kule mu ntanta wa mùliyô wa kilômèètà kutamba cidi citambe bwîmpè cidi bàà pa buloba mwa kutwala. Amen! Ki mushindu wutùtù twimba musambu awu ne: "Nèndondè njila pamwe ne banyààbanyà badyombola bàà Mukalenge." Nwamonu anyi? Kaa, ekelekele!

¹⁶¹ Bwalu, nudi numona's, diitabuuja didi dìmòna cidi Nzambi muswe bwa cyènjiibwè aci. Kaa, ndi ntekemena ne eci cidi cibwela. Diitabuuja kaditu ditangila cikondo cidi mpindyewu to. Diitabuuja kadyena dìmòna cidi *apa* eci to. Diitabuuja didi ditangila bwa kumona cidi Nzambi muswe, ne didi dikwata mudimu bikumbanangane naaci. Ki cidi diitabuuja dyenza ncyôci aci. Didi dìmòna cidi Nzambi muswe, ne cidi Nzambi muswe bwa cyènjiibwè, ne diitabuuja didi ditambwila mu cyôci aci.

¹⁶² Diitabuuja ndimònà dya ntanta mule. Kadyena dipwekesha kamwenu kàadi kàa dijaalamija naaku dimònà to. Dyôdi didi dikwata ku cintu ciludikila. Amen! Mutuuci mulenga wa cingoma kanà yônsò ewu mmumanye aci. Nwamonu anyi? Cya ne, ndimònà dya ntanta mule. Cidi—cidi ntulòndò twa dimwèna mu ntàntà mule. Ntulòndò twa mèsù abidi, tûdi kùyi utangila

naatu pabwípì *apa* to. Kwêna ukwata mudimu ne tulondo twa mèsù abidi atu bwa kutangila bwa kumona ne tudi dībà kaayi to; nwamonu's, kwêna ukwata naatu mudimu bwa aci to. Kadi udi ukwata mudimu ne tulondo twa mèsù abidi atu bwa kutangila kule menemene.

¹⁶³ Nenku ki cidì diitabuuja dyènza ncyôci aci. Diitabuuja didi dibakula tulondo twa Nzambi twa mèsù abidi, ônsò abidi awu, nseke yônsò yibidi, Dipungila Dipyadipya ne Dikulukulu, ne didi dimòna mulayi wônsò wùtùYe mufile. Nenku diitabuuja didi diwumona kwaka, ne diitabuuja didi disungula aci kadiyi ditangila ne cidì cikondo cya mpindyewu cyàmba *apa* ncinyi to. Yèyè udi utangila ku ndekeelu. Kêna upwekesha dyèndè dimònà panshi bwa kutangila mushindu *ewu* to. Ùdi yèyè utangila kwaka. Ùdi ùshààla mulame kamwenu kashindamijila pa Dìyi. Ki cidì diitabuuja dyènza ncyôci aci. Ki diitabuuja didi mu muntu ndìdi dyènza bintu abi.

¹⁶⁴ Mpindyewu tàngilàayi. Cìvwà Pàlò yèyè ubiikila, dibiikila, cìvwà Pàlò yèyè ubiikila ne *ncinène* aci, Nzambi ùvwà ucibiikila ne “ncinyangu!” Pàlò ùvwà mufwànyine kwikala mwambe ne: “Tangila, Mòsà, kuneeku, mona's, wèwè ngudi pàlò udi ulonda. Ndi—ndi nkusambulujila dikombo dya bukallenge edi pàngùumukà panwapa. Nènkusambùlùjilè dikombo dya bukallenge edi. Ndyèbè wèwè. Wamonu anyi? Mpindyewu, eci's ncinène. Wèwè's newikalè muntu munene, Mòsà. Wèwè newikalè mwepiskopo. Newikalè *cikampanda*, *cikansanga*, anyi *cikankenga*. Kùtùshìyikù to. Shààla anu mwaba ewu.” Kadi, nudi numona's, yèyè wàkabìikila aci ne *ncinène*, kadi Nzambi wákamba ne “ncinyangu!”

¹⁶⁵ Mpindyewu, nwènù bakaji anji elanganaayiku meeji kakese, bya mwomumwe, nwènù balume. Cidì bàà pa buloba bàbìikila ne *ncinène* aci, Nzambi udi ucibiikila ne “mbukooya.” Bible kêna wàmbakù ne: “Ncinyangu bwa muntu mukaji kuvwalaye cìvwalu cidì cikùmbànyine muntu mulume” anyi? Kadi wèwè udi wela meeji ne udi ne meeji matwe mu dicyenza. Nwamonu anyi? Cyùdì's udi anu uleeja patooke mubidi wa bukaji bwa mwikalè wenzela dyabulu, ne ki cyônsò cidìku ncyôci aci. Pa nanku, kùcyènjìku to.

¹⁶⁶ Ne nwènù balume bàdi ne nsòmbelu wa dyenda dilondangana ne maalu a pa buloba, biikàle nukongolojangana ne nubambakajangana ne byôbi ebi! Ne nwènù balume bàdi kanùyikù ne dikima dikumbane mu nwènù bwa kulekeeshaku bakaji beenu dyenza dya bya nanku awu, bundu bwenu! Biine abi nudibiikila peenu munùdi bânà bàà balume bàà Nzambi? Aci bwànyì mèmè's ncimweke bu cyena Sodoma. Nwamonu anyi? Kì mbwà kunutapa ku mwoyi to, kadi mbwà kunwambila Bulelela. Dinanga ditu dilongolola bilema. Ki mùtùdi misangu yônsò. Maamù udi kàyi muswe kutabaleela mwanèndè, kàyi umulongolola ne umutuutaku mapi ku tutàku aku, ne kàyi

umufikisha ku ditumikila to, awu kî mmaamù wa nsongo bwa mwânà awu to. Ncya bushuwa's.

¹⁶⁷ Mpindyewu, kadi tàngilààyi numone cìdì cyenzeka mpindyewu. Mòsà wàkamòna cyòcì eci, ku cikeena-kumona cyèndè aci. Ki Pàlò kwambaye ne: “*Eci* ncinène.” Nzambi wàkamba ne: “Ncinyangu.” Pa nanku Nzambi...Mòsà wakasungula cìvwà Nzambi mwambe aci.

¹⁶⁸ Mpindyewu, monaayi, diitabuuja dìdì dimòna cìdì Nzambi muswe bwa wèwè kumona. Nwamonu anyi? Diitabuuja dìdì dimòna cìdì Nzambi umona.

¹⁶⁹ Kadi dilukakaja dya lungenyi ne byumvwilu bìdì bimona cìdì bàà pa buloba baswe bwa wèwè kumona. Monaayi dilukakaja dya lungenyi: “Mona's, s'cìdì anu cyumvwilu cya buntu. Cidi anu—anu lumvu lulenga bwa *cikampanda*...*cikansanga* ne cìdì...Ee, *cikampanda* eci kacjena anu cìmpè mwine anyi?” Nwamonu anyi? Aci's cìdì anu menemene, paùdì ukwata mudimu ne byumvwilu bìdì bibènganganà ne Dìyì abi, nwamonu's, dìbà adi aci's ki cìdì bàà pa buloba baswe bwa wèwè kumona.

¹⁷⁰ Kadi diitabuuja kadyena ditangila ku aci to. Diitabuuja dyòdì dìdì ditangila ku cìdì Nzambi mwambe. Nwamonu anyi? Nudi bamanye's, nudi nutònkola dilukakaja dya ngenyi.

¹⁷¹ Dilukakaja dya lungenyi, cyumvwilu cya dilukakaja dya lungenyi, cìdì cimona cìdì bàà pa buloba baswe bwa wèwè kumona: dingumba dinene. Ee, wèwè udi mwena Kilisto anyi?

“Kaa, mèmè ndi—mèmè ndi Presbytérien, Méthodiste, Luthérien, ne mwena Mpenta, ne bikwabo. Ndi *cikampanda*, *cikansanga*, anyi *cikankenga*, wamonu's.”

Aci, s'ki byumvwilu mbyòbì abi.

“Mèmè ndi wa mu ekeleeziya wa kumpala, udi umona's. Kaa, mèmè ndi mwena Katolike. Ndi—ndi *cikampanda*, *cikansanga*, wamonu's.”

Ki cyùdì wèwè wamba ncyòcì aci. Mpindyewu, aci, s'ki byumvwilu mbyòbì abi. Udi muswe kwamba aci bwalu ndingumba, cintu kampanda cya cinène.

“Ee, twètù—twètù—twètù tudi ne bidimba byàbùngì bipite, bu ne, kutamba ekeleeziya kanà yònsò ya pa buloba, wamonu's. Tudi...”

¹⁷² Kadi kùdì Ekeleeziya mulelela anu umwepele, ne kwèna ukashààla wa Mwòmò to. Udi ulediibwaMu. Nwamonu anyi? Nenku wèwè mulediibweMu, Nzambi udi ne mwoyi ùdì Yèyè ukwacila mudimu kùdì wèwè, ne ùdimanyisha Yèyè mwine. Nwamonu anyi? Mwòmò amu ki mùdì Nzambi musòmbèle, mu Ekeleeziya Wendè. Nzambi ùtu ùya mu Ekeleeziya dituku dyònsò, mwikàle anu ne mwoyi mu Ekeleeziya. Yèyè udi ne mwoyi munda mwèbè. Wèwè udi Ekeleeziya Wendè. Wèwè udi Ekeleeziya Wendè. Udi Tabernacle mùdì Nzambi musòmbèle.

Wèwè udi Ekeleeziya wa Nzambi udi ne mwoyi, wèwè mwine awu. Ne piikalàbi ne Nzambi udi ne mwoyi udi ne mwoyi mu muntu Wendè udi ne mwoyi, díbà adi cyenzedi cyèbè ncyà kùdì Nzambi; kabiyi nanku to, díbà adi Nzambi kènamù to. Yèyè kî mmufwànyinekù kukwenzeja maalù mushindu awu to, pàdìYe wàmba mu Diyì emu, mu dizola Dyèndè edi ne: “Kùcyènji to,” kadi wèwè ujuuka ucyenza. Nwamonu’s, aci ncyà mafi. Paùdì ucivila, díbà adi’s bìdi bileeja ne Mwoyi awu kawena nansha mene munda mwèbè to. Nwamonu anyi? Ncyà bushuwa.

¹⁷³ Diitabuuja dyakalombola Mòsà ku kajila kàà ditumikila. Monaayi, Mòsà wàkenza. . . Kùdì Pàlò mutekete, kùdì Mòsà mutekete, bònsò babidi biikàle ne mpùnga awu. Mòsà ùmòna bundu bwa cisàmbà, kadi ùbùbala bu mabanji manene kutamba ònsò àvwà naawu Ejiipitu. Nenku yèyè, mulombola kùdì diitabuuja, wàkalonda cìvwà diitabuuja dyèndè dyambe mu Diyì, ne dyakumulombola ku kajila kàà ditumikila, ne ndekeelu wa byònsò ku Butumbi, kàyì wa ufwa, kàyì mwa kufwaku to, mu Bwikadi bwa Nzambi. Lumònò ne byumvwilu, byakalombola, ne dibàlakana, byakalombola Pàlò ku lufu lwèndè, ne ku dibutuka dya Ejiipitu, ditunga dyèndè adi, ne kadyakaalukilaku kabidi to kubangila anu piine apu.

¹⁷⁴ S’ki bwalu mbwòbù abu. Wèwè mutangile *eci*, udi ufwa. Wèwè mutangile Cyàcya, udi wikala ne mwoyi. Mpindyewu enzàaku disungula dyèbè. Cintu cimwecimwe aci ncyàkatèkà Nzambi kumpala kwa Adama ne Eva, mu budimi bwa Edènà. Nwamonu anyi? Ku diitabuuja, nkùdì ne cya kwenzela disungula dyèbè.

¹⁷⁵ Mpindyewu monaayi, lumònò lwakalombola Pàlò ku lufu lwèndè, ne ku dibutuka dya cimenga cyèndè.

¹⁷⁶ Mòsà, ne diitabuuja dyèndè adi, kààkacìnakù Pàlò to. Nwamonu anyi? Yèyè kààkatangakù cyàkambà Pàlò aci to. Kààkatangakù Pàlò to, anu mwakadibi ne mamwèndè ne tatwèndè kabààkatangakù mikànù yabo ayi to. Mòsà pààkashindikiibwàbi kùdiye, ne yèyè nguvwa muntu uvwa ne cya kusungila Ejiipitu. . . anyi kupatula Izaleela mu Ejiipitu, yèyè kààkatangakù cyàkambà Pàlò aci to. Kààkamucìnakù to. Amen, amen, amen! Nudi bamone cìndì muswe kwamba aci anyi?

¹⁷⁷ Kakùtùkù bwòwà mu diitabuuja to. Diitabuuja ndimanye aci. Diitabuuja, anu múnkaadi mwambambe misangu yònsò, didi ne mapùndà manene menemene, ne kabèwù. Diitabuuja dyòdì dyambe ne: “Bwikilaayi mukana!” bantu bònsò bàdi babwikila mukana. Kwajiki. “Mèmè ndi mumanye pàndì mwimànyìne!”

Bakwabo bàà kùdìbo bàmba ne: “Ee, nanku, pàmwàpa mmumanye’s.” Nwamonu anyi?

178 Kadi bìdi bikengela bwa wêwè kujuuka kuleeja mapùndà èbè awu. Kwajiki. Ki citù diitabuuja dyènza.

179 Monaayi, Mòsà kààkaciinaku Pâlò to paanyima pàà Nzambi mumane kushindika dibiikidiibwa dyèndè. Pààkiitabuuja Mòsà ne yêyè wàkabìkidiibwa bwa cyôci aci, kadi pààkamwambilà Nzambi kuntwaku ne: “Bìdi nanku,” ne kulwaye ne kuleejaye kumpala kwa Pâlò, ne kwa bakwabo bònsò bàà kùdìbo abu ne, yêyè wàkatùmiibwa bwa kucyenza, Mòsà kaakaciinaku Pâlò to.

180 Monaayi, Pâlò wakakwata mudimu ne lungenyi lwèndè pa Mòsà, nansha nanku. Tàngilàayi. Wàkamba ne: “Nènkwbilè mùdì bwalu, mèmè—mèmè nèngènzè neebe dyumvwangana.” Paanyima pàà bipupu bimane kumudya yêyè yònsò, kwambaye ne: “Nèngènzè neebe dyumvwangana. Nudi nuya anu bwa dikuukwila dikese cyanààna, matuku asatu. Nuyaaayi anu too ne mwaba kampanda, kadi kanuyi ntanta mupite apu to.” Kadi, nudi bamanye’s, kùdì. . . Abi bìvwa mbyumvwilu bya Pâlò bìvwà bimwambilà nanku abi, nwamonu’s: “Nuyaaayi anu too ne mwaba kampanda, kadi kanuyi ntanta mupite apu to.”

181 Mushindu awu katwenaku naawu leelu ewu anyi? “Bu wêwè mwa kushààlakù anu wa mu ekeleeziya cyanààna, abi’s mbimpè.”

182 Kadi, nudi bamanye’s, diitabuuja divwà naadi Mòsà kadivwakù diitabuuja ntendeleelu wa “too ne mwaba kampanda” awu to. Yêyè wàkamba ne: “Tuyààya twètù bònsò. Tuyààya too ne ku ndekeelu.” Ncya bushuwa. “Tuyààya ku buloba bulaya. Twètù katwena tupatuka anu apa cyanààna kadi kwenza dingumba kampanda, kadi kwimana nansha. Tuyààya too ne ku ndekeelu.” Amen. “Mèmè nyààya too ne ku buloba bulaya. Nzambi ngudi mutulaye.”

183 Tudi ne ba-Pâlò bùngi kaayi leelu wa Ndaaya ewu biimane mu cyambilu, bamfumu bàà malongolodi! “Mpindyewu, bu wêwè mwa kwenzaku anu *cikampnda* cyanààna, ne kwenza *cikansanga*, s’nkujike. Ee, wamonu’s, anu too ne mwaba kampanda.”

Kadi Mòsà kwambaye ne: “Kaa, to! To, to! To, to!” Nwamonu anyi?

184 Pâlò kwambaye ne: “Ee, bwa cinyi nanku? Pìikalàbi ne newikalè mwa kupeta ntendeleelu wa mushindu awu, mèmè nènkwbilè ciwenzà: Anu wêwè ne bakulu nuye kakuukwila, wamonu’s. Anu wêwè ne bakulu nuye kakuukwila. Bwalu, nwènù bònsò nudi mwa kupeta ntendeleelu wa mushindu awu, kadi kumubwejiku munkaci mwa cisàmbà to.”

185 Nudi bamanye cyàkambà Mòsà? “Kakwàkushààlakù nansha cikono paanyima to. Twètù tuyààya njila mujima. Tuyààya twètù bònsò! Mèmè ncyakuya pìikalàbo bòbò kabàyi bàya to. Nenu, bwa pàncidi mèmè mwab’ewu apa, ndi anu mukwela pambidi.”

Amen. “Mémè ncyakuya pìikalàbo bôbò pààbò kabàyi bàya to, ne aci ki kwajiki!” Kaa, musadidi kaayi wa bukitsu’s we! Amen. “Ndi muswe kubangata kuya naabo. Anu bwalu mémè ndi naaci, ne musòmbè ngamba ne: ‘Ee, mpindyewu, *cikampanda* ncìmpè’ anyi? To, mukalenge. Tudi baswe ne bantu pààbo. Yònsò wa kutùdi ùyaaya.” Amen. Kwambaye ne: “Katwakuyaku bwa kushiya nansha mukooko wònsò, anyi nî ncinyi, paanyima to. Kakwakushaalaku nansha cikono paanyima to. Tuyààya twètù bònsò ku buloba bulaya.” Amen!

¹⁸⁶ “Yònsò wa kutùdi! Nansha wèwè mwikàle mukaji wa nzubu, anyi nansha mwikàle kaa—kaainàbànzà katekete, anyi nansha wèwè mwikàle mukaji mununu, anyi nsongààlùmè, anyi muntu mulume mununu, anyi cyònsò cyùdi aci, tuyààya, nansha bya munyi. Kakwakushalaku nansha umwe wa kutùdi to.” Amen. “Yònsò wa kutùdi ùyaaya, ne katwakupangishaku cintu cikwabo nansha cimwe to.” Ncya bushuwa. Ekelekele! Ntendeleelu ayi’s yìvwa anu mu dikokangana kuntwaku, kî mmwòmò anyi? Kaa, ekelekele!

¹⁸⁷ To, Mòsà kàvwakù mwitabuuje ntendeleelu wa ne “anu too ne mwaba kampanda” ewu to. To, yèyè kaakiitabuujuaku abi to. Huh-uh. Eyowa’s, mukalenge. Kaa, ekelekele!

¹⁸⁸ Tudi bafwànyìne kushààlapù dituku dijima, kadi bìdi bikengela nye ku cyena-bwalu cyànyì bwa paanyima pàà katanci mbange kuyiisha.

¹⁸⁹ Monaayi, monaayi eci, mùdici cilenga cya dikema! Kaa, ndi munange aci. Nudi bamanye’s, ki ndekeelu wa byònsò, Pàlò kwambaye ne: “Patuka!” Nzambi ùvwa ufuma ku dimutuuta bipupu, ku dîyì dya Mòsà. Ùvwa mutuute bintu byònsò. Yèyè wàkenza cyònsò civwàku ne cya kwenjiibwa aci. Yèyè kwimanyika. . . yèyè kubweja dîbà, mu nkànkala wa muunya. Yèyè kwenza bikwabo byònsò. Yèyè—yèyè kuvwija kutooke kulwaku mìdimà. Kutwàlayè ndimbà, nkùpà, nkùsù, bikwabo byònsò, kapya, mwìshi, ne lufu mu famiye yèndè, ne bikwabo byònsò. Kwenzaye byònsò mu mushindu wa ne, ndekeelu wa byònsò, Pàlò kwenzejiibwaye bwa kwamba ne: “Pàtukàayi! Angataayi byònsò binùdi naabi, kwata njila ndàayi.” Kaa, ekelekele! Butumbi bwikalè kùdi Nzambi’s we!

¹⁹⁰ Ndi ne disanka dya ne muntu ùdi mwa kukwacila Nzambi mudimu anu menemene mu mushindu wa ne yèyè, dyabulu, kàyi umanya cidì mwa kwenza nendè to. Ncya bushuwa. Yèyè wàkatùmikila Nzambi anu menemene mu mushindu wa ne dyabulu kwambaye ne: “Kaa, ekelekele, nkàtùkilè apa! Ncyèna—ncyèna muswe kubiteeleja kabidi to.” Ncya bushuwa. Wèwè’s udi mwa kucyenza, anu menemene.

¹⁹¹ Monaayi mpindyewu, bu ne—bu ne Nzambi kàvwa mutwe Mòsà nyama ku mikolo to, dîbà adi’s yèyè ùvwa ùshààla kadingidingi kàà kusekabo. Kadi Nzambi ùvwa mwaba awu

mene, munkaci mwa kushindika. Byônsò bìvwàye wàmba, bìvwa byenzeka.

¹⁹² Nenku bìvwa bikengela bwa Pâlò kushààlayè mwele nzadi mu kaaba kèndè, bwalu yèyè ùvwa mwepiskopo, nudi bamanye's, pa nanku kukengelabi bwa yèyè—yèyè kushààla mwaba awu. Kàvwakù mufwànyine kubènga to. Kàvwakù mufwànyine kwamba ne to to, bwalu cìkaavwa munkaci mwa kwenzeka. Nwamonu anyì? Kàvwakù mufwànyine—Kàvwakù mufwànyine kucibènga to, bwalu cìkaavwa munkaci mwa kwenzeka. Ki ndekeelu wa byônsò kwambaye ne: “Kaa, anji anu kupatuka! Ncyèna muswe kukuteleja kabidi to. Patuka mwab'ewu! Angataayi byônsò binùdi naabi, kwata njila ndàayi!” Kaa, ekelekele!

¹⁹³ Mpindyewu tudi tusangana Mòsà, mwaba ewu, paanyima pàà Nzambi mumane kumwenzela bintu bipite bùngì, ne mumane kumuleeja bimanyinu ne maalu a kukema bùngì cyanàànà. Mpindyewu, mu tusunsa dikumi ne tutaanu tùdi tùlondà etu, twànjàayi kwadija cyôci eci kaaba aka. Nenku tàngilààyaaku ne ntema ya menemene. Mòsà kufikaye pa kaaba aka pàvwàye . . .

¹⁹⁴ Nzambi ùvwa mwambe ne: “Mémè ndi neebe. Méyì èbè àdi Dìyì Dyànyì. Ngaakujaadikidici, Mòsà. Wèwè, pàvwàku kakùyì njijji mu ditunga, mùvwa mmu cikondo cya kaciyi cyàyi to, kadi wèwè kwamba ne: ‘Kùlwe njijji,’ ne kulwaku njijji.” Aci's ndifùka's. Nganyì udi mwa kukùlula mwìdimà pa buloba, pa kuumusha Nzambi? Kwambaye ne: “Kwikalè mwìdimà,” ne kwikalaku mwìdimà. “Wèwè kwamba ne: ‘Kwikalè ndimba,’ ne ndimba kubwelayi too ne mu nzubu wa Pâlò, mu malaalu, ne pààkayùngwijàbo mishikì minene.” Mufuki's! “Nenku Mémè kwakwila kùdi wèwè, Mòsà, ne—ne kwenza ne Dìyì Dyànyì difukile ku mishiku yèbè wèwè aku. S'Ndi mukuvwije nzambi anu cya bushuwa kumpala kwa Pâlò.” Eyowa's, mukalenge. “S'Ndi mwenze byônsò ebi.”

¹⁹⁵ Nenku kufikabo mwab'ewu pa kaaba kàà ne, diteeta dikese kjuukadi, ki Mòsà kubangaye dyela mbila ne: “Nèngènzè cinyi?”

¹⁹⁶ Ndi muswe bwa nùmonàayi. Edi ndileesona dinene kaaba aka mpindyewu. Mémè ndi munange cyôci eci, nwamonu's. Nwamonu's, Mòsà, twètù babale mu mushindu mwimpè kaaba aka, bwa ne Mò- . . . Dìbà adi, bânà abu kubangabo kupeta bwòwà, pààkamònàbo Pâlò wenda ulonda, mu njila wa mudimu amu.

¹⁹⁷ Nzambi ùvwa mwenze byônsò mu mushindu mupwangane. Mpindyewu Yèyè kubàashisha lwendu. Kusangisha ekeleeziya kaaba kamwe. Bàkaavwa babiikidiibwe bwa kupatuka. Bàvwa bafumine mu dingumba ne dingumba dyônsò. Bààkadisanga

bònsò. Mòsà wàkaalukila paanyima apu, e kwambaye ne: “Mukalenge, cîndi ne cya kwenza ncinyi?”

198 Yêyè's ùvwa mufwànyine kwamba ne: “Ee, nda kenza *cikampanda*.” Eyo, tungunuka. “Mpindyewu, Mòsà, wêwè's udi mumanye ne Ndi mukubiikile mbwà kwenza cyôci eci.”

“Eyowa's, Mukalenge.”

199 “Eyo, nda wămbè *cikampanda*, ne necyenzeke,” ki njiji yàlu eyi. “Akula bwa *cikansanga*,” ki cyôci cyàlu eci. “Enza *cikankenga*,” ki cyôci cyàlu eci. Byònsò bivwa EMU MMÛDÌ MUKALENGE WÀMBA, EMU MMÛDÌ MUKALENGE WÀMBA, EMU MMÛDÌ MUKALENGE WÀMBA! Mpindyewu kubwelaye mu lutatu kampanda. . .

200 Ki Nzambi kwamba ne: “Mpindyewu nyewu Ngăbăshishi lwendu. Bònsò mbamane kubiikidiibwa bwa kupatuka. Ekeleeziya ũkaadi kaaba kamwe, pa nanku Ngăbăshishi lwendu. Mpindyewu, Mòsà, ndàaku naabo kuntwaku. Mêmè ngudi mukwambile bwa kucyenza. Nêngănji kusòmbela panshi bwa kwikishaku ndambu.”

201 Mòsà kwambaye ne: “Éyi Mukalenge, tangila cìlwalwà cyacya, s'ki Pâlò ulwàlwa ewu! Bantu bàdi bònsò. . . Cîndi ne cya kwenza ncinyi? Cîndi ne cya kwenza ncinyi?” Monaayi kuntwaku, kî nngiikàdìlù wutu nendè bantu anyi? Eyowa's, mukalenge. Kubangaye kwela mbila ne: “Cîndi ne cya kwenza ncinyi?”

202 Mwaba ewu tudi tumona Mòsà ùpàtula patooke, ngiikadilu anu wetu wa buntu ewu anu pa yêyè, ùkèba misangu yònsò anu bwa Nzambi apite paanyima peebe ne akusake mu cintu kampanda. Mpindyewu, s'ki twètù abu leelu ewu. Udi muswe bwa Nzambi, paanyima pàà twètù bamane kumona byònsò bitùdi bamone ebi, nansha nanku wêwè udi anu muswe bwa Nzambi akusake bwa kwenza cintu kampanda. Nwamonu anyi?

203 Mòsà kwanjiye kupeta anu kalèngù, kwambaye ne: “Nzambi, nêngănji kuKukonka, mmonebi cyùdi Wêwè wamba. Eyowa, eyowa, Wêwè udi ucyamba. Ee, eyo, nêncyămbè pàanyi.” Nwamonu anyi?

204 Kadi mwaba ewu Nzambi ùvwa mumujidile bwa mudimu awu, mujaadike ne Yêyè ùvwa nendè. Kadi ki yêyè ewu's, bwalu abu bùjuuka, ne dîbà adi yêyè ùbanga kwela mbila ne: “Cîndi mwa kwenza ncinyi? Mukalenge, cîndi mwa kwenza ncinyi?”

205 Mpindyewu nudi bavuluke ne, yêyè ũkaavwa mumane kwamba ciprofeta kaaba aka, bwalu ùvwa mwambe ne: “Beena Ejiipitu banùdi numona leelu ewu aba, kanwakubamonaku kabidi to.” Kadi pashiishe ùbanga dyakamwe kwela mbila ne: “Nzambi, cîndi mwa kwenza ncinyi?” Nwamonu anyi? Paanyima pàà yêyè mumane kwenza mudimu mulenga wa dikema mu kwamba kwa ciprofeta mwaba awu. Nudi numona's, pèndè

mumane kubambila cìvwà mwa kwenzeka's. Pìikalàbi ne Diyì dya Nzambi òvwà munda mwèndè, Dìvwà munda mwèndè. Ne pàvwàye munkaci mwa kwamba cyòcì aci apu, s'cyakenzeka anu cya bushuwa. Cìvwàye mwambe cìkaavwa cìmanè kwikala cyènda cìkùmbana, kadi ki yèyè awu munkaci mwa kwela mbilà ne: "Cìngìikalà mwa kwenza ncinyi?"

206 Kaa, pìikalà aci kaciyi bantu beetu bàà maci ne mèsù aba! Pìikalà aci kaciyi mèmè's! Pìikalà aci kaciyi mèmè ewu! Nwamonu anyi?

207 Yèyè's ùkaavwa mumane kujaadika ne: "Cìwàmbà aci necyenzeke. Mèmè Ndi neebe."

208 Kadi apa bwalu kukùtuka musangu wumwe. "Cìndi ne cya kwenza ncinyi? Cìndi ne cya kwenza ncinyi, Mukalenge? È, Mukalenge, Wèwè udi penyi? È, Udi munteeleje anyi? Cìndi ne cya kwenza ncinyi?" Ne Yèyè ùkaavwa mumujidile yèyè mu mudimu, ne mumushindike, ne mumujaadike ne mwenzele bintu byònsò kùdiye yèyè aku. Kadi apa: "Nzamyè?" Kaa, ekelekele! Ùjikula patooke, muntu mmuswe yèyè kwikisha ne kulekela Nzambi umusaka.

209 Kadi, pààbì, yèyè's ùvwa mumanye ne Nzambi ùvwa mumwele maanyì bwa wòwò mudimu ewu, bwa kwenzaye cyòcì eci, ne Nzambi ùvwa mushindike mèyì èndè bitooke tòò. Dìbà dikaavwa dikumbane bwa cisàmbà kusungidiibwaci. Nzambi, ku bimanyinu byèndè ne maalù a kukema, ùkaavwa mubakoke bònsò mubasangishe kaaba kamwe mu cisumbu cimwepele. Nudi nundonda anyi? Mubàsangishe bònsò kaaba kàmwè mu cisumbù cimwepele, mushindike mèyì èndè. Mifundu nyidì myambe nanku; s'ki cimanyinu cìvwàpu, s'ki cìleeji cìvwàpu eci kaaba aka, byònsò byakambaye abi. Pashiishe kulwaye munkaci mwabo bu muprofeta. Misangu yònsò, cyònsò cìvwàye wàmba, Nzambi ùvwa ùcìtwa musinga, nansha kufùka ne kupatula njiji, ne wàmba bwa bintu kwikalaku. Ne byònsò bìvwàYe mumulaye, s'ki Yèyè wabyènji ewu.

210 Kadi yèyè ùvwa muswe kwikala mwindile EMU MMÙDÌ MUKALENGÈ WÀMBA. Nwamonu anyi? S'bìvwà bikengela bwa kwikalaye mumanye ne dishindika diine dya dibìkidiibwa dyèndè adi òvwà ng'EMU MMÙDÌ MUKALENGÈ WÀMBA. Mudimu wèndè wùvwà mumulongolwela wùvwà EMU MMÙDÌ MUKALENGÈ WÀMBA. Nudiku mwa kucyumvwa anyi? Hum! Mbwà cinyi bùvwàye wìndila EMU MMÙDÌ MUKALENGÈ WÀMBA?

211 Yèyè ùvwa muswe bya ne: "Mukalenge, cìndi mwa kwenza ncinyi? S'ki mèmè wapatulu bàrà aba kaaba aka ewu, too ne mwaba ewu. Bwalu bùdì bwenzèke's mbwòbù ebu, Pàlò nyawu wìya. Bònsò's nebafwe. Cìndi ne cya kwenza ncinyi? Cìndi ne cya kwenza ncinyi?" Hum! Hum!

²¹² Yèyè ùkaavwa mudyanjile kwamba cìvwàbo mwa kwenza. Ùkaavwa mumane kwamba anu menemene cìvwà bwalu, bwa kucyenza. Ùkaavwa mudyanjile kwamba ndekeelu wa ditunga diine òvwàye mukoleshiibwemu adi. Ndi ntekemena ne nudi nuumvwa's. Huh? Mòsà ùkaavwa mumane kwamba ne: "Kanwakubamonaku kabidi to. Nzambi neikalè mwa kubabutula. Bòbò bǎnwélùlwidì ntanta mule byǎkùmbanyi. Nzambi neababutule." Yèyè ùkaavwa mudyanjile kwamba cìvwà mwa kubzenkela.

²¹³ Pashiishe ne: "Mukalenge, cìndi ne cya kwenza ncinyi?" Nudi numona ngiikadilu wa buntu mwaba awu anyi? Nwamonu anyi? "Cìndi ne cya kwenza ncinyi? Nèngìndilè EMU MMÙDÌ MUKALENGE WÀMBA." Eyowa's, mukalenge. "Nèmmònè cìdì Mukalenge wàmba, pashiishe, nèncyènzè." Huh!

²¹⁴ Vùlukàayi ne, kùvwa kjuuuke pàlò kampanda uvwa kàyi mumanye Yozefu to, nudi bamanye's, mu cikondo aci, anu pa dǐbà adi mene. Nwamonu anyi? Nwamonu anyi? Ki Mòsà kjuuka buludi e kudyanjila kwamba ndekeelu wa ditunga adi.

²¹⁵ Kadi's ki yèyè ewu usanganyiibwa anu mu mwaba mene wùvwà wùkèngelà bwa kwenzekaci, dǐbà adi kwelaye lubila ne: "Cìndi ne cya kwenza ncinyi, Mukalenge? Cìndi ne cya kwenza ncinyi?" Nwamonu anyi? Aci kǐ ncyà bantu beetu bàà maci ne mèsù aba anyi? Aci kǐ ng'anu ngiikadilu wa buntu ewu anyi? "Cìngènzà ncinyi?" Huh!

²¹⁶ Yèyè, ùkaavwa mumane kwamba ciprofeta. Nzambi ùkaavwa mutwatwatwe mushinga byònsò bìvwàye mwambe, ne yèyè ùvwa mubiikidiibwe bwa mudimu awu, pa nanku mbwà cinyi bwakakengelabi bwa kwambaye ne: "Cìndi ne cya kwenza ncinyi?" Kùvwa dijinga kampanda; bwalu bùvwa anu bulaale kùdiye yèyè bwa kucyambaye. Nzambi ùvwa muswe bwa ne Mòsà, dipà dya diitabuujà òvwàYe mumupeshe adi, ateeke dipà adi ku mudimu. Nzambi ùkaavwa mudishindike. Dìvwa Bulelela.

²¹⁷ Ne Nzambi ùvwa muswe bwa Mòsà, muswe bwa bantu kumonabo ne, Yèyè ùvwa ne Mòsà.

²¹⁸ Nenku yèyè, paanyima pààpa, kwindilaye: Wàmba ne: "Mpindyewu, Mukalenge, mèmè ndi anu mwànà wa mu diboko, ndi ndekela bwa Wèwè ungambile mpindyewu. Eyowa, mèmè nènye kenza *cikampanda*. Ndi ne EMU MMÙDÌ MUKALENGE WÀMBA."

"Mwaneetu, aci ng'EMU MMÙDÌ MUKALENGE WÀMBA anyi?"

"Eyowa's, eyowa's, Mwaneetu Mòsà, aci's ng'EMU MMÙDÌ MUKALENGE WÀMBA. Eyowa's."

"Eyo, bwa mpindyewu kaayi twacyümvù, EMU MMÙDÌ MUKALENGE WÀMBA."

219 Ki kwenzekaci. Kacya kacyakapangilaku musangu nansha wumwe to. Kacyakapangilaku to.

220 Kadi's ki cyòci eci mu maalu àdi enzeka, cijjuuke cyakabidi. Mpindyewu Yèyè mmumuteeke mu lwendu. Ekeleeziya ùkaadi mumane kubiikidiibwa bwa kupatuka, mubateeke mu lwendu, ne bôbò bàyaaya kumpala. Ki Mòsà kubanga kwela mbila ne: "Mukalenge, ng'EMU MMÙDÌ MUKALENGE WÀMBA anyi? Cìndi ne cya kwenza ncinyi?" Eyo.

221 Nzambi ùvwa muswe bwa Mòsà kwikalaye ne diitabuuja, òvwaYe muteeke munda mwèndè adi, mu dipà òkaavwàYe mumane ku—kushindika bitooke tòò adi. Nzambi ùkaavwa mujaadikile Mòsà ne bantu ne ùvwa n'Yèyè, ku Dìyi ne ku bintu bikaavwà byambiibwe biikàle byenzeke. Cìvwa cimanyishiibwe bitooke tòò. Kakùcìvwa kabidi bwalu bwa yèyè kutacishila meeji bwa cyòci aci nansha. Nwamonu anyi? Kakùcìvwa kabidi bwalu bwa kwelaye meeji pa nî ncinyi nî ncinyi bwa bwalu abu to, bwalu cìkaavwa cimana kutookesha. Yèyè ùkaavwa mumane kwenza bintu ebi. Ne yèyè ùkaavwa mumane kujaadika, ku njiji ne nkùpà ne, yèyè ùvwa ùfùka bintu ku dyamba dya dìyi, ne Dìyi dya Nzambi òvwa munda mwèndè.

222 Nenku ki yèyè uyààya kakonka mpindyewu cya dyenza ewu, pàdi maalu àdi enzeka awu àsanganyiibwa kumpala kwèndè mene. Nwamonu anyi? Kaa, ekelekele!

223 Ndi ntekemena ne eci cìdi cìpweka anu menemene munda mwetu, ne twètù netwìkalèku mwa kumona mwaba wutùdi. Nwamonu anyi? Kacyèna cinufikishaku ku didyumvwa bunene *nunku* anyi? Patùdi twela meeji ku Mòsà twamba bilema byèndè apa, kadi tàngilàayi byetu twètù. Eyowa's. Nwamonu anyi?

224 Ki yèyè kaaba aku awu, mwimane mwaba awu, nwamonu's, mumanye ne Mifundu yìvwa yamba ne ki dìbà adi ne dituku bwa cyòci aci kwenzekaci, ne mumanye ne Nzambi ùvwa mutuutakeene nendè mu Dikunji dya Kapyà. Ne Dyòdi dyakaya buludi kumpala kwa cisàmbà ne dyakenza bishima ebi. Ne cyònsò cìvwa yèyè wàmba, cìvwa cyenzeka, nansha mene too ne ku difikisha dya bintu ku difùkiibwa. Mwikàle wènza bintu bìvwa anu Nzambi nkààyendè mwa kwenza, biikàle bileeja ne dìyi dyèndè òvwa Dìyi dya Nzambi.

225 Nenku ki bwalu mbwòbù ebu bùvwa bwènzekà ne cisàmbà cìvwa yèyè ujuula aci, ùya naaci ku buloba bulaya, ki pashiishe kushàalayè mwimane, wèla mbila ne: "Cìndi ne cya kwenza ncinyi?" Awu's muntu's, ùkèba anu bwa . . .

226 Mùvwa Mwaneetu Roy Slaughter, ngeela meeji ne yèyè mmusòmbe pambelu pàa ciibi pààpa, ùvwa ùngambila musangu kampanda, bwa muntu uvwa ungenza cintu kampanda. Ki mèmè kwamba ne: "Ee, mèmè ntu mwenze *cikampanda*, mpindyewu ki cyòci aci."

227 Kwambaye ne: “Mwaneetu Branham, lekela beeyemene pa dikaaya dyèbè leelu, nenku mààlabà neùbàmbùlè.” Nenku aci’s ki mushindu menemene wùdì bantu. Bèèyemena pa dikaaya dyèbè leelu, ne mààlabà wèwè ubàmbula.

228 Ki cyòcì aci, ki cìvwà Mòsà wènza ncyòcì aci. Byakakengela bwa Nzambi amwambule mu lwendu lwònsò amu paanyima pàà Yèyè mumane kumujidila mu mudimu ne mumujaadikileci bwa kucyenza. Ne bìvwa bikengela bwa bantu kwikalabo bambe ne: “Mòsà, amba díyì’s. S’nkaadiku mukumone ucyenza kuntu *kwaka*. Nzambi’s ùvwa mukutwe mushinga kuntu kwaka, ne wèwè’s udi umwèumwè awu leelu ewu.” Amen. Nwamonu anyi? “Cyènzààku’s!” Amen. Bìvwa bikengela bwa kwikalaye mucimanye, kadi kàvwa mucimanye to. Èyo. Anu menemene mwakadibi musangu awu, ki mùdibi kabidi mpindyewu. Tudi tucijandula, nanku awu. Pa nanku Yèyè kwamba ne: “Mò- . . .”

229 Bìvwa ne cya kwikala anu bitonde Nzambi. Bìvwa ne cya kwikala bifiikile ne Nzambi ku mwoyi. KwambaYe ne: “Udi wela mbila kùNdi bwa cinyi? Ncyènàku mumane kujaadika dimanyishiibwa Dyànyì anyi? Ncyènàku mukwambile ne Ndi mukutume bwa mudimu awu anyi? Ncìvwakù mukwambile bwa kuya kenza cyòcì eci anyi? Ncìvwakù mulaye ne Nèngènzè cyòcì eci, ne Nèngùikalè ne mukana mwèbè, ne Nèngààkwilè kùdì ne Nèngènzè cyòcì eci, ne wèwè neuleeje bimanyinu ne maalù a kukema anyi? Ncìvwakù mulaye bwa kucyenza anyi? Ncyènàku mwenze anu menemene, ne mubutule mwena lukuna yònsò mu nyungulukilu webe anyi? Kadi ki wèwè ewu mwimane kaaba aka mpindyewu, ku Mbù Mukunze eku, mu njila wa mudimu mene, cìmvwà Mémè mukwambile bwa kwenza aci, ki pashiishe mutungunuke anu ne kwela mikunda ne kwela mbila kùNdi. Kwèna uNgiitabuuja anyi? Kwènàku mwa kumona ne Ndi mukutume bwa kwenza cyòcì eci anyi?” Kaa, aci cyòcì kaciyi muntu’s! Ekelekele! Pa nanku bìvwa ne cya kwikala biMufiikile anu ku mwoyi menemene.

230 Ki Yèyè kwamba ne: “Wèwè’s udi mumanye ne ki cìdì cìkukèngela. S’udi mumanye ne pawikalà mwa kuya ne bânà aba ku buloba bulaya abu, ncyòcì menemene, nyewu ukàadi mucincimikila mu ditumba emu, kakùcìyikù cintu cìkwabo nansha cimwe cyùdì mwa kwenza to. Pa nanku’s kùdì dijinga kampana. Cyùdì welela mbila kùNdi ncinyi? Cyùdì utangidila Kùndì ncinyi? Cyùdì uMbiikidila ncinyi? Ncyènàku mucijaadikile bantu anyi? Ncyènàku mukujaadikileci wèwè anyi? Ncyènàku mucibiikile anyi? Kì ncyà mu Mifundu anyi? Ncìvwakù mulaye bwa kuya ne cisàmbà eci ku buloba abu anyi? Ncìvwakù mukubiikile mukwambile ne Nèncyènzè anyi? Ncìvwakù mubiikile mwambe ne Mvwa mukutume bwa wèwè kucyenza, bwa ne kàvwa ngwèwè to, ùvwa m’Mémè anyi? Ne Mvwa mwa kuyaku ne Mvwa mwa kwikala ne mishiku yèbè, ne

cyònsò cyúvwà wamba, Mwya mwa kucishindika ne kucijaadika. Ncyènàku mucyénzè anyi?

231 “Dìbà adi, kantu kakese kanà kònsò kòkò anu kajuukè, udi wenza maalu bu mwànà wa mu diboko bwa cinyi? S’bivwa bikengelaku bwa wêwè kwikala muntu mukole. Akula ne cisàmbà,” amen, “pashiishe nda kumpala!” Amen. S’ki bwalu mbwòbù abu. “Kwedi mbila to. Akula!” Amen. Kaa, ndi muswe aci. “Cyùdì welela mbila kùNdi ncinyi? Akula anu cyanàànà ne cisàmbà uye kumpala mutangile ku kiipacila kèèbè. Nansha ciikàle cinganyì, cyòci ciikàle bubeedi, anyi nî ncinyi cyònsò, kubiisha kwa bafwe, anyi nî ncinyi cyònsò, akula! Mémè’s nkààdi mucijaadike. Akula ne cisàmbà.”

232 Dileesona kaayi’s we! Dileesona kaayi’s we, kaa, ekelekele, mu citupa cya lwendu mutùdì biimànyine emu. Tangilaayi mwaba wutùkaadi tusanganyibwa patùdì twakulangana apa, eyowa’s, mukalenge, ku Nkòkelu Mwisàtù. Monaayi, tudi tusanganyibwa apa mene, ku ciibi cya Dilwa dya Mukalenge.

233 Yèyè wakeediibwa maanyì bwa mudimu awu, kadi mucikàle anu mwindile EMU MMUDÌ MUKALENGE WÀMBA. Bivwa anu ne cya kwikala bitonde Nzambi. Yèyè kwamba ne: “Kwedi kabidi mbila to. Akula! Mémè ngudi mukutume.”

234 Éyi Nzambi wa yààyà, cìvwà cìkèngelà bwa Ekeleeziya ewu kwikalaYe mu dinda emu aci’s we! Mwikàle ne dishindika dipwangane dya Nzambi, mwikàle ne Dikunji dya Kapyà ne bimanyinu ne maalu a kukema, byònsò anu mùvwàbi mu matuku a Sodoma amu. Yèyè’s mmwambe ne nebyalukile.

235 S’ki buloba mbwòbù ebu mu ngiikadilu wabù awu. S’ki ditunga ndyòdì adi mu ngiikadilu wadi awu. S’ki bakaji mbòbò abu mu ngiikadilu awu. S’ki balume mbòbò abu mu ngiikadilu awu. S’ki ekeleeziya nyèyè awu mu ngiikadilu awu. S’ki bintu byònsò mbyòbi abi. Bintu, bimanyinu, tuumàlòngò tùdì túbùuka muulu ne bikwabo byònsò mu maulu, ne bintu bya mishindu yònsò bya kabiyi byumvwika abi, ne mbù ukungula, mavwala a màyi a mbù, myoyi ya bantu yàmba kwimana munda, bwòwà, dipampakana dya cikondo, dikenga munkaci mwa matunga, ekeleeziya ùpidya diitabuuja.

236 Ne muntu wa mpekaatu ùjuuka, yèyè udi mudibàndishe kumutu kwa byònsò; udibo babiikila ne n’Nzambi awu, yèyè udi musòmbe mu ntempelu wa Nzambi awu, ùdileeya yèyè mwine, kaa, ekelekele, ne mmulwe mu ditunga edi. Ne ekeleeziya ùkaadi mudivwije bulongolodi, ne yònsò yikaadi midisange pamwe, bu ndumba milela kùdì mukaji wa masandi, ne byònsò menemene anu mu njila wa bundumba.

237 Bundumba, ncinyi? Bàmbila bakaji ne bàdi mwa kukosa nsuki yabo, bàmbila bakaji ne bàdi mwa kuvwala tuputulu, bàmbila balume ne bàdi mwa kwenza *bikampanda* ne bàdi mwa kwenza *bikansanga*; ne bayiishi, bàdi bènza *bikampanda* abu, ne

evanjeeliyo wa nsòmbelu mulenga ne bikwabo. Kanwenaayiku numona anyì, aku's nkwenda kwa masandi ne Dìyì dya Nzambi dilelela!

²³⁸ Nenku Nzambi mmututumine Dìyì Dyèndè dilelela, dibèngangana ne mangumba, kadìyì ne myonji miDiswike to, ne mutupeeshe Dikunji dya Kapyà, Nyuma Mwîmpè udi neetu mpindyewu awu kùkaadi bidimu makumi asatu. Ne byònsò bitùYe mudyanjile kwamba ne mwambe abi, mbyenzeke anu menemene mushindu wùvwàYe mubyämbè.

²³⁹ Akulaayi ne cisàmbà, ne tuyaayi kumpala. Amen. Twètù tudi ne kiipacila, m'Butumbi. Tuyaayi batangileKu. Twètù tuyààya batangile ku Buloba bulaya. “Bintu byònsò bìdi mwa kwenzeka bwa aba bàdi bìitabuujà.” “Akula ne cisàmbà. Mémè ncyènàku mucijaadike anyì? Ncyènàku muDikwacishe mene ne fòtò munkaci mwenu, ne bikwabo byònsò, ne mwenze byònsò bìvwà mwa kwikala byenjiiibwe, bwa kujaadika ne Ndi neenu anyì? Bikandakanda, anu mbingu mikese yìdì panshi eyi, kì mbipatuleku bwalu abu, paùvwà mwambe ku cyambilu eku cìvwà mwa kwenzeka kaaba aka, ne ciine aci ngondo yisatu kumpala, ne kuyabi byenda byenzeka ne bishindikiibwa anyì? Nansha beena maalù a mamanya mbamanye bwalu abu. Ne byònsò bìNdi mwenze abi, kadì wèwè ucidi anu mwindile. Akula ne cisàmbà uye kumpala ku kiipacila kèèbè.” Amen.

²⁴⁰ Natànà kaakambilaku Davidi anyì? Natànà, muprofeta, musangu kampanda musòmbe, mumone Davidi mfumu mwela maanyì awu, kwambaye ne: “Enza cyònsò cìdì mu mwoyi wèbè, bwalu Nzambi ùdi neebe.” Kwambilaye Davidi ne: “Enza cyònsò cìdì mu mwoyi wèbè. Nzambi udi neebe.”

²⁴¹ Yoshuwa ùvwa mwediibwe maanyì bwa kukwataye buloba abu bwa Nzambi ne bwa cisàmbà cyèndè. Dituku dyàkiipipa. Bìvwa bimukengela dìbà dyàbùngì bwa mudimu wùvweye mwediibwe maanyì ne mutumiibwe naawu bwa kwenza. Yoshuwa, muntu, ùvwa mwediibwe maanyì. Nzambi ùvwa mumwambile ne: “Anu mùMvwà ne Mòsà amu, ki mùNgìikalà neebe.” Amen. “Buloba abu, Nèngìikalè mwa kubapeeshabu. Nenku Ndi muswe bwa wèwè kuyamu bwa kukomba beena Amàlèkà, ne—ne beena Het-... Bakwabo bònsò—bònsò abu, beena Pelèshètè ne—ne beena Pelizi, ne bashiileshiilangane bònsò abu, bwa kubakomba bònsò. Mémè ndi neebe. Nèngìikalè mwa... Muntu nansha umwe kaakukukandameena nansha, matuku èbè ònsò a mwoyi. Muntu nansha umwe kèna mwa kukutacishaku to. Tungunuka ukabwele muntwamu.”

Ki Yoshuwa kupatula mwele awu mu cimanga ne kwamba ne: “Ndonààyi!”

²⁴² Ki kufikaye muntwamu, ne ki yèyè udi ulwangana mvita ewu. Kadì cìvwà ncinyi? Kutangalajaye balwishi e kuyabo bimpàmbàmba. Kwikalabo tusumbu tukese *apa* ne tusumbu

tukese *pààpa*. Pàvwà bufuku mwa kulwa, bàvwa bafwànyine bônso kudisanga ne kudyenza cimuku, kadi kulwa kumulwisha ne bukole bunene. Nenukù dîbà dîkaavwa dîya kabwela. Bîvwa bimukengela bukwbabo bukênkè bwa dîbà. Dîbà dîkaavwa dîya kabwela. Yèyè kaakatwa binù kwamba ne: “Mukalenge Nzambi, nêngènzè cinyi? Nêngènzè cinyi?” to. Yèyè wakaakula! Ûvwa ne dijinga kampanda. Wàkamba ne: “Wèwè dîbà, imana kaaba kamwe!” Kààkeelakù mbila ya cyanàànà ayi to. Wàkatùma dîyì ne: “Wèwè dîbà, imana kaaba kamwe! Ndi ne dijinga dya cyòcì eci. Ndi musadidi wa Mukalenge, mwela maanyì bwa mudimu ewu, ne ndi ne dijinga kampanda. Imana kaaba kamwe, ne kufidiku nsèsà. . . Ne wèwè, ngondo, shààla mulembele anu mwaba wùdì awu,” too ne mwakalwanganaye mvita ayi too ne kundekeelu ne kucimunaye cintàkanyì cyònsò aci nkòong. Ki dîbà pààdì kumba kumutumikiladi.

²⁴³ Kakùyi bya dyela dya mbila abi to. Yèyè wàkaakula ne dîbà, wàmba ne: “Imana kaaba kamwe. Wèwè dîbà, shààla mulembelele mwaba awu! Ne wèwè, ngondo, shààla mwaba wùdì awu.” Kààkeelakù mbila ne: “Mukalenge, mpindyewu cîndì mwa kwenza ncinyi? Mpèèshèku bukwbabo bukênkè bwa dîbà” to. Ûvwa dijinga ne bukênkè bwa dîbà, pa nanku yèyè kudituminaye dîyì, ne dîbà dyakamutumikila. Kaa, ekelekele! Yèyè wàkatùmina dîbà dîyì bwa kwimanadi kaaba kamwe.

²⁴⁴ Shimishoona, mwela maanyì, mujuula, mujidila mu mudimu kùdì Nzambi, mupeeshiibwe dipà dya bukole, wàkajidiibwa mu mudimu bwa kubutula ditunga dya beena Pelèshètè. Mujidila mu mudimu, mulela pa buloba, mwela maanyì kùdì Nzambi, bwa kubutula beena Pelèshètè. Nenukù dîngà dituku kumujikidilabo mu budimi, kàyi ne mwele wèndè wa mvita, kàyi ne difuma. Kadi cinunu cijima cya beena Pelèshètè bawwàle bya mvita ne ku mènù abu kulwabo lubilu e kumwicikidilabo dyakamwe. Yèyè wàkatwàku binù kwamba ne: “Éyì Mukalenge, ndi mwindile cikeena-kumona. Éyì Mukalenge, cîndì ne cya kwenza ncinyi? Ndombòlàku mpindyewu bwa cya dyenza” anyi? Yèyè ùvwa mumanye ne ùvwa ne dijinga kampanda. Yèyè kaakapeta cintu nansha cimwe to pa kuumusha mufuba wa kale wa lubanga lwa kampundu, ki kushebeyaye beena Pelèshètè cinunu. Amen!

²⁴⁵ Yèyè kaakeelaku mbila kùdì Nzambi nansha. Wàkakwàta mudimu ne dipà dyèndè dyela maanyì adi. Ûvwa mumanye ne yèyè ùvwa mutumiibwe mbwà mudimu awu. Ûvwa mumanye ne yèyè ùvwa mulediibwe mbwà cyòcì aci. Ûvwa mumanye ne yèyè ùvwa mwela maanyì ne dipà kampanda, ne kushebeyaye beena Pelèshètè cinunu. Kaakeelaku mbila kùdì Nzambi to. Nzambi ùvwa mumujidile mu mudimu ne mumushindike ciwàye aci, ku bikwabo bintu bîvwàye mwenze. Ne yèyè ùvwa musadidi wa Nzambi mushindikiibwe, mwela maanyì, bwa kubutula beena Pelèshètè, ne wàkacyènza. Maalu àvwà ènzekà nansha miikàle bishi, yèyè wàkacyènza. Kaakalombaku kantu nansha kamwe to.

Cìvwa mmudimu wèndè wà ne, Nzambi ùvwa ùkwàcila mudimu kùdiye, wàmbuga mufuba wa kampandu awu ne ùbanga kutuuta beena Pelèshètè. Mushindu mwine. . .

246 Mona's, dituuta anu dimwepele dya ne ciine cintu aci, mu bucyama bwa bifulu bya cyamu cya kabanda bya mupimbu wa centimètres mitwe ku yinaayi abi mushindu ewu, s'dìvwa difwànyine kwikala disùnsùlùle mufuba awu mu tusunsukila mùliyô mujima. Kadi kubàtuutayè kubàzengeja cinunu cijima, ne kubàshebeyayè, cìbì mushààle anu kacya wìmana naawu mu cyanza.

247 Kaakeelaku nkonko to. Kaakeelaku mbila to. Wàkaakula. Wàkabànyeemesha e kuyabo bimpàmbàmba. Kaa, ekelekele! "Angata mwena Pelèshètè, ndi mwa kwangata beena Pelèshètè anyi, Mukalenge? Ndi—ndi mumanye ne Wèwè udi muntume bwa kucyenza, Mukalenge. Eyowa's, Mukalenge, ndi mumanye ne Wèwè udi muntume mbwà kubutula ditunga dya beena Pelèshètè edi. Mpindyewu mwaba ewu, bàdi cinunu cijima bannyungulukile, kadi pàànyì ncìyi ne cintu nansha cimwe. Cìngìikalà mwa kwenza ncinyi—ncinyi mpindyewu, Mukalenge?" Kaa, ekelekele! Kakwenaku cintu nansha cimwe cìikalà mwa kumutacisha to. Yèyè mmwediibwe maanyì bwa mudimu awu. Kakwenaku cintu nansha cimwe cidì mwa kukwenzela bibi to. To, nansha cimwe. Aleluuyah! Wàkangata anu cìvwaye naaci aci e kubatuutaye. Ncya bushuwa.

248 Mwena lukuna pààkamujìkilàye mu bimanu, wàmbuga ne: "Mpindyewu twàmupetèdi mu bimanu, apa kaayi twàmupeci mpindyewu. Twàmupetèdi munda emu yèyè ne mukaji ewu. Mpindyewu twakangi ciibi, ne mu nyungulukilu mwònsò, nenku kèna mwa kupatukaku to. Twàmupeci."

249 Shimishoona kaakeelaku mbila ne: "Éyi Mukalenge, nyewu bandaminyi mu bimanu emu nseke yònsò ne dingumba edi" to. Huh! "Uh, cìngìikalà mwa kwenza ncinyi? Nyewu ngaavu kushààla wa kùdìbo. Cìngìikalà mwa kwenza ncinyi?" Yèyè kaakenzaku nanku to.

250 Wàkaasa anu lwendu e kupatuka, kutuulaye ciibi aci, kucitentekaye pa dikaaya, ne kwasaye lwendu e kuya naaci. Amen! Ùvwa mwediibwe maanyì bwa mudimu awu. Ùvwa mubiikidiibwe kùdi Nzambi. Kabaakamujìkilakù mu bimanu to. To, nansha kakese! Yèyè wàkangata biibi abi e kuyaye naabi. Kaakasambilaku bwa bwalu abu to. Kaakakonkaku Nzambi ní bìvwa bikengela kucyenza anyi kubenga kucyenza to. Cìvwa anu mu njila wa mudimu mene. Amen, amen, amen! Anu mu njila wa mudimu mene. "Bwa cinyi kwela mbila kùNdi? Akula, utungunuke ne lwendu!" Amen! "Kwedi mbila to. Akula!" Ùkaavwa mulekele bya dinungana ne didididila dya mu mènù abi mpindyewu. Yèyè ùvwa ne cya kwikala bukulumpe bukumbane bwa kwakulaye. Ncya bushuwa. Yèyè

ùvwa mumanye ne dipà dyèndè dilaaba maanyì dya bukole adi òvwa mwa kubutula mwena Pelèshètè kanà yònsò uvwa umucyamakana kumpala awu. Amen.

²⁵¹ Kadi twètù katwena bamanye aci to, nudi numona's. Twètù tucìdi anu bânà bakese bàà mu maboko, ne kàlàngì kàà mabeele keela mukana.

²⁵² Yèyè ùvwa mucimanye, ùvwa mumanye ne Nzambi wàkamujuula bwa kiipacila aku, ne kakùvwakù cintu nansha cimwe cìvwà mwa kumukandameena to, matuku èndè ònsò a mwoyi. Cintu nansha cimwe kacìvwa mwa kumubutulaku yèyè to. Yèyè wàkajuudiibwa bwa kiipacila aku, bu mùvwà pèndè Mòsà. Cintu nansha cimwe kacìvwa mwa kumwimanyikaku to. Beena Amàlèkà nansha bàà munyi anyì cintu cikwabo nansha cimwe kaciyena mwa kumwimanyikaku to. Yèyè ùdi mu njila mutangile ku buloba bulaya. Shimishòònà ùvwa mumanye ne yèyè ùvwa mu njila.

²⁵³ Yoshuwa ùvwa mumanye ne neakwate buloba abu. Yèyè ùvwa mushindikiibwe. Dìyì dya Nzambi dyakacilaya, ne Nyuma Mwìmpè ùvwakù mwikàle ùcishìndika.

²⁵⁴ Yèyè ùvwa mu njila, pa nanku kakùvwa mwa kwikala cintu nansha cimwe cìvwa mwa kumucyamakana mu njila to. To, mukelenge. Anu mu njila wa mudimu awu mene, pamwe ne Nzambi, kakùvwaku cintu nansha cimwe cìvwa mwa kumucyamakana mu njila to. Pa nanku yèyè wàkambula anu biibi abi ne wàkabitenteka pa dikaaya, biine abi biikàle ne bujitu bwa kilò mitwe ku binunu binaayi anyì bitaanu, ne kuyaye wènda tamakatamaka too ne ku lusongo lwa kakuna ne kusòmbayè pòpò. Cintu nansha cimwe kacìvwaku mwa kumukandameena mu njila to. Yèyè ùvwa ne dipà dilaaba maanyì dya kùdi Nzambi. Kabyakakengela bwa kwelaye mbila ne: "Mukelenge, cìndi ne cya kwenza mpindyewu ncinyi?" to. Yèyè ùkaavwa mumane kwediibwa maanyì bwa kucyenza. Cìvwa ng'EMU MMÙDÌ MUKALENGE WAMBA. "Bùmùshè!" Aleluuyah! "Bùmùshè! Ndi mukujuule mbwà kiipacila aku." Amen.

²⁵⁵ "Cìndi ne cya kwenza ncinyi, Mukalenge? Eyo, cìngìikalà mwa kwenza ncinyi mwab'ewu ku Mbù Mukunze eku?"

²⁵⁶ "Ncìvwakù mukwambile ne Ngaakupeeshi mukuna kampanda bu cimanyinu pambelu apa anyì? Newalukile ku mukuna awu, ne neuye ne bânà aba too ne ku buloba abu. Ncìvwakù mukubiikile bwa kiipacila aku anyì? Cyùdi upampakeena ne cintu cikwabo kampanda necikucyàmàkàne mu njila ncinyi? Akula, ne asa lwendu!" Amen ne amen! "Eyowa's, Ndi mukubiikile mbwà kiipacila aka."

²⁵⁷ Davidi, yèyè ùvwa mumanye ne ùvwa mwela maanyì, ne ùvwa mushindikiibwe bwa kwikala mwena ndudì wa kalàndààmùsèngà. Ùvwa mumanye ne bòbò bàvwa bamanye ne

yèyè ùvwa mwena ndudì wa kalàndààmùsèngà. Davidi ùvwa mwela maanyì. Yèyè ùvwa mucimanye. Nenku paakiimanaye kumpala kwa Goliyàtà, kaakeelaku mbila to ne: “Éyì Nzambi, cìndì ne cya kwenza mpindyewu ncinyi? Indila, ndi—ndi ne cya. . . ndi mumanye ciWakenza mu bikondo bishààle. Wèwè, Wèwè’s ùvwa mumpeeshe mushindu wa kushebeya nyama wa ours, ne Wèwè kumpeesha mushindu wa kushebeya nyama wa ntambwe. Kadi bishi bwa Goliyàtà udi apa ewu?” Huh! Yèyè kaakenzaku aci to. Wàkaakula anu cyanàànà. Wàkamba cinyi? “Wèwè newikalè anu mùvwàyi. . .? . . .” Wàkaakula ne wàkaya kumpala.

258 Yèyè kaakenzaku disambila to. Kaakalambulaku cintu nansha cimwe to. Yèyè ùvwa mumanye ne ùvwa mwela maanyì. Amen. Yèyè ùvwa mwela maanyì, ne ndundu wa nyuunyi awu wàkamwènèka ne yèyè nguvwa cintu menemene cìvwà cìkèngediibwà. Ùvwa ne diitabuuja mu dilaabiibwa dyèndè. Ùvwa ne diitabuuja ne Nzambi ùvwa mwa kuludikila dibwe adi buludi anu munkaci mwa cifulu cya mvita aci amu, mùvwà mwaba wumwepele wùvwàdi mwa kwasa. Yèyè ùvwa mwimane mwaba awu.

259 Yèyè ùvwa mumanye ne ùvwa mwena ndudì wa kalàndààmùsèngà. Amen. Ùvwa mumanye ne Nzambi ùvwà mumwenze cyòcì aci. Amen. Ùvwa mumanye ne ùvwa mushebeye nyama wa ntambwe, ùvwa mumanye ne ùvwa mushebeye nyama wa ours, kadi aci cyakenjiibwa ne cintu cya tatwèndè wa pa buloba. Apa ncintu cya Tatwèndè wa mu Dyulu! Amen. Yèyè kaakatwaku binù ne: “Ndi ne cya. . . Cìndì ne cya kwenza ncinyi mpindyewu, Mukalenge?” to. Yèyè wàkaakula kwamba ne: “Wèwè newikalè anu mùvwà nyama wa ntambwe ne wa ours amu, kadi ki mèmè ulwàlwa ewu.” Amen! Butumbi kùdi Nzambi! Eyowa’s, mukalenge. Wàkaakula ne wàkaya kumpala bwa katuutakeena ne Goliyàtà ewu. Kaa, ekelekele!

260 Kàyì utangila bunene ne bule bwèndè abu to! Yèyè ùvwa kaamuntu kakese, kakunzubile, nudi bamanye’s. Kàvwa munene menemene to. Kàvwa mutambe kwikala mulenga kwìsù wa batangila to, kaamuntu kàà mushindu wa kakese menemene. Bible mmwambe ne yèyè ùvwa mukunzubile. Mpindyewu, kààkatangila bunene ne bule bwèndè abu ne bukole bwèndè bùvwàye wàmba bwa kwenza nanku abu to.

261 Nudi bamanye’s, mwe—mwepiskopo kumwambilaye, ne: “Mpindyewu tangila kuneeku, mwanàànyì wa balume, muntu awu mmwena teoloji. Nwamonu’s, yèyè mmulwanganyi wa mvita. Ùtu mulediibwe mulwanganyi wa mvita ne ùdi. . . Yèyè ùtu mulwanganyi wa mvita, kacya anu ku bwànà bwèndè; kadi wèwè kwèna mwa kwakamanganaku nendè to.” Ki bânà baabo bàà balume kwambabo ne: “Kaa, kaawèwè kantu cyanàànà aka, udi kalwè mwaba ewu bwa kwenza cintu bu nanku awu, alukila kumbelu wè.”

262 Aci kacyakamutacishaku to. Bwa cinyi? Ùvwa mumanye ne ùvwa mwela maanyi. “Nzambi ùvwa munsungile ku nyama wa ntambwe awu, Nzambi ùvwa munsungile ku makamà a nyama wa ours wawa awu, Yèyè neènzè bipita abi, neansungile kùdì mwena Pelèshètè wawa. Ki mèmè ulwàlwa ewu. Ndi ntwilangana neebe mu Dìnà dya Mukalenge Nzambi wa Izaleela.” Amen. Kaakasambila mufwileku to; yèyè ùkaavwa mumane kusambila mufwileku. Nzambi wakamusambidisha mufwileku kumpala kwa difùkà dya dyulu ne buloba. Yèyè ùvwa mwela maanyi bwa mudimu awu. Bùvwàye yèyè naabu bùvwa mbwà kwakulaye kadi kuya kumpala. Ki cyònsò cìvwàku cya dyenza pa bwalu abu, anu kwakula cyanààna kadi kuya kumpala. Kaa, ki cyònsò cìvwàku pa bwalu abu ncyòci aci. Kaa! Yèyè kàvwakù . . .

263 Pa bìvwà bitàngilà bânà bààbò bàà cyena-mangumba abu, baseki bàvwà pààbò biimane pààpa abu, bôbò pààbò, nudi bamanye’s. Kaa, eyowa’s. Bàvwà biimane mwaba awu bàmba, bàseka ne beelulwila, ne bàmba. . . Bânà bààbò bàà balume abu, nudi bamanye’s, bàmba ne: “Ha, ha, ha, kaawèwè kwenà mwa kwangulaku mpasu to. Kaawèwè, kaawèwè’s udi anu kantu cyanààna.” Aci kacyakamunyangishaku to nansha kakese. “Kaawèwè udi kaswe kwikala kashiilangane ne bakwabo. Cyùdi kaswe cìdi anu mbwà kudileeja cyanààna.” Bu ne cìvwa mbwà kudileeja, nunku’s mbyenzeke nanku. Kadi bôbò bàvwà batangila anu luseke lwa mamanya a mu mitu.

264 David ùvwa mumanye ne dilaabiibwa dya maanyi adi òvwa pambidi pèndè. Amen. Bwèndè yèyè kacìvwakù ne cìvwàci cìshintulula to. Kwambaye ne: “Mwena Pelèshètè wawa neikalè anu bu nyama wa ours ne wa ntambwe awu, pa nanku ki mèmè ulwàlwa ewu.” Yèyè wàkadyànjila kucyamba kumpala kwa kwenzekaci. Cìvwàye mwenze ncinyi? Ùvwa mushebeye nyama wa ours. Ùvwa mushebeye nyama wa ntambwe. Ùvwa mubyànkùle nyama wa ntambwe awu panshi ne. . . Nashiinyi? Ne—ne ndundu wa nyuunyi, ne wakangata keele, ne pashiishe nyama wa ours. Nyama wa ntambwe, ùvwa mushebeye nyama wa ntambwe ne keele. Cintu cimwecimwe aci ncyakenzaye Goliyàtà. Wàkamubyànkula panshi ne dibwe, ne wàkapàtula mwele wèndè mu cimanga, ne wàkamukòsa mutu wèndè yèyè mwine, mwaba awu mene kumpala kwàci. Cìkaavwàye mudyanjile kwamba kumpala kwa kwenzekaci ncinyi? “Ne wèwè newikalè anu bu yôyi ayi.” Bwa cinyi? Yèyè wàkaakula e kwamba dîyi ne necyenzeke, ne pashiishe kuyaye kumpala bwa yèyè kucyujija. Amen. Kaa, mwaneetu! Yèyè wàkaakula, ne wàkangata maalu awu ku bukontononyi bwèndè dituku adi.

265 Bu ne kùvwakù cikondo cìvwà cikengela bwa muntu kwakulaye, s’mpindyewu ewu. Nkààdi njikija, anu mu tusunsa tukese tùdì tìlondà etu bu nwènù mwa kutwalaku kabidi anu

ndambu wa tusunsa cyanàànà. Ndi ne bikwabo bintu ndambu bifunda kaaba aka, ndambu wa Mifundu kúndi njinga kufika.

²⁶⁶ Peetèlò kaakeelaku mbila to, paakasanganaye muntu mulume ùvwa ne diitabuja dikumbane bwa kwondopiibwa awu, mulààle ku ciibi ciwàbo babiikila ne Cilenga aci. Yèyè kaakatwaku binù ne kwenza disambila dya bufuku bujima, ne, anyi disambila dya dituku dijima, disambila dinene to, dileedile, ne kwambaye ne: “Mukalenge, ndi nKulomba mpindyewu bwa Wèwè kwambulwishaku mulema udi mukwate ne bya luse ewu. Ndi mmona ne ùdi ne diitabuuja. Ndi mumanye ne mmwena kwitabuuja. Ne ndi mumukonke, ne yèyè—yèyè. . . Ndi—ndi—ndi. . . Mmwambe ne ùdi ne diitabuuja, mmufwànyine kwitabuuja cingàamwambidì eci. Ne ngaamwambidi bwa. . . bwa byùdi Wèwè mwenze, ne ndi—ndi ngeela anu meeji cyanàànà mpindyewu, Mukalenge, ne—ne. . . udiku Wèwè mwa kumpeesha EMU MMÜDI MUKALENGÈ WAMBÀ bwèndè yèyè anyi?”

²⁶⁷ To, yèyè ùvwa mumanye ne ùvwa mupostolo mwela maanyì. Ùvwa mumanye ne Yesu Kilisto ùvwa mumutume ne mudimu ne: “Wondope babeedi, ubiishe bafwe, ukezule beena nsudi, wipate baadémons. Anu mùdi mupete cyanàànà amu, ufile cyanàànà.” Yèyè ùvwa mwambe ne: “Peetèlò, nda ukenze cyòci aci!” Kabyakangela bwa kusambilaye mufwileku to. Yèyè ùvwa mutumiibwe ne mudimu awu.

²⁶⁸ Cyakambaye ncinyi? Wàkamba ne: “Mu Dìna dya Yesu Kilisto!” Yèyè wakajikula Dìna dya Yesu Kilisto, kadi muntu awu ùvwa anu kacya wàlààla mwaba awu. Ki kumukwataye ku cyanza, kwambaye ne: “Juuka kuulu!” Nenku kushààlayè mumukwate mwaba awu too ne pààkalwà mifuba yèndè ya mu tupòmbò kukolakana, ne kubangaye kwenda. Bwa cinyi? Yèyè kaakenzaku disangisha dya bufuku bujima to. Kaakeelaku mbila kùdi Nzambi to. Yèyè ùvwa mumanye ne ditwishiibwa dyònsò, mumanyine ku mishiku ya Yesu Kilisto ne, yèyè ùvwa mwela maanyì bwa mudimu awu. Eyowa. Yèyè kwakula ne kumujuula panshi, bwalu ùvwa mumanye ne yèyè ùvwa mwela maanyì bu mupostolo bwa kiipacila aku.

²⁶⁹ Bantu bààkadyàdijà mu mundidimbi wèndè abu kabaakambaku ne: “Kaa, lwàku’s, mupostolo Peetèlò, wèlèku mbila pambidi peetu apa, ne utusambidileku disambila dya diitabuuja, kùdi Nzambi” to. To, to, bòbò kabaakambaku aci to. Bàvwa bamanye ne yèyè ùvwa mupostolo mwela maanyì ne mushindika wa Nzambi. Pa nanku bààkamba ne: “Tùlaalè anu mu mundidimbi wèndè cyanàànà. Kabyena bikengela bwa wèwè kwamba dîyi kampanda to. Tudi bacimanye. Tudi tucitabuuja.” Mwoyi munda mwabo! Mupostolo kàvwaku ne mushindu wa kufika kùdibo bònsò to. Ne bòbò, bòbò biine, bàdi citupa cyàci.

²⁷⁰ Mòsà wàkamba ne: “Kì ng’anu mèmè nkààyaanyì uyààya nansha. Ntwètù bònsò bàyaaya.” Twètù bònsò tudi ne cintu

kampanda cya dyenza. Bidi bikengela bwa twètù bônso twikalè beediibwe maanyi.

271 Nenukù bôbò kumona mupostolo awu mwimane mwaba awu, ne kumumonabo wòndopa mubeedi awu ne wènza bintu byakenzaye abi. Kumanyabo ne yèyè kàvwa ne mushindu wa kufikaye kùdìbo to. Bôbò kwamba, bôbò kabaakambaku ne: “Peetèlo, lwâku bwa—bwa wènzè disambila, ne windile mpindyewu too ne pawapeta EMU MMÛDÌ MUKALENGE WÀMBA, kadi ulwe ungambile. Tumone cidi Mukalenge wàmba” to. Bôbò baakamba ne: “Bu twètù anu mwa kudyadija mu mundidimbi wèndè, bu mùdibi ne Nzambi mwine ùvwa munda mwa Yesu Kilisto awu ùdi munda mwèndè, ne tudì tumona cintu cimwecimwe aci munkaci mwa kwenzeka. Pa nanku bàvwa bàlenga mubàngùbàngù wa civwalu cya Yesu ne bàdyàdija mu mundidimbi Wèndè, ne Yesu ùdi munda mwa muntu ewu. Bu mundidimbi wawa mwa kudileejila pambidi peetu, netwondopiibwe.”

272 Ne Bible mmwambe ne yônso wa kùdìbo wàkondopiibwa. Kabiyi bya disangisha dya milombo dya bufuku bujima, dya bàmba ne: “Mukalenge, bu mèmè mwa kuyaku kadyadija mu mundidimbi wa mupostolo wawa?” to. To, bôbò bàvwa bacimanye. Bukênke bývwa bubalenge. Myoyi yabo yìvwa myùle tente. Diitabuuja dyabo dívwa disùùlùke. Amen. Bàvwa bacitàbùùje. Bàvwa bacimone. Tushwala twa Pôlo atu, mushindu wumwewumwe awu’s.

Mpindyewu, bwa kujikija.

273 Yesu kaakeelaku mbila to paakalwabo ne mwânà wa balume mutomboke kùdìye, uvwa ne ciseki, uvwa upona mu mudilu awu. Yèyè kaakambaku ne: “Taatu, Mèmè ndi Mwan’Èbè, nenku mpindyewu Wèwè udi muNtume panwapa bwa kwenza *cikampanda ne cikansanga, ne cikankenga*. Ndiku mwa kwondopa mwânà wa balume ewu anyi?” to. Kaakambaku aci to. Yèyè wàkamba ne: “Patuka munda mwèndè, Sataana!” Yèyè wàkaakula, ne mwânà wa balume awu wàkondopiibwa.

274 PaakatwilanganaYe ne Legônà, mwikalè ne démons binunu bibidi munda mwèndè, uvwa wela mbila awu kàvwa n’Yesu to. Démons nyìvwà yèla mbila ne: “Pìikalàbi ne Wèwè newikalè mwa kutwipata,” kaa, ekelekele, “itabaku bwa tuye kabwela mu cisumbu cya ngulube cyacya.”

275 Yesu kaakambaku ne: “Mpindyewu, Taatu, Mèmè ewu ndiku ne bukole bwa kwenza cyôci eci anyi?” to. Wàkamba ne: “Pàtukàayi munda mwèndè,” ne démons yakadyela lubilu e kuyayi. Bushuwa’s, Ùvwa mumanye ne Yèyè ùvwa Maasiyà.

276 Ku lukita lwa Lazârô, yèyè ùvwa mufwe kùkaavwa matuku anaayi. Kwambabo ne: “Bu ne Wèwè uvwaku kaaba aka, Mukalenge, yèyè nunku kî mmufwe to.”

277 KwambaYe ne: “Mémè ndi dibiika dya ku lufu ne Mwoyi.” Amen! Kabìyi bya ne mpenyi, ndìbà kaayi, anyi mmushindu kaayi nansha. “Èwu udi uNgiitabuuja, nansha byòbì ne yèyè mmufwe, kadi yèyè neikalè ne mwoyi.” Amen. Ùvwa mumanye ne Yèyè ùvwa Nganyi. Ùvwa mumanye ne Yèyè ùvwa cinyi. Ùvwa mumanye ne Yèyè ùvwa Emanùwèlè. Ùvwa mumanye ne Yèyè ùvwa dibiika dya ku lufu. Ùvwa mumanye ne Yèyè ùvwa Mwoyi. Ùvwa mumanye ne munda Mwèndè mùvwa kaabujima kàà Buzambi kasòmbèlemù mu mushindu wa mubidi. Ùvwa mumone bantu bàà bakese abu kuntwaku, ne Ùvwa mumone cìvwà Nzambi muMwambile dìbà adi bwa kwenza aci, nenku ki Yèyè awu. Yèyè wàkayakù.

278 Kaakambaku ne: “Mpindyewu, indilaayi, Nèngǎnjì kutwa binù kaaba aka. Twayi bònsò binù nusambile” to. Yèyè wàkamba ne: “Nudi nwitabuuja ne Mémè ndi mwa kwenza cyòci eci anyi?” Amen. Yèyè wàkabàkonkaci.

279 Kàvwa n’Yèyè to; bàvwa mbòbò. “Eyowa, Mukalenge, ndi ngiitabuuja ne Wèwè udi Mwànà wa Nzambi uvwa ne cya kulwa pa buloba.” Kaa, ekelekele! S’ki Yèyè awu mumanyishìibwe. Bikengela bwa cintu kampanda cyènzekè.

280 “Lazàrò, patuka!” Wàkaakula, ne muntu mufwe wàkapàtuka. Kabìyi ne, “Ndi mwa kucyenza anyi?” to. Yèyè wàkaakula anu cyanàànà. Diitabuuja ndyenze anu dikumbanangana, cintu aci pàaci cyumba cyenzeka.

281 Yèyè ùdi wàkula, Yèyè wàkaakula, ne mpofo pàayi yimona, balema bendela kuulu, mpudimaci yumvwa, démons yela mbila ne yipatuka, bafwe bàbìshìibwa, ne bikwabo byònsò. Bwa cinyi? Yèyè kàvwa ùsambila ufwilaku to. Ùvwa mwediibwe maanyi bu Maasiyà awu. Yèyè ùvwa Maasiyà awu. Ùvwa mumanye ne ki cìvwàYe. Ùvwa mumanye kaaba Kèndè. Ùvwa mumanye cìvwàYe mutumiibwe bwa kwenza. Ùvwa mumanye ne Taatù ùvwa muMumanyishe ne m’Maasiyà awu, kùdi mwena kwitabuuja. Nenku pàvwàYe utwilangana ne mwine mwena kwitabuuja awu mwikàle ne diitabuuja, Yèyè ùvwa wàkula anu Dìyi cyanàànà. Démons pàayi yìya wamwamwa. Eyowa’s, mukalenge. “Akula! Kwedi mbila to. Akula!” Amen.

282 Ne Yèyè ùvwa mumanye makenji Èndè mafila kùdi Nzambi awu, kadi twètù katwena baàmanye to. Ùvwa mumanye cìvwàYe. Twètù mbàdi katùyi bamanye citùdi to.

283 Mòsà ùkaavwa mupwe mwoyi. Shimishoona wàkumvwa. Bakwabo baakumvwa. Yoshuwa wàkumvwa. Mòsà ùkaavwa yèyè mupwe mwoyi. Byakakengela bwa Nzambi kukokaye ntema yèndè ku bwalu abu. KwambaYe ne: “Cyùdi welela mbila kùNdi ncinyi? Mémè’s ndi mukutume mbwà kwenza mudimu awu. Akula, kadi utungunuke uye too ne ku kiipacila kèèbè. Mémè’s mvwa mukwambile ne neulwe ku mukuna ewu. Angata bàna abu utungunuke ne kubalombola. Akula anu cyanàànà.

Cidì mu njila webe nansha ciikàlè cinganyi, cyùmùshè mu njila. Ndi mukupeeshe bukookeshi bwa wèwè kucyenza. Ndi mwakule. . . Wèwè's udi mwakule mulòpòlè njiiji ne nkùpà, ne bufuki, ne bintu bya mushindu awu. Mpindyewu cyùdi welela mikunda kùNdi ncinganyi? Cyùdi ulwila kùNdi ncinyi, wenda wela mikunda wamba bintu ebi? Akula anu cyanààna kadi ùtangilè mudici cikwàta mudimu, kwajiki." Kaa, ekelekele! Kaa, mushindu mwine wùndi mèmè ewu mucinangepu's we!

²⁸⁴ Mwab'ewu, Yesu, byònsò bivwàYe wamba, Yèyè ùvwa wàkula anu Dìyì cyanààna, pààci kwikalaci anu nanku. Nzambi wàkashindika anu pyòpyopyò ne Yèyè ki Mwan'Èndè. "Ewu ki Mwan'Àanyi munanga Mwena munda mùNdi nsankila bìmpè. Mutelejaayi Yèyè."

²⁸⁵ Mutangilaayi. Mèmè ntu munange cyòci eci. Mushindu mwine wùvwàYe wimana ne dikima dyònsò, mu mushindu wa ùkèmeshangana kumpala kwa baMudyudi's. Amen. Yèyè wàkamba ne: "Shimbulaayi ntempelu ewu, ne Mèmè nèndombè Taatù bwa kumona cidìYe wenza pa bwalu abu" anyi? "Shimbulaayi ntempelu ewu, ne Mèmè nèmmujuulè cyakabidi, mu matuku asatu." Kabìyi ne: "Ndi ntekemena bwa kucyenza; Nèngiikalè mwa kuteeta bwa kucyenza" to. "Nèncyènzè!" Bwa cinyi? Mifundu yàkamba nanku.

²⁸⁶ Mufundu wumwewumwe wàkambà ne Yèyè ùvwa mwa kujuula mubidi Wèndè awu, mmutupeeshe bukookeshi abu, Bukole abu. Amen! "Mu Dìnà Dyànyi bòbò nebiipate baadèmons, nebaakule mu myakulu mipyamipya; bòbò bakwàte nyoka ne byanza, anyi banwè bintu bya bishebeyangana, kabyakubenzela bwalu bubi nansha; bòbò batentèkèlè babeedi byanza, babeedi nebasangale."

"Bwa cinyi kwela mbila kùNdi? Akula, uye kumpala!" Kaa, ne dikima dyònsò mèmè. . .

"Shimbulaayi ntempelu ewu, Mèmè nèmmujuulè cyakabidi." Kaa!

²⁸⁷ Nenku vùlukàayi mpindyewu, (Tukàadi tujikija.), ne ùvwa n'Yèyè umwèumwè awu. Yèyè ngudi mwambe, mu Yone 14.12, mu. . . "Ewu udi uNgiitabuujà, byenzedi bìndi Mèmè ngenza yèyè neàbyènzè pèndè." Ncyà bushuwa anyi? Yèyè ngwàkamba nanku awu.

²⁸⁸ Ùvwa n'Yesu, mu Maako 11.24, wàkamba ne: "Wèwè *mwambile* mukuna ewu," kî nne, "Wèwè *musambile* mukuna ewu" to. "Wèwè *mwambile* mukuna ewu ne: 'Tentemuka,' ne kùyi wela mpatà munda mwa mwoyi wèbè to, kadi witabuujà ne ciwàmbi aci necyenzeke, udi mwa kupeta ciwàmbi aci." Kadi wèwè, wèwè mucyàmbè anu mu didicinkila cyanàna, kacyakwenzeka to. Kadi cintu kampanda munda mwèbè, cyùdi wèwè—wèwè mwediibwe maanyi bwa mudimu awu, ne ulwa

kumanya ne ndiswa dya Nzambi bwa kucyenza, ne wêwè kucyamba, cidi ne cya kwenzeka. “Nwênù . . .”

289 Ûvwa n’Yêyè wákamba cyôci eci. “Nwênù bashààle munda Mwànyì, ne Mèyì Àànyì mashààle munda mwenu, nùlombààyi cinùdì baswe ne nebànwènzèlèci.” Kaa, ekelekele! Kaa, ekelekele! Nudi nuumvwa cìndì njinga kwamba aci anyì?

290 Nwafwààyikù luse bwa eci, kadi cidi anu cìmvwila mu mwoyi. Bikèngela ncyàmbè. Ûvwa n’Yêyè wákamba, dituku adi kuntu kwaka, munda mwa diitu amu ne: “Wêwè kwèna ne nyama ùdì mwase to.” Nenku kufùkaYe nshindi yisatu miimane mwaba awu kumpala kwetu. Ncinyi aci? Anu kwamba kwa díyì cyanààna, ne: “Neyìikalè pààpa, ne pààpa, ne pààpa,” ne ki kwikalayi mwaba awu. Ûvwa n’Yêyè wàkenza cyôci aci.

291 Charlie, Rodney, Ûvwa n’Yêyè mu Kentucky mwamwa; ne Nellie, Margie, ne bakwabo bàà kunùdì. Ûvwa n’Yêyè, Nzambi umwèumwè awu uvwa kuntu kwaka ne wàkaakula ne Mòsà, wamba ne: “Cyùdì welela mbila kùNdì ncinyi? Amba díyì!” Ûvwa n’Yêyè wákamba ne byôbì kwikalaku. N’Yêyè. N’Yêyè. Kaa, ekelekele!

292 Ûvwa n’Yêyè wákafila cikeena-kumona kùkaadi bu cidimu cijima nanku, cyàkambà ne tuvwa mwa kuya kuntu kwaka aci, ne Bitampi Mwandamutekete ebi, ne mùvwàku mwa kwenzeka mukungulu mu—mu—mu—munene wùvwà mwa kucibanga, mùvwàbu mwa kwikala mu mmwenekelu wa cipaapu cya musaka. Ne kwôkù aku cikandakanda cya *Look* mag- . . . cya *Life* magazine cìvwà cìcìpàtùle, cilembelele ku cimanu mwômù amu. Ûvwa n’Yêyè wákamba cyôci aci.

293 Ûvwa n’Yêyè, diloolo adi pâmvwà ngenda mpweka ne njila awu ne mèmè kumona nyoka munene wa mambà awu ukààvwa wamba kusuma mwaneetu wa balume awu. Ki Yêyè kwamba ne: “Wêwè wafidi . . . udi mupeeshiibwe Bukole bwa kumuswika, anyì yònsò wa ku mikwabo ayì.” Ûvwa n’Yêyè wákamba aci.

294 Kùdì mukajàànyì mukese wà mvya udi musòmbe pààpa wawa: Ûvwa n’Yêyè mu dinda adi, uvwa mumbiishe ku tulu mu cibambalu mwamwa, ne mwimane mu ditumba, wamba ne: “Kùcìinyi bwa kwenza nì ncinyi cyònsò to, anyì kuya nì mpenyi pònsò, anyì kwamba nì ncinyi cyònsò, bwalu Bwikadi bwa Yesu Kilisto bùdì kabùyikù mwa kupangila abu bùdì neebe kwònsò kùyaaya.”

295 Ûvwa n’Yêyè mu Sabino Canyon mwamwa, kùkaadi ngondo mitwe ku yisatu, pâmvwà munkaci mwa kusambila, ndikonka ne cìvwè mwa kwenzeka ncinyi. Mvwa mwimane mwaba awu, ki mwele wa mvita kumatawu mu cyanza cyànyì, ne kwamba ne: “Ewu m’Mwele wa Mfumu awu.” Ûvwa n’Yêyè.

296 Ûvwa n’Yêyè wákangambila ne: “Anu mùNgààkadì ne Mòsà amu, ki mùNgààkutùmà wêwè.”

297 Ûvwa n'Yèyè wâkangambila, kùkaadi bidimu makumi asatu, ku musulu kwaka, pâncivwà mwânà mutekete. Mémè mwimane mwaba awu bu muyiishi wa kânâkânà, ku musulu aku, kùkaadi bidimu makumi asatu, mwimane mwaba awu pàâkapwekà Bukênkè abu, Dikunji dya Kapyà dimwedimwe adi, bûfùmina mu maulu ne kwimanaBù mwaba awu, bwàmba ne: “Anu mùNgààkatùmà Yone Mubatiji bwa kudyanjidilaye dilwa dya kumpala dya Kilisto amu, Mukenji wèbè wèwè newudyanjidile Dilwa Diibîdi,” pa buloba bujima. Bìvwa bifwanyine kwenzeka munyi, pàâkansekà mpaasata wanyì sungasunga ne kucyelulwilaye apu? Kadi's ncyenzeke anu menemene mushindu awu. Ûvwa n'Yèyè wâkacyàmba. Eyowa's, mukalenge!

298 Kaa, mushindu mwine wùvwàbi ne n'Yèyè wâkamba mu ciprofeta, ku cikeena-kumona ne: “Necyenzeke.” Ûvwa n'Yèyè wâkamba ne: “Muntu munkaci mwenu yèyè mwambe ciprofeta, anyì mumone cikeena-kumona, ne mucyâmbè, ne kwenzekaci, vùlukààyi dîbà adi ne kî nyèyè to, m'Mémè. Mémè ngudi nendè.” Kaa, ekelekele! Mushindu mwine wùndì mufwanyine kutungunuka's we, ngenda ngamba ne n'Yèyè, n'Yèyè, n'Yèyè!

299 N'Yèyè wâkatùluka, pângààkabàmbilà ne Dikunji dya Kapyà ndyâkapwekà pa musulu apu, kadi bôbò kabâyikù mwa kuciitabuuja to. Ûvwa n'Yèyè kuntwaku munkaci mwetu, pàvwà muyiishi wa mu ba-Baptistes awu, kumpala kwa bantu binunu makumi asatu diloolo adi, mu Sam Houston Coliseum mwamwa, pàâkaDikwâcishà Mwanjelo wa Mukalenge fôtô, mwimane mwaba awu. Ûvwa n'Yèyè, umwèumwè awu makeelela, leelu, too ne kashidi.

300 Ûvwa n'Yèyè wâkadyànjila kwamba mwaba wùvwà bintu ebi ne cya kwikala. Ûvwa n'Yèyè wâkamba cyôci aci. Ûvwa n'Yèyè udi mwenze bintu ebi. Yèyè udi umwèumwè awu makeelela, leelu, too ne kashidi. Yèyè mmwenze byônsò anu menemene mwâkambàYe ne Yèyè neàbyènzè. Amen.

301 Nebinkengelè ngiindilè bwa cinyi? Nzambi's mmushindike Dìyi. Didi Bulelela. Tùyaayi mu lwendu. Twèndààyi. Tuyaayi mu lwendu lwa Mukalenge, biikàle tuteeka ku luseke mpatà yônsò, mpekaatu yônsò. Sukùlaayi nzubu, mùkolôpaayi.

302 Mùvwà cikeena-kumona cya Junior Jackson aci cyambe ne, kakùvwa kushààle cintu nansha cimwe to anu myèndù; anyì ciloota cyèndè aci, piikalàye musòmbe kaaba aka. Kakùyi kushààle cintu nansha cimwe to anu myèndù, ne yôyi yìvwa ne tukaba twa ngôlò tuyijingile, mu ciloota civwàye mumpeshe diloolo kampanda aci. Kaa, ekelekele!

303 Mwaneetu Collins, kutacishiku meeji bwa mushipa awu to. Wùvwà mutooke. Wèwè kùvwà anu mumanye mwa kuwukwata to.

304 Teekaayi ku luseke bikwabo byònsò bìdì bibènganganà naaCi abi. Vùlukàayi ne, eci m'Bulelela, nansha Bwikàle bumweka bu dikolesha dya maalu bishi, ne bikwabo byònsò, misangu mikwabo. Tùngunukàayi anu naaBu. Bùdì n'Nyuma Mwimpè. Nzambi umwèumwè wákabiisha Yesu Kilisto ku bafwe awu, Yèyè umwèumwè udi mwa kwamba dîyi ne bintu kwikalabiku awu, Yèyè umwèumwè uvwa ne mwoyi mu matuku a Mòsà awu, ùdì umwèumwè awu leelu ewu.

305 Dibiikila Dyèndè mu dituku dya ndekeelu edi, Yèyè mmudishindike. “Anu mwakadibi mu matuku a Sodoma amu, ki mwikalàbi kabidi ku dilwa dya Mwànà wa muntu.” Yèyè's mmwenze. . . Ki Sodoma udi kwinsi kwaka wawa. Ki Billy Graham ne Oral Roberts mbòbò bàba mwómò amu. Ne Ekeleziya udi utungunuka, ku bimanyinu byòbì bimwebimwe byakalayaYe abi, myaba yònsò yibidi, s'ki bòbò abu kuntwaku. Úvwa n'Yèyè wákacyàmba.

306 Éyi Mukalenge, mpèèshèku bukitu, ki disambila dyànyì ndyòdì adi. Nkwàcishèku, Éyi Mukalenge Nzambi.

Bikengela ngiimanyikile mwab'ewu. Dìbà dyayi.

307 “Bwa cinyi kwela mbila kùNdi? Nudi munkaci mwa kwela mbila kùNdi bwa cinyi, pàdìbi ne Mémè ndi munujaadikile ne Ndi neenu? Ncyènakù mwondope babeedi beenu anyì,” mùdìYe mufwànyìne kwamba. “Ncyènakù munwàmbile bintu bìdì byenzèke anu mu byòbì menemene anyì? Mpaasata wenu kì ngudi mwa kwenza abi to. Mémè! Yèyè kèna mwa kubyenza to; yèyè's mmuntu. M'Mémè, Mukalenge,” mùdìYe mufwànyìne kwamba's. “Mémè's Ngudi mwenze cyòcì eci. Mémè's Ngudi umwambila bintu ebi bwa kwambaye. Kì nyèyè to. N'Dîyi Dyànyì Mémè. Mémè's Ngudi ubiisha bafwe beenu pàdìbo badishinda apu. Mémè's Ngudi wondopa babeedi. Mémè's Ngudi udyanjila kwamba maalu aa. Mémè's Ngudi usungila. Mémè's Ngutu mufile mulayi awu.”

308 Nzambi àmpèèshèku bukitu bwa kwangata Mwele wa mvita wa Dîyi wàkatèèkaYe mu cyanza cyànyì kùkaadi bidimu bitwe ku makumi asatu ne bisatu awu, bwa ngUkwate nye kumpala too ne ku Nkòkelu Mwisàtù, ki disambila dyànyì ndyòdì adi.

Twìnyikààyaaku mitu yetu.

309 Taatù wa mu Dyulu, dìbà ndyedi dyènda dipìta, kadi Dîyi didi dyènda dìshààla dya mushinga mukole. Anu mutùdì tucimona emu, Mukalenge, ku musangu ne ku musangu, Bwikadi bwa Kilisto bùtù kabùyikù bupangila abu bùdì budisangisha neetu misangu yònsò. Mushindu mwine wùndì nKwela twasakidila bwa bwìmpè Bwèbè's we! Mushindu mwine wùdì Wèwè mutulame ne wùdì. . . ne mutubeneshe, mushindu mwine wutùdì tuKwela twasakidila bwa bwalu abu's!

310 Pàndi mukwate mishwala eyi mu cyanza cyànyì apa, Mukalenge, mbantu bàdi ne diitabuuja, bàdi biitabùuje Cyôci eci. Swaku bwa démon ne démon yônsò, bubeedi ne bubeedi bwônsò byùmukè pambidi pàà bantu abu. Ne ndi ntumina nyuma ne nyuma yônsò udi muneemu emu díyì, udi wa bukooya, ne kàyi wa Nzambi awu, nyuma yônsò wa bubeedi, màsaamà ônsò ne tunyinganyinga. Katwena badyàdije mu mundidimbi wa muntu to, bìdi bifwànyine anu kwikala bîmpè, kadi tudi mu mundidimbi wa Evanjeeliyo, Evanjeeliyo mushîndika.

311 Pàdi Dikunji dya Kapyà dinene ditàmbakana dyàtwa kumpala dyàtwa paanyima mu citanda cijima emu apa, Dyôdi dimwedimwe divwà Nzambi mutangidilemu adi, ne Mbû Mukunze mulekele cyenzi cyèndè, nenku Izaleela kupicilaye mwômò amu. Kadi mpindyewu pàdiYe utangila apa, mbimyamina Mashi a Mwan'Endè Sungasunga, ne luse ne ngàsà. Swaku bwa twikalè ne ditumikila. Swaku leelu ewu bwa tulekeleku kwamba, kwela kwa mbila. Swaku bwa tufike ku dyumvwa ne Wèwè udi mutubiikile mbwà mudimu ewu. Dîbà ndyôdi edi. Ndi ngaakula ncyamba mu Dîna dya Yesu Kilisto ne, bubeedi bwônsò buumuke kaaba aka.

312 Swaku bwa mulume yônsò ne mukaji yônsò, udi usoka Dîna dya Yesu Kilisto awu, alambule cyakabidi nsòmbelu wendè leelu ewu. Mémè nyewu ndambula wanyì pàanyì, Mukalenge, pa cyoshelu cya disambila apa. Ndi ndyadija mémè mwine, ne ndifwisha mémè mwine bundu ne nkùdimuna mutu wànyì ngutangija ku buloba kuWàkangangatà. Mukalenge Nzambi, ndi ne bundu bwa butekete bwànyì ne bupidya bwànyì. Ubifweku luse, Mukalenge. Mpèèshèku bukitu. Tùpèèshèku twètù bônsò bukitu.

313 Ndi ndyumvwa, bu Mòsà, ne tudi bônsò mu njila wa dipatuka. Katwena baswe kushiyaku nansha umwepele to. Tudi baswe kwangata muntu ne muntu, Mukalenge. Mbèèbè Wèwè. Ndi mbànana Bwèbè Wèwè. Beneshaku cisambà eci leelu ewu, Mukalenge. Enzaku nanku. Nenku mbènèshèku, pamwe naabo, Taatù, nenku Dîna Dyèbè neditumbishiibwe. Butumbi Bwèbè nebwikalè Bwèbè. Tùpèèshèku diitabuuja dya Cyendèlèlèlè edi, Mukalenge, patudi tudilambula twètù biine Kùdi mpindyewu apa.

314 Mémè, pa Bible ewu ne pa kaaba kàà diimanyina aka apa, ndi nKupeesha nsòmbelu wanyì, Mukalenge. Ndi muswikiibwe ku mulayi ne mulayi wônsò wùdi Wèwè mufile. Ndi mumanye ne yôyi neyishindikiibwe. Ndi mumanye ne yidi Bulelela. Mpèèshèku bukitu bwa kwamba Mèyi aa. Mpèèshèku bukitu, Mukalenge. Ùndudikèku mu bîngenzà ne mu bîngàmba. Nyewu ndifila mémè mwine Kùdi, poopamwe ne ekeleziya ewu, pamwe nendè, Mukalenge, mu Dîna dya Yesu Kilisto. Amen.

Diitabuuja dyànyì. . . kuulu Kùdì,
 Wèwè Mwànà wa mukooko wa ku Kalvariyo,
 Musungidi wa kùdi Nzambi;
 Mpindyewu ngumvwilèku pândì nsambila apa,
 Umushaku mpekaatu yànyì yònsò,
 Kaa, anyishàku bwa kuumukila ku leelu ewu
 Mémè yònsò ngiikalè Webe!

³¹⁵ Mpindyewu tujúukilàayi kuulu, bituulubituulu menemene, patùdì tuwimbila mu matama apa. [Mwaneetu Branham ne disangisha bààbangì kwimbila *Diitabuuja Dyànyì Nditàngile Kuulu Kùdì* mu matama—Muf.]

. . . Kùdì,
 Wèwè Mwànà wa mukooko . . .

Twèlàayikù anu byanza byetu muulu kùdi Ye mpindyewu.

Éyì Musungidi . . .

Dilambulaayaaku nwènù biine kùdi Nzambi mpindyewu.

Mpindyewu ngumvwilèku pândì nsambila apa,
 Umushaku mpatà yànyì yònsò,
 Kaa, anyishàku bwa kuumukila ku leelu ewu
 Mémè yònsò ngiikalè Webe!

³¹⁶ Cyapamwe mpindyewu, ne byanza byetu byela muulu. [Disangisha didi dyambulula disambila edi, bènda bàlonda Mwaneetu Branham—Muf.] Mukalenge Yesu, ndi mpindyewu ndilambula Kùdì, nsòmbelu wa mudimu, mutambe kwikala ne bukezuke, ne diitabuuja búngì bubàndile, ndi ndila, bwa mémè kumona mwa kwikala musadidi wa mutambe kwanyishiibwa mu nsòmbelu wanyì ucilwalwa, kutamba mùmvwà mu nsòmbelu mushààle. Mfwilèku luse ku bupidya bwànyì, ne twàlùjùlwilèku Diitabuuja dyàkafidiibwà kùdì bansantu musangu kampanda wawa adi. Ndi ndifila mémè mwine Kùdì, mu Dìnà dya Yesu Kilisto.

³¹⁷ Mpindyewu patùdì twinyika mitu yetu apa.

Pàncidì ngendela mu nyongolo wa mîdimà wa
 njila miwewelakane wa panwapa apa,
 Ne lutatu lupaasalala lunnyungulukila,
 Wèwè ikàlà Mulombodi wanyì;
 Tumina mîdimà díyì bwa yandamuke muunya,
 Kupula bwôwà bwànyì bwònsò,
 Kundekediku mpambuka
 Nya kule ne luseke Lwèbè nansha.

³¹⁸ Patùdì twinyika mitu yetu mpindyewu apa. Nudiku nuumvwa bu ne Dìyiisha dya mu dinda emu edi ndinwènzèle bìmpè anyì? Ndinupesheku bukutu anyì? Bu nwènù mwa kuswa, elàayi byanza byenu muulu kùdi Nzambi, nwamba ne: “Nzambi, ndi nKwela twasakidila.” Ndi mwele byànyì pàanyi

byanza byônsò bibidi muulu, bwalu ndi ndyumvwa ne—ne ndingambulwishe. Ndimpeeshe bukitu.

³¹⁹ Bimwe bintu bîndi mwambe, ncîvwakù mwele meeji ne mvwa mwa kubyamba to, kadi mbimana kwamba's. Cîvwa nkadyuwu kûndi. Ndi musangane ne mêmè mwine ncîvwa mu mushindu wûmvwà ngeela meeji ne ngûmvwà to, kadi ndi mudisangane mupiile bwa kwikala mwelèlè mbila misangu yônsò, pamutu pàà kwakula.

³²⁰ Nzambi, nkwaçishèku, kubangila pa dîbà edi, bwa ngiikalè musadidi mutambe kudilambula.

³²¹ Kî ng'anu bwànyì mêmè bûndi nsambila to. Ndi nsambila kabidi bwenu nwênù, bwa ne, bônsò pamwe, bu Mubidi wa Kilisto, mubiikidiibwe bwa kupatuka mu bàà pa buloba, biikàle munkaci mwa kudilongolola bwa kuya batangile ku Buloba bulaya, bwa Nzambi ampeesheku bukito bwa kwakula bwa bwalu bwa njila, bwa kutookesha njila bwa kanwikadi nwâlwa kujimija kajila kiine. Ndi nzwàmbila, ku ngàsà wa Nzambi ne, nêndonde bidyacilu bya makàsà bìdi bimata Mashi bya Yèyè Wàkatüdyànjidila awu.

 Nenku nêngàmbulè nkuruse mulambula ewu,
 Too ne pàmpèeshà lufu budishikaminyi,
 Ne dîbà adi ngaalukile Kumbelu, bwa kuya
 kavwala cifulu cya butumbi,
 Kùdi cifulu cya butumbi bwànyì mêmè.

³²² Tudi tufila cyôci eci Kûdi, Taatù, didilambula dyetu edi, mu Dîna dya Yesu Kilisto, Mwan'Èbè. Amen.

³²³ [Mwaneetu wa balume kampanda wàbangì kwakula mu mwakulu mwenyi. Katupa kàà mukaba wa mèyì munda mutupu—Muf.]

³²⁴ Tudi twela Mukalenge twasakidila bwa bwalu ebu. Ikalaayi nwenda mu nsòmbelu wa badilambule. Nudifilè nwênù biine cyakabidi, ku kalolo, ku didipwekesha. Ikalaayi nwenda mu Nyuma. Ikalaayi nwenda, nwakula, nuvwala, nwenza maalu bu beena Kilisto, badipwekeshe ne bàà kalolo. Bwa mpindyewu kanulekediku eci cipangila to. Dìyì dya mukana dya Nzambi dîdi dyakwila ku Dìyi, dyakwila ku mapà. Pàdì dipà dimwe dilwa, dikwabo dîdi dicijikula, dipà dikwabo dilwa dijikula cintu cimwecimwe aci. Nwamonu's, ncyà bushuwa ne aci ncikumbànàngàne anu menemene ne Dìyì ne cikumbànàngàne anu menemene ne dîbà. Nzambi udi neetu. Mushindu mwine wutùdi tuMwela twasakidila bwa bwalu abu's we! Mpindyewu bu mwaneetu. . .

³²⁵ Ne mitu yetu miinyika, bu mwaneetu wa bakaji mwa kutupeeshaku cyona pa:

Angata Dîna dya Yesu wëndè naadi,
 Bu ngabu ku buteyi bwônsò;
 Ne pààkujìngà mateeta ku nseke ne ku nseke,
 Nungana anu cyanàànà Dîna dya cijila adi mu
 disambila.

³²⁶ Enza anu—anu aci, amba Dîyi ne jikula Dîna Dyèndè adi.
 Twîmbààyaaku mpindyewu pàdîbo—pàdîbo batutangalaja apa.

Angata Dîna dya Yesu wëndè naadi,
 Bu ngabu . . . ne wa dikenga;
 Nedikupe disanka ne busambi,
 Kaa, nda naadi kwônsò kûyaayà.

Dîna dya mushinga . . .

³²⁷ Mpindyewu tûlabulanganààyaaku ku cyanza muntu ne
 mukwëndè, twamba ne: “Nênkusambidilè, mwaneetu, ne wêwè
 wânsambidilakù pàanyi.”

. . . Dyulu;
 Dîna dya mushinga, Dîna dya mushinga, Kaa,
 dya bupole be!
 Ditekemena dya buloba ne disanka . . .

³²⁸ Mpindyewu ne mitu yetu miinyika, twîmbààyi cituminyi cidi
 cilondà eci.

Angata Dîna dya Yesu wëndè naadi,
 Bu ngabu ku buteyi bwônsò;
 Pààkujìngà mateeta ku nseke ne ku nseke,
 Nungana anu cyanàànà Dîna dya cijila adi mu
 disambila.

Dîna dya mushinga, Dîna dya mushinga; Kaa,
 dya bupole be! Kaa, dya bupole be!
 Ditekemena dya buloba ne disanka dya Dyulu;
 Dîna dya mushinga, Kaa, dya bupole be!
 Ditekemena dya buloba ne disanka dya Dyulu.

³²⁹ Ne mitu yetu miinyika mpindyewu, ne myoyi yetu pamwe
 naayi, biikàlè ne dimanya dya ne Yesu wàkamba ne: “Ewu
 udi uteeleja Mèyi Àanyi ne witabuuja Ewu udi muNtume, ùdi
 ne Mwoyi wa kashidi ne kaakulwa ku Cilumbulwidi nansha,
 kadi wàmanyi kuumuka ku lufu wàyi ku Mwoyi.” Bamanyè ne
 twètù, ku ngàsà wa Nzambi, tudi ne cyôci aci munda mwetu;
 biikàlè ne didilambula kùdiYe mu dinda emu ne, nsòmbelu
 yetu neyishintuluke, kubangila ku dituku edi ne, netwikalè
 batambe kutwishiiibwa mu ngeelèlù wetu wa meeji. Netwikalè
 tuditacisha bwa kwikala ne nsòmbelu wa kalolo kàà menemene
 ne didipwekesha, mu mushindu wa ne, tudi twitabuuja ne
 citùdi tulomba Nzambi, Nzambi neatupeesheci muntu ne muntu.
 Nenku katwakwikala twambangana bibi muntu ne mukwëndè
 to, anyi bwa muntu nansha umwe. Netusambidile beena lukuna
 beetu ne netubanange, netwenzele bîmpè aba bàdi batwenzela

bibi. Nzambi ngudi Mulumbulwishi wa udi mubinge ne udi mupiile. Pamwe ne . . .

³³⁰ Biimànyine pa cyôci eci, ne mitu yetu miinyika, nêngìikalè mwa kulomba mulunda wetu mulenga, Mwaneetu Lee Vayle, bu yêyè mwa kutangalajaku bateeleji ku mwaku wa disambila. Mwaneetu Vayle.



BWÀ CINYÌ KWELA MBILÀ? AKÛLÀ! LUA63-0714M

(Why Cry? Speak!)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumuingu mu dinda, mu matùkù 14 a ngondo wa mwandamutekète, cidimu cya 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org